

Porihō Utipimo Kimo Jiho

Korindihiyaapi Jipatipaisihore

Kimandi 1 Korindihiyaapi Utipimandapi Nesipihande

Kimo utipimo 55 A.D. hura Porihō aunahipati Epesaasihanda bindataati jipatipiyahore. Aunahipati sati isihiya Girikihiyaami aunahipati awaipate. Siya isiya Judaahiyaami Tiworisaare. Aiwi kiya Autaahaatihopuni ami winihapipaapuni windi moniwi windi gimunyaapihiyaare. Kiya isimiya Jisaasihopi sangi giwunyaapihura ambipatamihaiwa apipaahi ainjotati maipihaiwaahihi kaiwi bisotimbiwihyaare. Saiwi kaiwa kaiwi bimauhi Porihō isihiya giwunyaahohiyihyaami kaiwi bimohirihiri siretisi maipihaiwa namapi sireti kaiwi bimaawise undati nesipati japwaati kaundati jipatipiyataise. Sandi kiyaami maipihaiwa jihi kaiwi bimohiwaiwaapi kaundataase.

1 Korindihiyaapi Piwiha Napimasataise

Porihō kiyaisi ipihirete undati komi piwiha namasisiha (1:1-9)

Autaahaatihomi isihiya tipitapaatotihandapi Porihō kiyaisi nunjenati itihundisiha (1:10–4:21)

Autaahaatihopi giwunyaahohiyihya wainiyihya apwainiyihya sangi namaatiniwihiyaisuni aimi namaatiniwihiyaisuni kiyaami daiwi bimitaatiwihiretapi kaundisiha (1:5–7:40)

Maipihapa khatimatipetahaiwa kiyohiwaiwa titihi Autaahaatihomi isihiya kaiwai namasi nawisapititaatiwi kaundisiha (8:1–11:1)

Autaahaatihopi giwunyaahohiyihya timaamaitiwi otipipati maasi ninawipihiki kaiwi Komi ambipati naasaipatami nausiyihyaatitaatiwi kaundisiha (11:2–14:40)

Kiraisiho napotati japihi nepasitihandapi tanyaahaapi ahotisiha (15:1-5)
Isihiya Jerusaremihanda bimohiyihyai numwitaatiwi piwiha kaundisiha (16:1-4)

Nahataapaapi kaundati Porihō komi piwiha osasepihaati owemasihā (16:5-24)

**Utipimo Kimoaatihi Poriho Piwiha Jipatipaimbipaami Jihapiha
Namasati Nuwati Isihiya Korindihandaahiyaapi Jipatipaindihande**

1 ¹ Nini Porihonine. Kiraisi Jisaasihomi piwiha kopi awusaitandi Autaahaatiho gaatati nanimaati nanimahanati natanoaasisihonine. Sandi Autaahaatiho sawaho gwinyaati maaritindihandaahi ningi nanimahanati natanoaasisihonine. Aihi nini nyami naisoho Sositenesiho nyamatiyati Kiraisihopi giwunyaasishoaisati ko ningisati maasi bindihaawi gaahure satahaato.

² Yihoanji maasi bindihaawi sahi Kiraisihopi giwunyaahohiyihyaati Autaahaatihoopi gaapundiwi koai mepi autaahepumapi aunhipa awaipati Korindihanda bimohiyihyaatapi utipimo kimo jipatipaindi nusoasataayo. Sahi noaipapi Autaahaatihomihyaatimatitaatiw i ko neti yandihesamati neti Kiraisi Jisaasishoaisati ahoyati aimi tisamaamahiwataise. Siyati neti yandihisiwati aimi nisihyaate satati nasamihanataise isihiya jihi Awaisiho Jisasi Kiraisihopi nyahi katihaawi saundaati, “Kinyi Awaisihonji Nyangi Nyainjatingihone,” undohihopi giwunyaahohiyihya aunhipi nahatewara nahataapipihyaaisati neti ahoyati gaatati nasamaati sasatati, “Sahi aimi nisihyaate,” satati aimi nasamihainjihyaate. Iyataati ami Jisasi Kiraisiho so nyahi nahatiyaanini, kiyauni sahuni ami nyahuni koai saundaati, “Kinyi nyangi nyainjatingihonji Awaisihone,” undohihore. ³ Nyami Apiho Autaahaatihouni ami nyami Awaisiho Jisasi Kiraisihouni kindari sangi maariho awaindahandi wisaipi nasanyami gaahaiwa kasimi jatatamanisaihi ami sahi sami maariho ambipati nahandi gaatanihi bimitaatiwi nini kindari piwaunditi nunjeniti gaapundataayo.

Poriho Autaahaatihoai Kinyi Gaahone Gaare Undataase

⁴ Nini nahateweti gaapundataahura nasisoaari koninihi sapi gwinyaati nisi Autaahaatihoai nini kopi aunihihiri aunihindi mepi autaaahemwahohihoai, “Kinyi gaahone gaare,” undataato. Koai nini gaahone undotimandi apaapimahe, ami sahi Kiraisi Jisaasishoaisawi maasi timaamaitauhi kandapi Autaahaatiho sangi maariho wisaiwati gaahati kasisati anditisaisihe. ⁵ Autaahaatiho otipipati kawitaatiwi gwinyaahohiwaiwa sangi nasamiwimaiwaapi koai nini, “Kinyi gaahone gaare,” undataato. Nini Autaahaatihoai gaahone undotimandi sahi Kiraisihoaisawi timaamaitohitihandaahi komi piwihaapi sangi biyati nasesipatati gisunyaatitandihauhi ami isihiyai komi piwiha baiwi ausaapi kaunditaatiwi neti anditisaisihe. ⁶ Sandi siyati noaipasitimandi nyahi Kiraisihomi piwiha ausaawaati aimi kasatotihapa titihi akaahe tati neti nasisataise. ⁷ Komi otipipati kawitaatiwi gwinyaahohipipa gaahapa nahataapa sahi wapa gaahapa kamaiwi nehihandi nasanyati

neti anditisiwataise. Iyati ami sahi Autaahaatihomihapa otipipati kawitaatiwihapa Autaahaatihomi Itipiho Gaaho giwunyaahohiyihiyai numwipatamatiyahapaapi sahi windi nenoahimetitaatiwo, nyami Awaisiho Jisasi Kiraisiho japihi yapipatambi auta uso napitandihandapi jatawaawo. ⁸Iyati ami ko sangi neti watipisamahonihi sahi kiyaatinihi giwunyaapi bimaami nuwi yapipati kimati namawaahuraatitando. Saiwi maipihaiwa kaiwihiye tati Autaahaatiho windi mmondande Awaisiho Jisasi Kiraisiho isihiyai gaahandi asiyihiyaimatitaatiwihandi nunyati ami usai yaawihandi nunyati sisihaapihi natausaasitandi nasataahuro. ⁹Autahaatiho wapa kaitandi katimbipa kapa titihi kiyahore. Iyati ko Jisaasihomihetapi sangi gaata nasamaasihore sahi ko Awaisiho Jisasi Kiraisihoaisawi timaamaitiwi sami maariho naasohititando. Ko kasitandi gaatati nasamaasipipa neti samiheti gaasamaitaise.

**Autahaatihomi Isihiya Kiraisihopi
Giwunyaahohiyihiya Tipitapaatawaayopo**

¹⁰Isi nisi naisihyaati nisataiwi Kiraisihopi giwunyaahohiyihiyaate, nini sangi piwiha kasatitandi nyami Awaisiho Jisasi Kiraisiho ningi watipihandi naninyataise. Nanimihi nini nyami Awaisiho Jisasi Kiraisihomi maahomwaanji neti sahi kiyohiwaiwaapi nini watipindi saiwi kaiwise satitandiyo. Sami piwiha windi timunane. Owetane. Aiwi ami timipitapaatiwise. Piwiha nehi naasika kaniwi sahi gwinyaahotihandi naasikanditanihi timaamaitiwise. Saiwi sahi wapa kaitaatiwi gwinyaahohipipa maariho nehi naasohitanihi kaiwise. ¹¹Saiwi kaiwise ndi kasatotimandi apaapimaahae. Naisihyaate, itapaati Kirohehaatamihiya usa napiwi kimbili ningi sahi itihinniwi sami otihipihi itihapipa ahotihi kandapi kandauhito. ¹²Sami wo sandaase. Kiraisihopi Poriho ningi katanisirihireti japepahirataayo ndaase. Aihi ami sami wo sandaase. Nini Aporosiho Jisaasihopi katanisirihireti japepahirataayo ndaase. Aihi ami sami wo sandaase. Jisasi Kiraisihopi ningi Pitaaho katanisirihireti japepahirataayo ndaase. Aihi ami sami wo sandaase. Ninihi Kiraisiho ningi katanisirihireti japepahirataayo ndaase. ¹³Kiraisiho neti nasipatati yiyandihahi kihonji kihonjaapihimatataiso? Nini Porihonini sami maipihaiwaapi ipi titihi atawihateti nimaatataayono? Aindi ami nini Porihonisi ambipataahi nini waapohora sami usaatangi baasusataayono? ¹⁴Nehi utaahuri yahuri Kirisipaasiyi Gaiyaasiyaisaahihahi gaanihi baawuso ndi Autahaatihoai, “Kinyi gaahone gaare,” undataato ami sahi Poriho komi ambipataahi nyangisi baanyusataise maatitaatiwo. ¹⁵Nehi surisaahihahi nini baawuso ami sami wo nisapi windi samaatitando, “Ningisi Poriho komi ambipataahi baanusihahi waapoho netihonine,” tati windi kamaatitando. ¹⁶E wusasapi nanipimanditoni Sitepanaasihoaisuni ami kapihahi maasi ahoyati komihusasi waapohora

baawuso. Susasapi gwinyaataati ami usai waapohora baawusataayondiho windi biyati gimaanunyainjo. ¹⁷Nini isihiya taahiyihiyai windi bahomaawusotimandi ami Kiraisiho isihiyai waapohora baawuse ndati natanoaasihoninimaahae. Owetise. Nini Autaahaatihomi piwiha gaaha waniha Kiraisiho kaiwaiwaapiha ausaati isihiyai kaunditandi ko ningi natanoasataise. Piwiha Gaaha Waniha nini ausaataati piwiha nehaha isihiya nawihaiwi amitiha gaahaisawihiya gwinyaapi katopatamataindi katitandimaahae. Owetise. O ami nini piwiha nehaha isihiya amitiha gaahaisawihiya gwinyaahohiha ausaati kandaataahi Autaahaatihomi piwiha gaaha waniha Kiraisiho ipi titihi atawihateti nimaatindihandapiha noaipati watipihandi oweha nehahaimatitaise.

**Autaahaatiho Amitiha Gaahandi Gwinyaasiwaiwauni
Watipihaiwauni Kiraisihoai Numwihi Isiwahore**

¹⁸Iyataati ami isihiya yaawati naanijihaiwa nepi napopi owetitaatiwihioaani jaawi nyohiyihiya siya Autaahaatihomi Piwiha Gaaha waniha Kiraisiho ipi titihi atawihateti nimaanjitihandapiha watipihandi oweha naharimatati nehaha tiwi mmoniwimapihiyaare. Iyataati ami isihiya Autaahaatiho kiyaami maipihaiwaatihapi taati japihi numwaasawihiya ami kiya gaahandi nepi asiyihiyaimatiwi nasisoari bimitaatiwi Autaahaatihoenda taawi nyohiyihiya saiwi gwinyaawaayopo. Autaahaatihomi piwiha Kiraisiho ipi titihi atawihateti nimaanjitihandapiha nyangisi japihi nanyamaitandi Autaahaatihomi watipihandisaha tiwi mmoniwu gwinyaawaayopo. ¹⁹Kimikiyati noaipasiwimaiwaapi piwiha wapihi satati jipatipindise:

“Nini isihiya amitiha gaahaisahiya gaahaiwa gwinyaahohiwaiwa nemaito. Aindi ami kiya waati pihitiwi gwinyaahohiwaiwa awaiwaiwa nemasanihi kiyaami gwinyaahohiwaiwa noaipati nehahaiwaimatitaise,”

Aisaiyaaho 29:14

tati jipatipindise.

²⁰Isi ami nyahi utaaho amitiha gaahaisaho nawihiyati pihitati taahiwaiwaapi gwinyaasihopi napitititahaawe? Mosesihomi winihapiapaapi utarihandeti sikurikaiwi jipatipaiwi nawihaiwi mmoniwu nepi isihiyai katiwunjohiyihiyaapi nyahi napitititahaawe? Iyaati ami isihiya nawihaiwi piwihaara nepi tunniwi kwituniwi piwaatiwi katohiyihiya kimaapi yapibatambi wani kimuraahiyaapi nyahi napitititahaawe? Siyaami saiwaahi Autaahaatiho aimi nemasahi kaiwa noaipati akiwaiwaametati nehahaiwaimatitaise. ²¹Autahaatihomi gwinyaasitihandi apipaahi gaahandaahi siyati gwinyaataise. Isihiya yapipatambihiya nawihaiwi kiyaami amitiha gaaha gwinyaahohitihandaahi nisapi windi biyati gimaawunyaatitaiso tati gwinyaataati namati daihira wira isihiyai japihi numwaitandihira

daahiwataise. Sira daihira isihiya Kiraisihopi giwunyaahohiyihiyai japihi numwaitandiraapi nyahi aposerihyaani piwiha Kiraisihopitiha ausaahaayo. Piwiha sa ausaahotihaapi isihiya naharimatati nehihe tiwi mmoniwi nemihauhahandi kandi piwiha kaaraahi Autaahaatiho taati isihiya Kiraisihopi giwunyaahohiyihiyai japihi numwaataise. ²²Iyataati akite Judaahiya siya isihiyai Autaahaatihomi watipihaiwa wiwa kaiwise undiwihyaasi Autaahaatihomi piwiha Jisaasiho ipi titihi atawihateti napwindihandapi ausaahotiha kiyaami omaanjititih neti nusopisasiti kiyai mawih kandapi piwiha kai nemawaayopo. Aihi ami isihiya Judaahiyaami dawaapipihapihiya piwiha gaaha wanihaapi nehihe tiwi mmonimaposawi yapipatambi amitih gaahaiwa gwinyaitaatiwihaiwaahi waati newaayopo ami kiya nehi isihiya yapipatambihyaami amitih gaahandi gwinyaitaatiwihandapaah aiwihyaaso. ²³Kiraisiho isihiya maipihaiwa kiyohiwaiwa nemwati japihi numwaitandi ipi titihi atawihateti napwindihandapiha piwiha ausaahotihaapi Judaahiya sa piwiha maipih nehihaare tiwi mmonimapi kaapi winti gimunyaahopo. Aihi isihiya Judaahiyaami dawaapipih bihohiyihiyai mmonawaawi sa piwiha nehiha katiwunjauhiso tiwi ami kiyaisangi nehihe piwiha akaahaamaahe tiwi nemmawaayopo. ²⁴Iyataahandi kandi ami nyahi Judaahiyaanuni ami isihiya nyahi Judaahiyaanami dawaapipihyauni ahoyati maasi koenda napitihawwi Autaahaatiho nanyisenati gaatih atisaati ami nasonih nanyamaasawihyaanini Kiraisiho Autaahaatihomi watipihandisahotati ami Autaahaatihomi amitih gaaha gwinyaasitihandisahoe taati mmonaati nehaayo. ²⁵Iyataati isihiya yapipatambihya Autaahaatihomi gwinyaasiwawaiwaapi apipaahi nehihaiwa naharimatihaiwe tiwi gwinyaawaayopo. Saiwi mmoniwi gwinyaahauhahandi kandi Autaahaatihomi gwinyaasitihandi isihyaami gwinyaahohiwaiwai ipihatisamati apipaahi waati awaindihandi nusatipihati autahi gwinyaahore. Aiwi ami isihiya yapipatambihya Autaahaatiho wiwa kaiwaiwaapi saiwa watipihandisahaiwaamaahe kunyapehaiwe tiwi gwinyaahohiwaiwai saiwa isihiya kiyohiwaiwai apipaahi awaindihandi nusatipihati watipihaiwe.

²⁶Naisihyaati nisataiwi Kiraisihopi giwunyaahohiyihyaate, nyahi ninapitiyaati bimonihi Autaahaatiho gaata nanyamaase tiwi gwinyaapise. Sami usaati taahiyihyaati amitih gaaha gwinyaapihyaati bimambiwihyaatimahe. Aiwi ami sami usaati taahiyihyaati awaisawihyaatimatiwi isihiyai iwinjaawi bimambiwihyaatimahe. Aiwi ami sami usaati isihiya awaisawihya ambipati awaipati nepihyaamihetapi namoyaatiwihyaatimahe. Owetise. ²⁷Sahi saiwihyaatimetati ami sahi gwinyaitaatiwihandi owetih isihiya jasonawa kimatima gwinyaitaatiwihandi owehatime

tiwi mmonipisamahotimatimaatangi Autaahaatiho nasamihanataise. Sahi siyahatimaatangi ko nasamihainjitimandaahi amitiha awaisihaisawihiyai mawahandi nunyataise. Aihi ami sangi jasonawaawi kimiya andititiwihiyaamaahe apipaahi anditati owetati kunyapehatime tiwi mmonipisamahohiyihyaatangi Autaahaatiho nasamaataise. Ko sangi siyati kasindimandaahi isihiya sitihiri ahotati nawihaiwi watipihiyai mawataise. ²⁸Iyati ami isihiya awaisawihiya ambipati autaaahi ahotahiyaamihetapi namoyaatiwihiyaametiso tiwi isihiya mmoniwimahotimatimai Autaahaatiho namihanati numwataise. Ko sandi siyati kaindimandi isihiya awaisawihiya ambipati autaaahi ahotahiya ami awaiwaiwa gwinyaapihye tiwi isihiya usonihohiyihiyai Autaahaatiho neti nehihatimemataise. ²⁹Isi isihiya Autaahaatiho namihanati numwaasawihiya windi satiwi kamaatitaatiwe nyahi yawanaani gwinyaawaati andititotihandaahi Autaahaatihopi ginunyaatataise maatitaatiwe. ³⁰Ami apaapimahe, Autaahaatiho sawaho komi gwinyaasitihandaahi sahi Kiraisihoaisawi maasi timaamaitawaayopo. Iyataati Kiraisiho so Autaahaatihomi amitiha gaaha gwinyaasiwaiwa nyangi nanyamisihore. Iyati ami Autaahaatiho Kiraisihoetapi nyangi nanyamaati titihyaanenyamati ami nehi Autaahaatiho sawahomihyaanenyamataise. Iyati ami ko Autaahaatihomi gwinyaati maaritirihireti daayaati bitoitahaawi nanyamaataise. Iyati ami nyami maipihaiwaatihapi Autaahaatiho Kiraisihomi otipipataahi nunya nanyamaataise ami maipihandi nyangi maanyinjatitando. ³¹Isi nyangi Autaahaatiho siyati kanyindihandapi kopi tihaapiyaati waati maarititihawaahi, ami Autaahaatihomi piwiha sata katati ahotirihireti kaitihaawe. Ami utaaho wo wapaapi maarititandaahi nehi Awaisihopaahihhi maaritane tati ahotirihireto.

**Kiraisiho Ipi Titihhi Atawihateti Nimainjitihandapiha
Piwiha Poriho Jihhi Kaundisihaapihaare**

2 ¹Isi nisi naisihyaati nisatawi Kiraisihopi giwunyaahohiyihyaate, nini sangisenda napiti piwiha ausaati kasatohitihandapi gisunyaatitaise. Ami ninihhi sangisenda napiti jasoti Autaahaatihomi piwiha noasandihhi sahi windi atihomiwi windi gimunyaapiha ausaati sangi aimi kasatohura isihiya amithaisahiya piwiha awaiwaiwa nawihaiwi nga watipihiya katohipatamataindihhi kasatataamaayo. Owetise. ²Sandi apaapimahe ami nini saindi gwinyaataate. Nini kiyaisati maasi bindataati piwiha waiwa ami wapa wapaapi apipaahi nanipimatitimati nehi Kiraisihopaahi ausaati kiyai kaunditaano ndi aimi gwinyaataate. Iyataati ami so Kiraisiho komi isihiyai japihi numwaitandi Autaahaatiho namihainjihhi ipi titihhi atawihateti isihiya tipi tipimandaahohihopihaahihhi nini kiyai ausaati kaunditaano

ndi gwinyaataate. Aindi nehi kaahihi ausaati kasato. ³Iyataati nini sangisati maasi bimohura nisi ambipati watipindi anditititandihandi owetihi ami yaindi nahatonini iti manimanindihonini bindataayo. ⁴Iyataati Autaahaatihomi piwiha nini sangi kandisasiti kasatohiha isihiya amitiha awaisihaisahiya katiwunjawi katohipatamataindi kandisatasamaayo, ami nisi amitiha awaindihanda sami maariho ami amitiha gwinyaahohitihandi neti nasepemaahiwitando. Owetise. Ami nini piwiha kandisasiti ausaahohihaara Autaahaatihomi Itipiho Gaaho otipipati watipihaiwa gonipati samihatihai kaiwaiwa sahi mmoniwi piwiha titihi akaaha atisaati nehaayo tiwi gwinyaawaayopo. ⁵Nini saindi kiyohitimandi apaapimahe, ami nehi isihiyaami amitiha awaiwaiwa gwinyaahohiwaiwa sangi neti nasepemaiahonihai sahi Kiraisihopai giwunyaitaatiwi ningi pondihe. Nehi Autaahaatihomi piwihaami watipihandihai sangi neti nasepemaiahonihai Kiraisihopai sahi giwunyaitaatiwi maaritataate.

**Autahaatihomi Itipiho Amitiha Gaahaiwa
Gwinyaitihaahaiwa Nyangi Nanyinyataise**

⁶Ami sandihai akite. Isihiya aimi Autahaatihometirihiretapi giwunyaatati iwinjapwaatati watipitohiyihai siya Autahaatihoi nyangi apipaahi gaahaiwa nanyamitandi gwinyaati timasipipaapi piwiha nyahi kaundohiha atiwi newaayopo. Ami sandi amitiha gaaha gwinyaitaatiwiha kiya nehohitindi isihiya amitiha gaahaisahiya wani kimura bimaami niyohiyihai wapa kaitaatiwi gaahandi gwinyaahohitihandimahe. Owe. Iyataati ami sandi amitiha gaahandi gwinyaahohitindi watipihaiwa wiwa Autahaatihohai neti tiwandati niwisapuwitandi neti ahoyanati nainamaninati jatiwaiwaamihandimahe. Owe. Saiwa watipimaiwa kaiwaami watipihandi ami taati owendaahaiwaaso. ⁷Iyataahandi kandi ami nyahihai sangi Autahaatihoi Gaaho amitiha gaahandi gwinyaahoe taati ko sawaho nyangi nanyasiwaiwaapiha piwiha kasatahaato. Iyataati saiwa Autahaatihoi kahapaamapipa sangi kiyati ahiyaiwatataati nyangi kanyitandihandapai katati timanati ahiyataise. Iyataati ami apipaahi gaahapa ipotihura nyangi kanyitandi gwinyaasipipai maawi ahiyataise. Ami saiwa siyati Autahaatihoi gwinyaasiwaiwa, isihiyai ausaati kaunda windi namunajati noasati nehi sawahomiheti ahotimi nunjati, wani kimura nyahi komi otipipatihaiyanangi neti nanyisataise. ⁸Iyataati Autahaatihoi siyati nyapi gwinyaasitindi isihiya maapi yapipatambihai awaisawihiyaimatiwi isihiyai iwinjaawi bimohiyihaiami woaisangi apipaahi windi monahande. Autahaatihoi komi isihiyai kawitandi gwinyaati timaniwaiwa kiya windi moniwi gimaawunyaatahiye. Aihai ami nyahi sandihai akite taati gwinyaahaayo. O ami kiya Autahaatihoi siyati taati kaiwaiwaapi baiwi mmoniwi giwunyaatonaahi kahapaamapipa

nahataapaami Awaisiho kapa Jatisiho ami Autaahaatihomi yundanyiha nausainjitihandi watipihaiwa nahatewa neti nanyisisihoai windi kiya ipi titihi atawihateti tipi timipimandaitauhe. ⁹Iyataati isihiya mambi awaisawihiyaisaahi sandapi windi gimaawunyainjihandi kandi isihiya Autaahaatihopi giwunyaapi aimi watipitohiyihiyaaahi Autaahaatiho kiyai kawitandi neti gwinyaati turimasipipaapi nga giwunyaata nusesipataise. Iyataati wani kima piwima kasatotimaapi Autaahaatihomi piwiha utipihoaatihi wapihi satati jipatipindise:

“Isihiya koai maariho apipaahi nunyohiyihiyai kawisati numwitandihapa neti turimasipipa sapaare tati utaaho wo komi ndihaara windi mose. Iyati ami utaaho wo komi atihira kapaapi siyahape tauhi windi atihomise. Iyati ami utaaho wo kapaapi komi amitiheti ami maarihoatihi windi siyahape tati gimaawunyaatati namausesipainje,” *Aisaiyaaho 64:4*

tati ahotise.

¹⁰Iyataati isihiya mambihiyaisaahi sawimatihihandi kandi nyahi komi otipipatihyaaninihi Autaahaatihomi Itipihoni nyami omanjititihimi bimisiho kaiwa neti ginunyaati kanyatihi nyahi gwinyaahaayo.

Aihi ami sandapi baindi nasesipati kasatitaato. Autaahaatihomi Itipihoni nahataapaapi mmonati gwinyaahore. Iyataati ami isihiya wapa mmoniwi gimaawunyaatimbipa nehi Autaahaatiho sawahohi gwinyaati komiheti noasandimbipa nahataapa Itipihoni mmonati gaamati usitiahore. ¹¹Iyataati sandapi nyangi nyami maariho omanjititihapi kanyimatimbipaapi nyami maarihohi mmonati giwunyaatati nusesipatamahore. Iyataati kimandihimi akite. Utaaho wo komi maarihoatihi gwinyaasitihandi ami utaaho wo so siyati siyahapaapi gwinyaahoe tati windi mausondaise. Owe. Nehi sawahohi saindihapaapi gwinyaatihonine tati gwinyaitaise. Iyataati ami Autaahaatihomi Itipihoisangi kimikireti kiyataise. Iyataati ami Autaahaatiho wapaapi taati gwinyaasipipa utaaho wo ahapaapi siyati taati gwinyaase tati nahataapaapi windi mose. Nehi Autaahaatiho sawahomi Itipihoni Autaahaatiho gwinyaasipipa nahataapaapi mmona gwinyaahore.

¹²Isihiya kimaapi yapipatambihiya gwinyaapi kiyohiwaiwaamatiyaati nyahi gwinyaitihaawihoni itipihoni nehaamaayo. Owetise. Saiwa nyangi ginyunyainjihimi mmonaati gwinyaahohiwimaiwa Autaahaatiho Itipihoni nyangi nanyamisiho neti ginunyaati nanyamihihaiwe. Autaahaatiho komi Itipihoni so nyangi nanyamisimo ko itipihora Autaahaatihomihaiwa apipaahi gaahaiwa nanyamiwaiwaapi nyahi gwinyaawa isiwatitihawini neti nanyisati ginyunyaati nanyamitandihoni nanyamihihore. ¹³Iyataati waisangi siyate. Piwiha saiwa Autaahaatihopi akitiha komi Itipihoni neti ginyunyaati kanyatiwaiwa ami kaiwa nyahi otipipatihyaanini isihiyai ausaawa akithireti kaunditihawe. Iyataati nyahi kaiwaapi isihiyai

piwiha nawihitaaha kaunditihawimaaha isihiya yapipatambihya kiyaaami gwinyaapi isihiyai katiwunjohipatamatiyaato. Owetise. Nyahi Autaahaatihomi Itipihooisahiyaami piwiha nesi ami Autaahaatihomi Itipihooisahiya kaundihaato.

¹⁴Iyataati ami kaami wihoanjihaaisangi siyate. Ami utaaho wo Autaahaatihomi Itipiho komi omanjititih windi bimimoho Autaahaatihomi piwiha Itipiho neti giwunyaati kaundonih ausaahonihaapi windi biyati atisati nameti piwiha naharimatati nehihe tati namaitaise. Utaaho siyahoaisaahi Autaahaatihomi piwiha biyati gimaawunyaatitaise. O ami utaaho Itipihooisahohi Itipiho ko neti giwunyaati anditiwisih piwiha atisati mmonati neti Autaahaatihomi Itipihomihaiwaapi giwunyaatataiso. ¹⁵Iyataati ami wihoanjihaaisangi siyate. Utaaho wo Autaahaatihomi Itipiho gwinyaasirihireti japepihirati giwunyainjiho sohi Autaahaatihomihaiwaapi mmonati neti iwinjapwaatati giwunyaatahore. Ko setaho nahataapa nga neti tipitapaati mmonataise. Iyataati ami ko sawahoaisi utaaho wo neti tipitapaati mausondaise. Owetitaise. ¹⁶Ami nini sandi katohima apaapimaato, Autaahaatihomi piwiha wapihi ahotisihaatihapi satati jipatipindihito:

“Awaisiho wapa kaitandi gwinyaasipipa utaaho wo windi mondaise.

Iyataati ami utaaho wo Awaisihoai saimbi saimbi kinyi kaime undati windi kamunditaise,”

Aisaiyaaho 40:13

tati jipatipindise. Iyataati ami nyahi Autaahaatihomi Itipiho neti ginyunyaati kanyatirihireti japepihirohihiyaanini Kiraisiho kaitandi gwinyaasiwaiwaapaahi biyati nanyesipatati ginyunyaatataise.

Autaahaatihomi Isihiya Kiraisihopi Giwunyaahohiyihya Kihapihi Kihapimatiwi Tipitapaatawayopo

3 ¹Nisi naisihyaate, ami ninihi sangi nehi isihiya maapi yapipatambihyaatisamataindi piwiha kasato jiji namasati nini napiti sangi jasonihoturo. Isihiya Autaahaatihomi Itipiho kiyaaami omanjititih bindata iwinjatihi kireti daiwi bimohiyihiyai kaundohipatamataindi sangi nini windi kamaasato. Ami sahi wani kiyaatinihi nisi piwiha Kiraisihopi kasatohiha atiwi kopi giwunyaawaawi metihonya sangihonya wani kiyaisinihi saniya namohiyihyaamataiw ihyaatitih. Aiwi ami metihonya wapaapi gimunyaahohipatamataiw sahi satiwi nyahi kimba nga kaitihaawi Kiraisiho maaritimbipaare o ami sapaari nyahi windi kamaitihaawi ko maarimitimbipe tiwi sangi sangi nasesipatahiyaatitih. ²Aihi Autaahaatihomi piwiha sangi biyati nasesipata gisunyaatitandiha nehi usaayiha kandisaso ami manyinya wanihiya sangihiyai nandapa nehi napaimbipa amwitihiri nunyohipatamataindo. Ami Autaahaatihomi piwiha komi amitiha awaisiha gwinyaati kaiwaiwaapiha naaja watipihaahi nini sangi windi

kandimaasaso. Ami sahi piwiha apipaahi awaisiha naanjiha naitaatiwi windi timaamanjinhauho. Ami manyinya sangihya nandapa ikiwi nandaatiwihura sangitih nepi windi kiya timaamaninihohipatamataiwo. Iyataati ami wanisangi Autaahaatihomi piwiha watipih naanjiha nyahi sangi katawaasasahi atiwi nepi nga biyati nasesipatitandihandapi sahi windi timaamanjinhopo. Owe. ³Sapi nini sandi katotindi apaapimaato. Ami sahi nehi sami maariho jahiho maaritiwaiwa maipihaiwaahih kawi bitohauhisato. Sandi sahi kiyauhi mmonataayo. Ami sahi woji waanji ami wo waatapi sami maariho mimaipaiwunyaapi manditipaiwi ami sahi nepi tunniwi muniwi ami itihinniwitohowo. Ami sahi taawi saiwa sainihohiwimaiwa nehi sawanaatami maariho jahihomihaiwa kaitaatiwi maaritohirihireti kawi bitotawaayopo tati sandi nyangi neti nanyisataise. Isi sandih sahi windi namwaasitaawi nini akiti kandaatono e jaipindaatono? Sahi isihya maapi yapipatambihya ami yapipatambihaiwa kiyohirihireti taawi kiyawaayopo. Isi sahi akite tiwise. ⁴Nini sangi sasatiti sahi isihya maapi yapipatambihyaamatiyawaayopo satotimandi apaapimaasato. Ami nyahi jhimata sahi Autaahaatihomi isihyaatangi jainjatohiyihyaamihireti nepi kihiri kihireti tipitapaatiwi ahoyaniwi taawi satauhisato. Ami ninih Kiraisihopi piwiha ningi katanisisiho Porihosi ami nini Porihomihonine tipi. Ami woji satapaase. Ami ninih Kiraisihomi piwiha ningi katanisisiho Aporosihosi ami nini Aporosihomihonine tipi katipi sahi sanawaatopo. Sahi taawi sandi saisahitimandi isihya nehi maapi yapipatambihya kiyohirihireti taawi kiyawaayopo. Isi sahi 'Ye' tiwise.

⁵Sahi saiwi nyahi jhimataati Autaahaatihomi isihyaatangi jainjatohiyihyaanami kihonini kihonih sahi tipitapaatiwi windi namaanyipinjawise. Iyawaawi ami yihoaaji Poriyi Aporosiyaanapi kuri ambipati awaipatisahuriso tiwi yihoaanyangi sahi nepi autaahi windi ahimaanyisawise. Ami yihoaajih nehi komi otipipatiho koai kiyahusepaaha kawitihawwi Autaahaatiho ahinyihihuraane. Isi yihoaanyangi Autaahaatiho natanoasih nasiha jasoniha daayih ami komi piwiha kasatonih sahi Kiraisihopi giwunyaawaayopo. Isi ami sahi yihoaanyapi saiwi kimireti gwinyaapise. Kuri Autaahaatiho komi otipipati kawitaatimihati yiyandih numwihi ami kireti nehi komihati komihati kiyamaiso tiwo yihoaaji otipipati taaha kiyohimatapo. ⁶Sangi yihoaanyami otipimbatih taaha kiyohimatapi biyati gisunyaatitandi sireti siyaha kiyahaayo ndi nini sangi kasatitaano. Utaaho osaataati wanihaati niyaamasipatamataindi Autaahaatihomi piwiha Kiraisihopiha nini jih nimasati sangi kasatataayo. Nini siyonih ami utaaho wo nandapa biyati nga nimaatati akipipa nandawisati natihwisati ahotitandi osaataati kitih otipiyati itatamanati jatipatamatiyati Aporosihosi nisi ipoti nasati sangi Autaahaatihomi piwiha katasisataise ami sahi atiwi

nepi gisunyaatitando. Yihoaani yihoaanyami otipipati sireti siyaha kiyonihandi kandi nehi Autaahaatiho sawaho nandapa isapipa biyati atipihapa nimaatitandi yapipati atipati numwipatamatiyati sangi neti anditisaisihi sahi noaipapi watipitiwi Kiraisihopi giwunyaawaayopo. ⁷Isi ami piwiha aimi namihandi kasatohima awitiwi mmonawa piwima taati nini sangi kasatohimaapi gisunyaatitaise. Utaaho jihi nawatawati samihatihahi Autaahaatihomi otipipati kiyati kiraisihopi piwiha ausaati kasatisihouni ami wo ipoti nasati bihiwainjati Autaahaatihomi otipipati kiyati komi piwiha ausaati kasatisihouni kuri noaipapi autaahi awaisururimatamaamaise. Owe. Nehi Autaahaatiho sawahohi autaahi awaisihore ami komi otipipatihurami kaimbipa neti titihema awaindemasihahi ami kapa nga noaipataise. ⁸Iyati yihoaani otipipati nehi naasaipihahi utaaho naasomihati kawisihaayo. Yihoaanyami wonini utaaho nandapa isapipa niyaamasihomatiyahoninitihahi ami wonini wo ipoti isapipa nimaatitandi waapoho numwisihomatiyahonine. Iyataati sahi Kiraisihopi giwunyaawaawi noaipapi Autaahaatihomi isihiyaatimatitaatiwi yihoaani maisahuraani otipipati sati samihatihahi kiyahaayo. Ami yihoaani siyaha Autaahaatihomi otipipati sapi kiyohipatapi nawihohi wihoanijihapa nehi yiyandihahi ninaasoninihahi otipipati kiyohirihireti jatetinjati nanyamitaise. Nanyinyonihahi ninaasoninihahi ami kapa naito. ⁹Ami yihoaanyangi ko neti natanyoasihahi nutasi timaamaitihahi komi otipipati nehi naasaipi maasi ninawipihahi koai kiyahusepaaha kawisihaayono. Iyataati osaataati utaaho kiyati niyaamasihahi kaati noaipati komihaatitipatamataiwi sahi Autaahaatihomihiyaatitiwi ami komi osaataatamataiwihiyaate. Iyauhi ko taati kaati otipipati kiyataise. Iyataati ami sahi Kiraisihopi giwunyaahohiyihiyaate, Autaahaatiho sawaho nasati sami omanjititihahi bimitandi ko sangi neti anjanamatiyati taati anjimatataise.

¹⁰Ami nini saindi utaaho wo anjani nawihiyati nga anjimatishomataindihonine. Aindi nini ningi Autaahaatiho gaahandi gwinyaitandihandi naninyati anditinisihahi ami kandaahi Autaahaatihomi otipipati namasati sami otihatihahi kaandi piwiha kasatataato Autaahaatiho Kiraisihoai natausaasihahi nasati sapi yaawihandi neti napwindihandapo. Nini napiti piwiha namasati kasatotimandi siyate. Utaaho wo anjani namasati jihi mihotirihiri watipihiri anjani anitisati isiwatitandihiri mihotipatamataindi piwiha jihi namasati kasatataato. Aihahi ami nisi ipoti wo otipipatiho nasati piwiha nasesipati kasatataase, sahi baiwi andititiwi giwunyaitaatiwo. Nisi ipoti nasati kasatisihohi siyatihore utaaho wo otipipatiho yasihahi mihotisihaasini naimaatipati ahiyati uwipinaapwipiyati tutisaipati ahiyati anjimatishomatiyaho Autaahaatihomi otipipati biyati mmonati neti kaitande utaaho wo anjani anjimatitandihohi biyati gwinyaaho anjimatipatamatiyato. ¹¹Otipipatiho anjani

anjimatitandihandapi biyati gwinyaaho anjimatane totimandi apaapimaato. Anjaanami satiho aimi gwinyaati yasiha watipiha jihi namasati mihotati namihaahonihi otipipatiho wo ipoti nasati yasiha jiha nawomatosati asaaha mihotitandihomatiyahande. Ami siri kireti Autaahaatihoaisangi kiyati isihiya Kiraisihopi giwunyaahohiyihiyai neti giwunyaati nusepemaihaase kiya noaipapi titihi komihiyaimatitaatiwo. Iyataati Jisaasiho so anjaani anitisati isiwatitandi yasiha mihotirihiramatiyaho bitondaise. ¹²Nini windi siwipati namihandi katitandiyoy: nyahi otipipatihiyaanini nyami otipipati kiyohirihiretapo. Anjaani waani anaahaanjanjani anjimatawaawi isihiya usa baiwi mmoniwi gwinyaapi yasiha watipiha mihotirihireti bipinjawi ipati watipihati utaarihandedi ahotitandihati ahiyawaayopo. Iyawaawi anjaani anjimatitaatiwihapa iwiwiriho anaahipapa gorihandi ami siriwaahandi ami nawiha apipaahi anaahiha nepi ahoyawi anjaani bipinjawi anjimatawaayopo. Ami isihiya usa baiwi mmoniwi gimunyaapi nehi pohipaiwi iwiwiriho keti kuraanihi namasaatati ami sisiha isiwonihi tihati owetitandihapa nepi ahoyawaayopo. Aiwi iwiwiriho napaimbipa isaaha woyiha awasihapa ami koniho witihandami tamitati nepi kapaara anjimatawaayopo. Isi ami sikireti sikaiwi Autaahaatihomi otipipatihiya usa otipipati baiwi kaiwi komi isihiyai anditiwiwawaayopo, kiya Autaahaatiho gaahandi gwinyaati wisasimbipa baiwi mmoniwi ami Autaahaatihomihireti daiwi bimitaatiwo. Ami kimireti otipipatihiya usa Autaahaatihomi isihiyai anditiwipi iwitatamanitaatiwi pohipaitaapo. ¹³Kiya saiwi kaisaihi ami isihiya nahatiya ninaasohi kaindihandi mmondaapo. Ami sandi katotimandi apaapimaato Kiraisiho nasataahura ninaasomi kaiwaiwa neti autemahonihi auta kaiwa noaipaitandihandapo. Sura Kiraisiho japihi nasataahura kiyaami otipipati tipitapaati mmondaise. Siyati ninaasomi otipipati tipitapaati mmonati, so otipipati akitinihi gaahati kiyataise, ami so otipipati mimaipiyati kiyataise tato. ¹⁴Isi ami Autaahaatihomi otipipatiho komi isihiyai anditiwitaatiwi kiyohiwaiwa neti tipitapa mmonata gaanaahi ami wihoanjanhapa so utaaso otipipati gaahati kaisoi Kiraisiho numwitaise. ¹⁵Iyati ami Kiraisiho utasomi otipipati neti tipitapa mmonata ami ko otipipati gaahati windi kamaayati mimaipiyati kiyonaahi, koai wihoanjanhapa windi namumwitaise. Komi otipipati mimaipiyati pohipiyati kaindihandaahi Kiraisihomi isihiyaisuni ami sawahoaisuni windi maawitatamanitaise. Iyonihi ami otipipatapi wihoanjanhapa ko windi nametaahandi kandi ko sawaho nehi utaaho taanahihoai Kiraisiho numwaahonihi Kiraisihoaisati maasi timaamaitati bimitaise. Siyati ami ko utaaho komi anjaani waani sisiha awaindihandi doti tihwitihiri aungwohandi naitipwirisati tihataati komihapa nahataapa neti tihati owemasihinehi nehi utaaho taanaho nehi ambipatihi isisi yanihimati naisihomatiyahondaise.

**Sahi Windi Nanipimatiwi Naharimiwise Ami Sahi
Autaahaatihomi Aŋaŋi Akaŋaŋamataiwihyaatiso**

¹⁶Ami nini sangi piwiha kima nasesipati sandi kasatitaato. Sahi Autaahaatihomi isihyaati Autaahaatiho komi aŋaŋi kaŋi bimitandi komi otipipatihiya taawi aŋimatohaŋaŋamataiwihyaate. Isi ami kima kasatohima ye akite tiwi mmondaapo. Ami sahi sawanaati aŋaŋi waŋji awaisaŋaŋi Autaahaatiho bimihi isihya koai mepi autaahepumah ohaŋaŋamataiwihyaate. ¹⁷Isi ami otipipatiho wo Autaahaatihomi piwiha gaahaapi sahi giwunyaahohitihandi namaitaatiwi neti nasisapuwataataahi ami ko saindahandapi so otipipati jaiwitihapa kiyati sangi neti nasopisasisoai Autaahaatiho wihoŋji maipihandi nunyati neti koai nopisasisaise. Sandi sawaho naasohihi bimitandi komi aŋaŋamataiwihyaatitihohi.

**Nyahi Tipitapaataati Isihya Jihimatohiyihyai
Windi Mepi Autaahewaamwaamaitihaawo**

¹⁸Sahi satiwi nyahi nawihyaati sapaisaahiyaaniso tiwi gwinyaahohipipa samiheti windi ahimotanihi sami wo waati komi kaatami maariho omanjitihihi sawaho sawahaami jaipimanane nawihaindi sapaisahonini ami sapaisihaanine tato. O ami sami otihatihapi wowaati satati nini nawihaindi amitiha gaahandi gwinyaahohitihandisahonine tati maapi yapipatambi isihya amitiha gaahandi gwinyaahohirihiretapi naimaatataataahi sosaati jiji noaipati windi nawihiyati amitiha gaahandi windi gimunyaaho gimunyaahaatimatane ami ko kaati siyataati amitiha akiti nawihiyati gaahandi gwinyaitandiha naitando. ¹⁹Ami sandi nini apaapimaato maapi yapipatambi isihya nawihaiwi amitiha gaahandi gwinyaahohitihandi sandi Autaahaatiho komi ndihaara mmonataati amitiha gaahandi isihya windi nawihaiwi gwinyaahohitihandimahe. Owetise. Iyataati sandapi Autaahaatihomi piwiha wa komi piwihaami utipihoaatihi satati jipatipindise.

“Isihya usa ami isihyai nepi mimaipiwiji nusopisasisaatiwihiretapi nawihyaahiyaaniso tiwi kihaiwa kihaiwa gwinyaahohiyihyai kaiwa kiya nawihyaahiyaaniso tiwi gwinyaahohiwaiwa Autaahaatiho neti ahwipatamatiyati inyati nepihaawihhi sawana nepi nopisasinopo,” tati jipatipindise. *Jobiho 5:13*

²⁰Iyataati ami Autaahaatihomi piwiha komi utipihoaatihi jipatipindisihaisangi satati jipatipindise:

“Awaisiho aimi mmonahore isihya nawihyaahiyaane tiwi kiyaami amitiha nawihaiwi gwinyaahohiwaiwaaro. Kiya nawihaiwi gwinyaahohiwaiwa akipipa windi namwaipati

noti nehihaiwaimatitaiho ami Autaahaatiho sawaho
nehihaiwemahoniho,” tati jipatipindise.

Aunihihiri 94:11

²¹ Isi ami saiwa Autaahaatihomi piwiha komi utipihoaatihi jipatipindiwimaiwaahi akitisi nini sangi sandi kasatitaato. Isihiya usa satiwi utaaho wo naasohihi nyahi Autaahaatihomi isihiyaami jihimainjihomihiyaaninitaati ami ko nehi naasohihi Autaahaatihomi piwiha gaahaiwa kanyatati katanyasati nanyamihi komihetapaahihi nyahi kapa nahataapa nehaayo tiwi windi gimunyaapise. Ami nini sangi sandi apaapimaasato, ami kahapaamapipa nahataapa kapetapi sahi gaahaiwa nepi jatatamanitandihaiwa Autaahaatiho aimi sangi nasanyati ami komi otipipatihiaisangi aimi nasamise. Isi sahi nepi tipitapaatiwi Autaahaatihomi otipipatiho kiho nehi ninaasomihetimatiwi ninihi somihonine nniwi sahi isihiyai nepi niwimaapi ami sahi sawanaati windi namimaatiwaise. ²² Nehi isihiya noaipapi sahi Autaahaatihomi isihiyaatami jihiyaatiwi Autaahaatihomi otipipatihyaimatiwi jainjatohiyihiya siya Poriho ami Aporosiho ami Sipaasiho ami usa singwaasamataiwihiyaahi sangi anditisaipi jatatamanitaatiwi Autaahaatiho ahiwihihyaare. Iyati ami nahataapa Autaahaatiho kiyati yamihapataatuni yapipataapuni ahaimbipa sapa samapaare. Iyati ami sahi koaisawi asiyihyaatimatiwi kiyaatinihi bimitaatiwi Autaahaatiho kiyati ahisihihyaate. Iyati ami sahi napwisaihi sangi asitimatitaatiwihandi Autaahaatiho nasanyonihi sahi japihi asiyihyaatimatitaapo. Iyataati ami gaahapa nahataapa wani kimura ahotimbipa sapa sangi jatatamanitandi ahondaise. Iyati ami gaahapa nahataapa ipoti noipati ahotitandihapaisangi sangi neti jatatamanitandi noipati ahondaise. Iyataati sapa nahataapa sahi Kiraisihoai nunyaniwi komihyaatimatohura noipati samihapaimatataise. ²³ Sapa siyati nahataapa samihapaimatihi ami sahihi Kiraisihomihyaate. Aihi ami Kiraisiho so Autaahaatihomihore ami Autaahaatiho nahataapai daahemati jatataiso.

Sahi Nyapi Kiraisihomi Otipipatihiye Tiwi Gwinyaapise

4 ¹ Sangi biyati nyapi gisunyaatitandi nini sandi kasatitaato. Nyahi Kiraisihomi otipipatihyaanini ko natanyoaasisawihyaanine. Iyati ami ko Autaahaatiho isihiyai windi neti namunjahaiwa noasandiwaiwa nyamiheti ahotanihi jaawa bindihaawi isihiyai kaunditahaawi namihanati ahinyihihyaane. ² Iyataati ami utaaho wo awaisiho womi otipipati iwinjaati biyati atisati neti biyati komi kaundirihireti japepihiritaise. ³ Iyataati ami nisapi ko otipipati siyati siyati kiyahoe tiwi sahuni ami isihyauni tipitapaapi nisondaatiwihandapi awaindihande ndi nini windi waati gimunyaaho. Iyataati ami nini niwahonisangi otipipati saindi saindi kiyataayo ndi windi niwahonini tipitapaati

motiniho. Owetise. ⁴Iyataati ami nini saindi kasatotimandi apaapimaato. Nini otipipatihonini otipipati nini mimaipaindi kiyataayo ndi windi gimaanunyainje. Iyataati mandih akite nini gaahonine. Maipihaiwa kamaindihonine titandi sandi owe. Nisangi maipihaiwaisahoniso. Iyataati nisi otipipati kiyohipatapi kinyi saimbi saimbi kaimbihone tati tipitapaati nisondandiho Awaisihore. ⁵Isi siyatisi sahi otipipatihyaapi kiya otipipati nga kiyawaayowo e mimaipaiwi kiyawaayowo tiwi asisiha kandapiha sangi noapisihandi sahi jihi tipwinaniwi tipitapaapi usondaatiwi gaamaahe. Nyami otipipati kiyohiwaiwa kiyati ahotimi noti, Awaisiho nasataahura kihaiwaamihaiwa kiyohiwaiwa noasati asahatinditih ahotiwaiwa neti auta sisiheti ahaitaise. Iyati ami ko kiya gwinyaapi omanjititih ahusotiwaiwa neti autemahonih isihiya nahatiya mmondaapo. Iyataati sura tipitapaati usonati otipipati mimaipaiwi kiyohiyihiyai wihoanjihandi nunyati ami otipipati nga kiyohiyihiyai wihoanjihandi Autaahaatiho numwitaise.

Korindihiya Sawana Naimaatawaayopo

⁶Isi nisi naisihyaati nisatawi Kiraisihopi giwunyaahohiyihyaate, nini niwahonisapuni ami Aporosihopuni piwiha aimi kasato yahuraanji kiyohiwaiwa mmoniwi nepi kaitaatiwo. Autaahaatihomi piwiha katati ahotirihireti baiwi atiw nepi kaami tanyaahaapi baiwi gwinyaapise, Autaahaatiho piwiha katimumwaanji nehimwaapi kaimi namuwo. Aiwi ami utaaho wopi kimo otipipati nga kiyataisi autahiwiwitiho ami utaamo otipipati mimaipiyati kiyataisi koai yatihiwitiho tiwi saiwi kamaiwise. ⁷Iyataati ami sahi nisapi katotimandi sami woai kinyi awaisihonjimatipi isihiyai nusatipihapihoni isihiyai iwinjaapi bime tati ndi ahisisataise? Owetise. Iyataati ami Autaahaatiho wapa maahiwapa namaahimih kapaapi namaanimise tipi katapaase? Autaahaatiho nga wapa gwinyaitaapihapa nahinyonih nepaapi kapaapi nisi anditindi gwinyaahohitihanda netaayo tipi napaapi kiwahoni naimaatipi katapaase?

⁸Nini sangi piwiha titih kasatitandiyo. Sahi Autaahaatihopi nga gisunyainjih satiwi nyahi Autaahaatiho gwinyaasiwaiwa gaahaiwa nahatewa aimi nga newa tisaitaati ginyunyaatataise tiwi gwinyaawaayowo, isihiya nandapa naniwi tisaitohipatamataiwo? Aiwi ami sahi satiwi nyahi itatamaninaati nga bimitihaahapa nahataapa aimi nga tisaita nehaayo tiwi gwinyaawaayowo? Aiwi ami sahi satiwi Kiraisiho aimi japihi napihi nyahi koaisaati maasi isihiyai ami kahapaamapipai winjaawi bindihaayo tiwi gwinyaawaayowo? Sahi saiwi gwinyaawaawi nyangi nanyamasi jihi awaisawihyaatimatiwi isihiyai ami kahapaamapipai osamapi iwinjaawi bimito tiwo? O ami sahi saiwi kamaayauhaise ami nyangisangi sangisaati maasi

awaisawihyaanimataati isihiyai ami kahapaamapipai iwinjaawa bimitihaawo. ⁹Aihi ami nini saindi gwinyaataayo. Autaahaatiho nyahi komi otipipatihyaanangi isihyaami ndiheti yaasihandi newa napwitihahamwaji ahinyihi bindihaayo. Kaihi nini sandi katotimandi kahapaamapipa nahataapauni ami Autaahaatihomi otipipatihyauni ami isihyauni nyapi kiyai yaawati naanjihaiwa napitihaiwa nusoaipase tiwi nyamihasini ndiha ahiyawo jatawaayopo. ¹⁰Iyataati ami nyahi isihiyai Kiraisihopi piwiha kaundohihaapi isihya piwiha naharitiwi katawaayopo tiwi gwinyaawaayopo. Iyataati ami sahihi satiwi, “Nyahi aimi nahataapaapi gwinyaawaahyaanisi usa wapaapi kamaanyaitaapo. Sandi apaapimahe ami nyahi aimi Kiraisihoaisaati timaamaitaahyaaniso tiwo.” Iyataati ami nyahihi isihya nyangi nyasonawaawi satiwi ‘Kimatima andititiwi watipihyaametati apipaahi kunyapehatime,’ nyatiwihyaanine. Iyataati ami sahihi isihya sangi jasonawaawi satiwi, “Kimiya isihya aimi noaipapi andititiwi watipihye,” tiwi katiwihyaate. Iyataati ami nyahihi isihyaami ndiheti ambipati awaipati owetati isihya nyangi windi nga nyasowi namaanyamaapihiyaane. O ami sahihi sami ambipati awaipati noaipati autaahi ahotati ami isihya nga jasoniwi nepi autaahi nasimaapihiyaate. ¹¹Wiwa nyangi jihapi nanyoapipi nasati wani kimuraatiwaiwaapi sandi katitandiyo. Nyangisaahi janyamanati ami waapohopi naahutarihiri awanyisataise. Iyati ami saurihimahe yutihiri apotihirisangi nanyapwirinjihahi nehi napwirinihapaahihahi niyohaayo. Aihi ami isihyaaisangi nyangi nyawawaayopo. Iyataati ami nyami aunahipati anjani bimaawaati nanoaitihaahapihi owehiyaanini kihapihi kihapimawa nanowa nowa nasaya daayahaayo. ¹²Iyataati ami nyami ikwiraahi nawihopihati otipipati waati kiyahaayo wapa nyahi nenoahitohipipa nawihora naitihaawo. Iyataati ami isihya nyangi piwiha maipihahi kanyatauhihandi kandi ami wihoanji gaahati kawisaati Autaahaatihoai nunjenahaayo ko kiyai napaisaatumwaitando. Iyataati ami nyangi isihya naanji yaasihaiwa nanyinyauhi ami wihoanjihandi naana yaawihandi namunyaati nehi bipi naanji yaasihandi nehaayo. ¹³Iyataati ami nyapundiwi isihiyai piwiha maipihaiwa kaundawaatopo. Iyataati ami isihya Autaahaatihopi windi gimaawunyaapi ami moniwihya nyapi saiwi ikwaatipihahi waatihiri nehi naihoapi nepi yotitaatiwihapaamataiwi nyasonawaayopo. Aiwi onihiami sotipati kipati atihamaataiwi nyasonawaayopo. Saiwa siyati nyamiheti nanyoapipi nasati wani kimuraisangi sikiyati ahondaise.

**Porihohi Kairihireti Korindihiya Japi Nepi
Kaitaatiwi Gwinyaati Maaritaitaise**

¹⁴Nini sangi piwiha aimi kasatiti jipatipiyohiwimaiwa masahaiwa nasanyati kasatataamaato. Owetise. Sahi baiwi gwinyaitaatiwihaiwa

kasatiti jipatipiyataayo. Sandi ami apaapimaahē, sahi nisi manyinyaati nisi maariho nasanyatihyaatitihe. ¹⁵Iyataati ami isihya taahitihandi napiwi sahi Kiraisihoaisawi maasi timaamaitohiyihyaatangi jainjaawi binyaihihandi kandi ami Autaahaatihomihaiwaapi kasatiwi katiwisasitaatiwihiya sami japiya taahiyihya owehiyaate. Iyataati nini Kiraisihomi Piwiha Gaaha Waniha ausaati kasatonihī sahi atiwi nepi Kiraisihoaisawi timaamaitawaayopo. Saindi nini piwiha kasatotihandaahi Autaahaatihomihaiwaapi nini noipati sami japihonimatataayo. ¹⁶Siyatitihī ami nini watipindi sandi kasatitaato. Nini anditindi Kiraisihomihireti japepihrohīpatamataiwi ami sangisangi naasikati kaiwi kireti japepihiriwise. ¹⁷Saiwi Kiraisihomihireti nisataiwi japepihritaatiwihandapi nini nisi maasihō Timoteho nisi maariho komiheti ahotohoai aimi nandusaaso ko piwiha biyati nasesipati anditisaiwati kasatitando. Iyataati ami koaisangi nisatiyati Awaisihomi otipipati kiyataahore. Ko nasati nisi kaindi bimohirihiretapi siyati siyati kiyati bindataise tati kasatonihī sahi gwinyaitaatiwo. Nini Kiraisihoaisati maasi timaamaitihoninisi Kiraisihomihireti japepihriti kiyataayo. Ko nasati nini nahataapipihī daindi Autaahaatihomi isihiyai nisi kandunjohiwaiwaapi jihaati biyati nasesipati jainjapwaati kasatitaise. ¹⁸Iyataati ami sami usa nisapi satiwi ko windi nyangisenda akitinihi namaapitaise tiwihiyaare. Aiwi ami kiya nyahi noaipawaati awaisawihyaanimatitahaawo tiwi piwiha jaiwaiwihaiwa autaahinjaawi isihiyai kaundawaatopo. ¹⁹Iyataati ami ninihī, ningi Awaisiho kiyenda numwe donaahi napiti waara jasondo. Siyati Awaisiho numwe donihī nasataahura isihya siya Awaisawihyaanimatitaano tiwi katohiyihiyai usondaano kiya watipihandi napitetahandi isipihyaatopo ndo. Iyataati ami nini kiyaami piwiha katiwi kiyohiwaiwaapi atiwitandimaahē. Owetise. Nini nehi usondande, Autaahaatiho watipihandi numwihi Kiraisihomi gwinyaasirihireti japepihirawaahiyaatowo ndo. ²⁰Iyataati ami utaaho woi Autaahaatiho iwinjaati bimonaahi ko nehi piwaahaiwaahi kamaatitaise. Owetitaise. Autaahaatiho koai watipihandi nunyati anditiwihonihī Kiraisihomihireti japepihritaise. ²¹Isi wani samihandisi napitaiwi gwinyaawaayopo. Nini napiti jasoniti piwiha sami gwinyaapi kiyohiwaiwaapi waapihindi itihisatitando e nini sangi maariho nasanyati ami nisi maariho napaisaatitanihi piwiha napaisiha kasatitando?

**Kima Piwima Namaatohitihandami Ipaahaapi Kiraisihomi Isihya
Maipihandi Kaiwi Ambipati Timamaitohitihandapihaare**

5 ¹Sami otihatihī windi apipaahi maipihandi akitinihi noipasihī isihya nesi kaniwi ami ningi kandawaatopo. Kandauhi nini atindi netaayo. Sandi siyahandapito. Utaaho wo titihī komi sapihomi

apwaataati sanaati sisi wihinihaati nasisoaari isiwati kaatisati maasi nanoti bindataise tauhito. So utaaso maipihati isihiya Autaahaatihopi windi gimaawunyaapihiyaisangi windi kamaiwihati apipaahi maipihati kiyataise. Ko jinjapihi sapihomi apwaataati ahiya nanotaise. ²Iyataati samihatihahi sandi siyati noaipasihandi kandi ami sahihi gaahati noaipataiso tiwi autahinjaawi maaritawaayopo. Sandapi maipihandi noaipataiso tiwi maariho asipaiwi maariho windi naanamaasise. Siyati maariho naanajasonihi utaaho sandi kaisihoaisi nepi nehahaatemasaihi sami otihatihahi windi bimimone. ³Iyataati nini titihi utaahonini akohonini nisi ambipatisati sangisati windi bimindataahandi kandi ami nisi maariho itipihohi sangisatindaise. Siyati nisi itipihohi maariho sangisatitindhandaahi utaaho so maipihandi siyati kaisoai nini aimi tipitapaati usonataayo nini sangisati maasi nisi ambipatisati utaahonini akohonini bindataahandamataindo. ⁴Utaaso sopi sahi saiwi kaitaatiwi nini gwinyaataayo. Nyami Awaisiho nyangi nyainjatisihomi maahomwaanji ami komi watipihandi nesi ahoyaniwi andititiwi piwaatiwise Awaisiho Jisaasiho anditisaiwitandi komiheti nausaniwo ami nisi maarihoaisangi sangisatindaiso. ⁵Sahi saiwi andititiwi piwaatiwi kaiwi Bwaasirihiraapihemapise koai kiri iwinjatitando. Ami komi ambipati neti nosasinati bimito. Siyati nosasinati mimaipiyati bindataati namati japihi nepemaitati nasati bimonihahi Awaisiho isihiyai neti tipitapaati usondandi nasataahura koai wihoaanjihandi naana yaawihandi namunyati japihi komi maarihoai numwaitando.

⁶Sahi gwinyaitaatiwiha piwiha kima sandi kasatitandiyo. Sahi tanyaaha gaaha owehandi sawanaati nepi mepi autaahemaamatiwise. Owe. Sahi aimi gwinyaapihiyaate. Nipitandihandi apipaahi maipihonji ami biretihanatihahi ahiyauhi biretihanati neti aungwohandi nipisati awaindihanditindhandapi sahi aimi gisunyaatahiyaate. Isi sikiyati utaaho wo sami otihatihapi maipihandi kiyonihahi ko naasomi maipihandi nahatiyai nuseti numanati janati awaindititaise. ⁷Isi nipitandihaiwa jahiwaiwa namahohipatamataiwi sahi maipihaiwa kiyohiwaiwa namapise. Namaposawi sahi kaatiha biretihanati wanihanati asitihanati nipitandihandi owehandamataiwihiyaatitaatiwo. Ami sahi aimi sikaiwi sikireti bindawaayopo. Ami Kiraisiho nyapi ipi titihi atawihateti nimaatataise Asisiha Awaisiha Kimbapiho Autaahaatiho Isiraherihiyai Timaawati Nusatipasitihandapi Gwinyapendaatiwi sipisipihohi gaahoi tipihohipatamatiyato. Ko siyati nyapi nimaatindhandaahi sahi aimi noaipapi biretihanati wanihanati nipindihandi owehandamataiwihiyaate. ⁸Isi sura Isiraherihiya kiyai Autaahaatiho nehi iwinjati nesousihahi namaapopi nga bimotihandapi gwinyaitaatiwi Asisiha Kimbapiho Pasopaahandapi timanjinndaatiwi biretihanati neti nipitandihandi (yisihandi) jahitihandi nemahohipatamatiyaati,

nyahi maipihaiwa jiji kiyohiwaiwa ami maipihapa wapa nahataapa nyamiheti ahotimbipa newaamaitihaawo. Iyaati biretihandi wanihandi nipitandihandi owehandamatiyaati wanihiri gaahireti japepihiritihaawo. Iyaati maariho gaaho popitihoni newaati ami piwiha titihi akiti akaahaahi kataati usai kaunditahaawo. ⁹Nini utipihoni jiji wo aimi jipitipiyohihoaatihi sangi sandi isihiya kihiyaisawi kiyaami ambipati naminiwi timaamaitiwi daayohiyihiyaisawi maasi bimimaawise satiti kasatataato. ¹⁰Ami nini sangi sasatataamaato: Sahi isihiya maapi yapimbatambihiya nahatiya, kihiya kihiyaisawi ambipati naminiwi timaamaitiwihiyaisuni ami isihiyai usaamihapaapi maariho windosihi ikoniwihiyaisuni ami isihiya autaahaatiho jaipitahopi atotipiwesawi gaapundiwi komi ambipati niwimaapihiyaisuni sahi namapise satiti kasatataamaato. Owetise. O ami kiyai sahi namamaitaatiwaahi ami sahi kimati yapimbatapi apipaahiyaati kiyaatinihi namaitaatiwe. ¹¹Nini piwiha jiji aimi kasatohihaami tanyaaha sandiha kasato: Utaaho wo Kiraisihopi giwunyaaho sangi sasatati nini sami naisohonine taho ko ami komi ambipati kihiyaisati naminati timaamaitati ami ko windi iparimimatati maipihomatati ami autaahaatiho jaipitahapaapi gwinyaati kapai atotipiwesati niwimaati ami komi piwihaaraahi isihiya usai neti nusopisati ami waapoho biyaahandi nanati naharisati ami ikonahoaisawi maasi bimitosawise satiti kasato. Aindi isihiya saiwihiyaisawi sahi apipaahi nahoaiwi piwaniwi ami nandapaisangi kiyaisawi windi namaaniwise ndi kasato. ¹²⁻¹³Iyataati ami isihiya Autaahaatihomi isihiya Kiraisihopi giwunyaahohiyihiyaami ipaahaapihiyai neti tipitapaati usondandi sati nisi otipipatimaahae. Owetise. Ami isihiya Kiraisihomi isihiyaami ipaahaambihiyaisaahi Autaahaatiho neti tipitapaati usondaise. O ami sahihi sahi sawanaatami isihiyai tipitapaapi usondaatiwe, sati sami otipipate. Iyataati kimikaiwi sahi kaitaatiwihandapi Autaahaatihomi piwihaami utipihoaatihapi satise: “Sahi giwunyaahohiyihiyaatami otihatihoni utaaho maipihoni maipihandi kiyati bimisoai nepi nehahaatemapise,” tati katise.

Winihapipa 13:5, 17:7

**Kiraisihomi Isihiya Usa Ami Kiraisihomi Isihiya Usai Nepi
Piwiha Tipitapaapi Mmondaatiwihapihemaamapise**

6 ¹Nini wani ami sahi windi kaiwi bimohitihandapi kasatitandiyo. Sahi Autaahaatihomi isihiyaati Kiraisihopi giwunyaahohiyihiyaatami wuri wapaapi sapa nisihe nisihenimi itihinnamaami kurami wo piwiha ka nesi isihiya piwiha atiwi nepi tipitapaapi soni sapaami satihonje soni sapaami satihonjimaahae unditaatiwihiyaapi namone, isihiya Autaahaatihopi gimaawunyaatahiyaami ndiheto. Siyati titihimetihandi kaitaatiwi maipe.

Saimi kamaimi nehi Autaahaatihopi giwunyaahohiyihyaami usa baiwi amitiha nusesipata giwunyaatahiyai kaundimise kiya nuwi kurisawi bipisi bindawa piwaatiwi mmoniwi kimonji kimbaami satihone kimonji kimbaami satihonjimahe undiwi kaundito. ²Nyahi siyaati sandi windi kamaito tiwi gwinyaawaawaahi sangisi piwiha ahotisahaapi windi gimaasunyainjo? Ipotihura Autaahaaticho isihiya Kiraisihoaisawi maasi bindawa isihiya Autaahaatihopi gimaawunyaahohiyihyai kiyaami kiyohiwaiwa tipitapaapi usoniwi saiwi saiwihiyaate unditaapo. Isi ami nyahi Autaahaatihomihyaanini Kiraisihoaisaati saitahaahyaaninisi wani giwunyaahohiyihya maipihonya wonya kaisaihaahi keti kapa nepi titihemapise. ³Iyataati ami Autaahaatihomi enjerihya otipipatihya yamihapataatihyaami kiyohiwaiwaisangi newa tipitapaawa usondo tiwi gimunyaahowo? Isi wonya naanhonya masihonya isihiya giwunyaahohiyihyaamiheti nusoaipahonaahi keti bipisi titihemapise. ⁴Isi wonya naanhonya siyahonya noaipahonaahi sahi sawanaati giwunyaahohiyihyaatami usa piwiha piwaatiwi naanisonya nga nawihaiwi titihemaitaatiwihyai mmoniwi kaundiwise, kiya titihemaito isihiya Autaahaatihopi gimaawunyaapihiyaapihi piwiha naanisiha titihemaita nesi namuwise owetane. ⁵Sangisi piwiha masaha kasatataato. Isi sahi giwunyaahohiyihyaatami otihatihapi wo komi amitiha biyati nusesipatati gwinyaaho bimonaahi koaisi kaundiwise ko utaahuri wapaapinimi itihitinjururami piwiha atisati neti tipitapaati mmonati sonji kimbaami satihone o kimonji kinyi satihonjimahe unditando. ⁶Siyatitihihandi kandi sahi saiwi kamaiwi asireti kaiwi Kiraisihopi giwunyaasiho ami wo Kiraisihopi giwunyaasihoai numwaasi piwiha tipitapaati mmondandihoaapihi notaise. Numwaasi noti kurami piwiha isihiya Kiraisihopi gimaawunyaapihiyaami ndiheti kiya titihemapumawaayopo.

⁷Siyahapa sawanaati bipi titihemaamapi isihiya gimaawunyaapihiyaami ndiheti nuwi titihemahotihandi sandaahi Kiraisihomihireti japepihiriwi kaitaatiwihandapi nenoahitawaawi apipaahi timahiyamawaayopo. Utaaho wo maipihati kahisonihi wihoaanji maipihati kamaawimbi nehi winjase. Iyataati ami utaaho wo yapipati ami wapa yateteti namaatipati onihiwati kinyihapaapi nisihape tati ikonati nangehonaahi nehi winjase koai kiyati kinyihapaisati ahoyati naito. ⁸Iyataati ami sangisangisi ami naasikati isihiya usai kawiwi kiyaamihapaapi nyamihape undiwi jaiwundiwi nusepihiyaatiso sami naisihya samataiwi Kiraisihopi giwunyaahohiyihyaamihapaaro.

⁹⁻¹⁰Iyataati ami isihiya maipihaiwa nasisoaari kiyawaasohiyihya Autaahaaticho iwinjaati bimitandihapihi yamihapataatichi windi namindaitaapo. Owetitaise. Isi sandapi sangisi gimaasunyainjo? Ami sahi maipihaiwa kiyawaahandi kandi maipihaiwa kiyahaamaayo

gaahati kiyahaayo tiwi jaiwitiwihiyaate. Isi usihiya asihiya kihiyaisawi ambipati timaamaitiwihiyauni ami autaahaatiho jaiwitahoai mepi autaahepumapihiyauni ami usihiya asihiya aimi namaatiniwihiya kiya kihiyaisawi ambipati timaamaitiwihiyauni ami usihiya manyinyauni ami gwinyaahiyauni usihiya sawana kiyaami ambipati timaamaitiwihiyauni ami usaamihapa noatiwi ikoniwi nusehohiyihyauni ami isihya usaamihapa wapaapi apipaahi akiwisamasihhi nusehohiyihyauni ami waapoho naharitaatiwiho nasisoaari nanawaasohiyihyauni ami maipihaiwa kaundiwi isihyai sisipihundiwihiyauni ami isihyaamihapa kahapaamapipaapi saisatoyai tipi itihundiwi nesi yanihimapihyauni siya saiwa siyohiyihya Autaahaatiho komi isihyaisi iwinjaati bimitandihapihi yamihapataatihi windi namindaitaapo. ¹¹ Iyataati ami sami usaatisangi aimi katohiwimaiwa kaiwi bimambiwihiyaate. Saiwa kaiwi bimambiwihiyaati Autaahaatihoai nyami maipihaiwa kiyohiwaiwa nepinyamape undauhi ko bausati nesamasihyaate. Iyati Autaahaatiho ami windi mandi kasisataise. Isihya kimiya titihi nisihyaimatiwi ainahiyihya nisihaiwaahihhi kaitaatiwe tati nasamihanataise. Iyati ami ko windi mandi kasisataise. Isihya kimiya nisihyaimatitaatiwe tati nasamaati komi deti utaatototesamataise. Autaahaatiho siyati sangi kasindi mandu apaapimahe, Awaisiho Jisasi Kiraisiho nyangi japihi nyahi maipihaiwa kiyohiwaiwaatihapi nanyamaitandi napwindihandahe. Iyataati ami Autaahaatiho Komi Itipihho nanyinyataise nyami maipihaiwa nenyamati nyatatamanati anditinyaiwitando.

Nyami Ambipati Autaahaatiho Murimo Nasati Bimitandi Ajaaje

¹² Ami nahataapa nini nanihaindi nga kaitandihapa ahondaise. Ye, sandihi akite. Akitindaahandi kandi kapa nahataapa ningi windi maanitatanataise. Nini nanihaindi nga nahataapa kiyataahandi kandi ami nini kapaisi nehi iwinjasanihi kapa ningi neti nipatisati namaanisapuwitaise. ¹³ Iyataati ami usa satawaatopo, nandapa nanihohipipa sapa gwisahaatihi nutandihape. Iyonihi ami gwisaha sa nandapaapi jatitandihare tiwi katawaatopo. Sandihi akite. Autaahaatiho gwisahaapi nandapa kiyataise. Isi ipotihura Autaahaatiho gwisahauni nandapauni nemaitaise. Iyataati ami sami ambipatapi nandapa nanihotihandamatiyahandisi asihya kihiyaisaati ambipati timaamaititaano tiwi kiyawaawaahi sandi apipaahi asirete. Ambipati sati Awaisiho komihapa kaitandihati komihati ahusondaise. Aihi ami Awaisiho komi otipipatapi nyami ambipati jatataati kati wapa nausetitimbipa nunyati itatamanataise. ¹⁴ Awaisiho nyami ambipati jatataise ami Autaahaatiho Awaisiho Jisaasihoai japihi ahowimasihhi nepasi ami komi watipihanda Awaisihoai ahowimasipatamatiyati nyangisangi japihi ahonyimahonihi ami nyahi japihi nepaito. ¹⁵ Sami

usaati kihiyaisaati ambipati timaamaititahaahandapi itihapipa ahotahandimahe owe tiwihyaate. Isi nini sandi katitaano. Nyahi Kiraisihoaisaati maasi timaamaitihaawaahi komihatuni ami nyamihatuni noaipati aimi nehi naasaipihindaise. Isi sandapi windi gimaasunyainjo. Gisunyaatitandiha sandi katitaano. Nini Kiraisihoaisati aimi timaamaititi maasi bimambitihonini konini nundi asihya kihiyaisati ambipati timaamaititandi sandi apipaahi gaametisi windi saindi kamaito. ¹⁶Iyataati ami sahi asihya kihiyaisaati ambipati timaamaititahaawi itihapipa ahotahandimahe. Owetise. Nge tiwi gwinyaawaawaahi nini sandi kasatitaato. utaaho wo noti apopaati waati daihiraapihaatisati komi ambipati timaamaitataataahi komihati kaatamihati ambipati noaipati naasaipihindaise. Isi sandapi gimaasunyainjo? Iyataati ami Autaahaatihomi utipihooatitahi wapitahi satati ahondaise:

“Wohouni apopaatuni ambipati timaamaitamaami sandaahi ambipati noaipati nehi naasaipihindaise,” *Wuwanihapitahi 2:24* tati ahotise.

¹⁷Iyataati ami utaaho wo Awaisiho Kiraisihoaisati maasi timaamaitataataahi koaisati maariho omanjitititahi noaipati naasohi naasaahindaise. ¹⁸Aihi ami nini wa piwiha sandi kasatitaato. Utaaho wo maipihaiwa wiwa kaiwaiwa ambipatami nehahaatapihaiwaasi komi ambipatisi neti namusopisasitaise. O ami komi ambipati asihya kihiyaisati timaamaitataataahi sandaahi komi ambipati sawaho neti nosasinataise. ¹⁹Sahi ninaasiyaatami ambipati sati Autaahaatihomi Itipihohi nasati bimitandihaani apanamatiyahatisi sandapi sangisi biyati gimaasunyainjo? Autaahaatitoho komi Itipihohi natausaasihi nasati samihatitahi bindataise. Ahihi ami sahi sangi yandihyaatimahe. Owetise. Sahi tititahi komihyaate. ²⁰Sandi katotimandi apaapimaato. Autaahaatitoho Kiraisihoai natausaasihi nasati nyahi maipihaiwa kiyohiwaiwa nenyamaitandi komi ambipati nunyanati napotaise. Isi kinyi ambipati kimikataahi kaimbi Autaahaatitoho mepi autaahepumaitaapitahate.

Namaatinohitihandapi Korindihya Nasenohitihandapi Poriho Kaundataase

7 ¹Sahi nisapi utipihohi jipatipaiwi nanisenihohiwaiwaapi wani wihooanjiha kasatitandiyo. Isi wani namasati jiji satiwi giwunyaahohiyihya usihya asihya namaatindaatiwi gaaro e sandi maipo ndiwi nanisenihohitihandapi wihooanjiha kimaasi sandi kasatitaano. Utaaho wo apopaati neti wimirati nehi bindataataahi sanditahi tititahi. ²Iyataahandi kandi ami ambipati kihiyaisawi timaamaitotihandi sami aunahipata yahandi ahondaise. Ahondaisi utaaho woai nunjenahandi noaipahonitahi wiwa ko neti kihiyaisati ambipati timaamaititaise. Isi sahi nahatiyaati ninaasonjiti apopaati tititahi

kinyapihaati yiyandihi nepi wirapise. Iyataati ami asihyaatangisangi nahatiyaati ninaasaanjihi woho titihi kinyapihoai yiyandihi namaatiwise. ³Aimi namaatiniwi bimohiyihyaatapihaare. Woho aimi namaatisihomi ambipati komi apwaataatamihate. Isi ko apwaataati owe undati komi ambipati neti namisapuwane. Ami apopaati aimi namaatihaatami ambipati kaatami warihomihate. Isi ami kaati warihoai owe undati kaatami ambipati neti namisapuwane. Kanjanyuri windi samaimi ambipati naminimi timaamaitimise. ⁴Apopaani namaatipihaanyami ambipati kinyi kiwihomihatisi ami ko jatataise. Isi apwaataanji nisi ambipati niwihaanini jatataayo mundime. Ami warihonyi ambipati kinyi kiwaamaatamihatisi kaati jatataise. Isi kinyi kaati samunde, nini nisi ambipati niwahonini jatataayo munde. ⁵Isi ambipati timaamaititaatimi kiwiho nangisehonaahi apwaataanji kiwihoai owe munde. Iyonihi ami kiwaamaati warihongi nangisehonaahi warihonji kiwaamaati owe mundime. Iyataati ami sainjanyuraahi kaniwi maariho naasohitanihi wonji nehi masihonjapi sasanyuraasami ambipati windi timaamaamaitimi namihaaposami Autaahaatihoai sisimi piwaundimi gaapunditaatimi gwinyaamaamaahi ami windi ambipati naminimi timaamaamaitimise. Nehi yiyandihi bindamaami gaapundimi Autaahaatihoai piwaundimi owemaposami ami keti nami japihi sainjanyuraasami ambipati timaamaitimise. Saimi ambipati maaritirihireti baimi jatamaami ambipati naminimi timaamaitimise, ami wiwa nehi otihini binyaihi Bwaasirihiri jasonatosati kihiyaisawi ambipati timaamaitotihandi kaito tati nasisendaiso. ⁶Sahi nanisehauhi kima piwima aimi kasatohima sahi japepihiritaatiwihapa winihapipa kasatataamaato. Owetise. Nehi sahi gwinyaitaatiwihaiwa kasatataato. ⁷Nini saindi gwinyaati maaritataayo. Ami isihya nahatiya, usihya (asihya) Kiraisihopi giwunyaahohiyihya nisataiwi windi namaamaatiwi nehi wenjihya bimitaatiwi sandi gaare. Iyataahandi kandi ami Autaahaatiho isihya nehi ninaasiyai namaatitaatiwihiretapuni ami namaamaatitaatiwihiretapi anditiwiwati watipihandi yiyandihi nunyataise. Wo apopaati neti wiraitandi anditiwiwati ami neti wimiraitandi anditiwiwataise.

⁸Iyataati ami sami piwiha wa satiwi usihya asihyai nepi wimirapi nehi utaari bimohiyihyaapuni ami asihya osinihiyaapuni kiya asihyai nepi wirasaihi ami osinihiya usihya usai namaatitaatiwo ndiwi kandotihaapi wihoaanjiha kimaasi kasatitaano. Usihyaati asihya owehiyaatuni ami asihyaati osinihiyaatuni nisataiwi siwaasihya siwoya owehiyaati nehi bindawaawaahi gaare. ⁹Iyataahandi kandi sahi nehi namaamaatiniwi bimisaihi sami ambipati timaamaititaatiwihandapi sami ambipati gosindihandi sahi baiwi ipihatiwi minjatitaawi gaasi namaatiniwise kiyaatinihini gosatoaatitaiso.

¹⁰Iyataati ami sami sandiwi utaahe komi apwaataati nga namaitaiso dotihaapi wihoanjiha kimaare. Usihiyaati asihyaati aimi namaatinwihyaatangi apipaahi watipindi sandi kasatataato. Jisaasihomi winihapi katirihiri kireti titihi japepihiriti. Kinyi apopaaji kinyi kiwihoaisi namasisi windi namumwe, owe. ¹¹Iyataati ami wapa wipimatonihiki kandapi apopaaji kiwihoaisi namasisi nopaapaahi numbwi woai namaamaatipi nehi bimitaape. Iyataati ami kinyi warihonji kinyi kiwaamaatishi namaamape, owetise. O kiwaamaatishi namapaapaahi waati nepi wimirapi nehi bimitaape. O ami mainjanyuraahi sati maipihatiyono timi gwinyaamaamaahi maariho naasohitanihi japihi nami ambipati timaamaitimi bimitaatime. ¹²Iyataati ami sami piwiha sandiwi warihoaaisangi ami apwaataatisangi Kiraisihopi gimaawunyaahonihiki warihoaaisangi ami apwaataatisangisi kinyi gimaawunyaahini nanimasi numwe undati namaitandi gaaro tiwi nanisenihotihaapi wihoanjiha kimaare. Sahi Kiraisihopi giwunyaapihiyaati ami Kiraisihopi gimaawunyaapihiyaisawi namaatinohiyihyaatangi sandi kasatitaani atiwise. Awaisiho Jisaasiho ningisi piwiha siyahaapi windi kamandisi namati nisi gwinyaahotiha saiwi saiwi kaiwise ndi kasatitaano. Aimi namaatinimosami kinyi warihonji Kiraisihopi windi gimaawunyaahaati kaatisami gaasi maasi bimaamise kinyi gimaawunyaahini nanimasi numwe undipi natipimusoase. ¹³Iyonihiki ami apwaataanjihiki Kiraisihopi giwunyaasamihi ami kinyi kiwiho gimaawunyaaho koaisami gaasi maasi bimaamise kinyi windi Kiraisihopi gimaawunyaapihonjisi nanimasisi numwe undipi nemaamape. ¹⁴Iyataati nini sandi katotimandi apaapimaato, warihohi Kiraisihopi windi gimaawunyaahotihiki ami apwaataati Kiraisihopi giwunyaahaatitihiki kasanyurami ambipati aimi timaamaitihiki kasanyurami ambipati noaipati nehi naasapihitihiki Autaahaatihohi mainjanyurisi iwinjatataise. Wiwa sahi saiwi kamaisaihi sami simwaaya simaasihiya Autaahaatihohi akitihopi gimaawunyaapihiyaami mwaaya maatiyaamatetahyaatitaiso. O ami wanihi Autaahaatihohi sami simwaaya simaasihiyaisi komi isihya Kiraisihopi giwunyaahohiyihya komi manyinyaisati ahoyati iwinjaati bindataise. ¹⁵Iyataati ami wa piwiha kima sandi kasatitandiyo. Wohoaaisangi ami apopaatisangi Autaahaatihopi gimaawunyaaho gimaawunyaahaati apwaataati ami warihohi namati noaipasi nutandaahi ami namasi none. Isi ami kinyi giwunyaahingihonji giwunyaahingaamaangi sahisaihaahi namaatingitihandi nasipatipi owemapi natipusoase. Iyataati ami kiwiho ami kiwaamaati nangimahonihisangi ami namaatinjitihandi namaasipatimisangi bimisaihi Autaahaatihohi giwunyaahingihongi ami giwunyaahingaamangi napaisaatisamahonihiki ko gwinyaasirihireti japepihirimi bimitaatimo. ¹⁶Piwiha sandi kasatohima apaapimaato

kinyi apwaataanji Autaahaatihopi giwunyaahingaamaane, kinyi kinyi kiwihoai Autaahaatihomihireti katipunjisamihi Autaahaatihopi ko wiwa giwunyaitaisi ami ko giwunyaitandihandapi kinyi windi monihise. Aimbimi kinyi warihoni Autaahaatihopi giwunyaahingihone, kinyi kinyi kiwaamaati Autaahaatihopi katipunjisamihi ami kaati wiwa Autaahaatihopi giwunyaitaisi kaatami giwunyaitandihandapi windi monihise.

**Autaahaatiho Sapi Kiya Saiwi Setahireti Bimito Tati
Gaatati Nasamaati Nasamihainjirihireti Bimaawise**

¹⁷Ami sahi nahatiyaati nehi ninaasonji ninaasaanji kiya saiwi sireti bimito tati Autaahaatiho namihanati nasanyati nasisirihireti bimaawise. Sandi nini sandito sahi wapa wipaiwi kaiwi wireti binyaihihiyaatangi Autaahaatiho gaatati nasamaahonaahi ami sahi sapa kapa kaiwi siri kireti bimaawise ndaato. Kima piwima Autaahaatihomi isihiya nahatiyai winihunditi kandunjohiha naasika sangi kasatataato. ¹⁸Ami utaaho wo komi ambipatami atitati ahoaapi nemapi namandipasaihiho bimonihikoai Autaahaatiho gaatati numwaahonaahi ami ko jahira neti komi ambipati neti japwimana namaasati namwaasane. Iyataati ami utaaho wo komi ambipati atitati ahoaapi nahomaamandipapiho bimonihikoai Autaahaatiho gaatati numwaahonaahi ami ko komi ambipatami atitati ahoaati namandipatitandi windi gimunyaane. ¹⁹Ami sandi nini apaapimaato. Ami isihiya nepi kiyaami ambipatami atitati ahoaapi namandipatiwuni ami kiya windi nahomaamandipatohiwimaauri sauri Autaahaatihomi ndiheti wapa awaindihandimaahae. Sauri kauri nehiaure. Ami Autaahaatihomi winihapipa atimbimi nepi japepahiripi kaitaapihandi sandihi apipaahi awaindihandi akitihande. ²⁰Isi ami sahi ninaasonji ninaasaanji wapa wipaiwi kaiwi ami wipetahiyaati binyaihi Autaahaatiho gaatati nasamaahonaahi ami ninaasonji ninaasaanji sikaiwi kaiwi ami siketahiyaati bimaawise. ²¹Ami kinyi utaaho womi nehi otipipatihonjimatipi binyamihi Kiraisihopi giwunyaapi komi mwaahonjimatitaapi Autaahaatiho gaata nangimaahonaahi, kinyi kiwahonyapi pihitipi windi gimunyaapwaate. Owe. Iyapaapi kinyi utaaho womi nehi otipipatihonjimatingitihandi namapi nehi gi nehionjimatitaapi daihira wira mmonapaapaahi, ami gaasi sikaimbi kaimbi gi nehionjimate. ²²Iyataati ami utaaho woaisangi nehi otipipatihoematati bimonihikoai Autaahaatiho koaisi gaatati numwaahonihiko nasati Kiraisihoaisati maasi timaamaitataataahi sandihi Awaisihokomi maipihaiwa kaiwaiwa nemwasihiko noaipati maipihaiwa oweho nehioematataise. Isi ami sikiyati utaaho isihiyaami otipipati nehi kamaayati nehi bimonihiko Awaisihogaatati numwaahonaahi ami ko noaipati aimi Kiraisihoaisati timaamaitataise. Timaamaitati aimi noaipati

Kiraisihomi otipipatihoematataise nehi otipipati kaisihomatiyato. ²³Sandi apaapimaato, Autaahaatiho Kiraisihoai natausaasihi nasati nyapi komi ambipati nunyanati naanjihandi netaise nyami maipihaiwa nenyama japihi nanyamaitando. Isi sahi isihiya yapipatambihyaami piwiha atiwiwi nehi otipipati kawisohipatamataimbi otipipati kamaawime. owetise. ²⁴Nisi naisihiyaate. Sahi siketahiyaati ami saiwihiyaati bimauhi Autaahaatiho gaataati komihiyaatimatitaatiwi nasamaahiyaatisi ami siketahiyaati sikaiwi Autaahaatihoaisawi maasi bimaawise.

Isihiya Naamaatiniwihiyai Poriho Piwiha Kaundataase

²⁵Sahi sandiwi usihiya asihiya namaamaatiniwihiyai Autaahaatiho gaata numwaasawihya kiyaanihi windi namaamaatinwi bimitaatiwo tiwi nanisenihotihaapi wihoanjiha kima kasatitandiyao. Sami piwiha satiwi nanisenihotihaapi gwinyaati kasatitandiha Awaisiho wa namaanimisi ami nisi gwinyaahotiha sahi atiwi kaitaatiwi kasatitaano. Sandi apaapimaato Awaisiho ningisi gaahati kanisati ningisatitahoninisi sahi nisi piwiha kasatisanihi akaahe tiwi gwinyaapise. ²⁶Iyataati ami wani kimura nyahi giwunyaahohiyihyaanamiheti naanjihaiwa waati taati nanyoaipataahuraasi namaamaatinwi nehi bimohiyihyaati ami sikaiwi namaamaatinwi bindawaawaahi gaare. ²⁷Iyataati ami kinyi apopaati waati aimi nepi wirapi bindapaapaahi ami wirapi bilingaamaatisi namaamape, owetise. Iyataati ami wonji apopaati nepi wimirapi nehi bimingihonji apopaatapi mindaapi nehi wenjihonji bisote. ²⁸Iyataati ami kinyi wohonji apopaati waati nepi wirapaapaahi ami sandi maipihati kiyapaamaise, owetise. Iyataati ami apopaati waati apwaimaamaati woaisi namaatataataahi ami sandi maipihati kiyataamaise, owetise. Iyataahandi kandi namaatinohiyihyaamiheti naanjihaiwa pihitati nusoapatuni ami otipipati pihitiwi dipipataasini kiyawaatitaapo. Saitauhi kandapi nini namaamaatinwi nehi wenji bimaawise ndaato.

²⁹Nisi naisihiyaate. Nini sandiha kasatitaato. Ipihomi asisiha nyahi taawa bimaami niyohurimura windi otihi ahimotitaise, keti owetitaise. Isi wani kimuraapi namasawi ipihomi asisimonya yahonya ahotisonyimonyeti usihiya asihiyai nepi wirapihiya wanapi asihiyai nepi wimirapi owehiyaamataiwi bimaawise. Saiwi Autaahaatihoai jihemapi sahi namaatohitihandisawi nahataapa kiyohipipa kaiwise kapa neti sangi windi namaasisapuwitando. ³⁰Iyataati isihiya taawi gohiyihya kiya windi gomaatawaahiyaamataiwi bimaawise. Ami isihiya taawi maaritohiyihya kiya windi maarimitawaahiyaamataiwi bimaawise. Ami isihiya wapa nawihopuni ami nawihouni nunyawu nehohiyihya kiya wapa ikipipa ahimotati owehiyaamataiwi bimaawise. ³¹Iyataati isihiya maapi yapimbatambihapa nesi wapa kapaara kiyohiyihya ami

kapa nahataapa gaahapa nepi kamaayawaahiyaamataiwi bimaawise, ami kapa ahotihi mmonihohipimba kapa wani ahotirimireti windi ahimotati nehi masihonjitanihi keti owetitandihapaaso. ³²Sahi saiwaapi pihitiwi nitaniwi waati gimunyaapi nehi nanihaiwi bimitaatiwi sapi gwinyaataati nini sangi sandi kasatataato. Utaaho wo namaamaataho nehi Awaisihomi otipipatapi maariho noamataise, Awaisihoai ko neti maariho wiwihonihi ami Awaisiho maarititandihireti jatetinjato. ³³Iyataati ami utaaho apopaatisahohi otipipati nehi mambihaiwaapaahiyataise, ami komi apwaataati maarititandihireti jatetinjato. ³⁴Iyati ko yatiwapi gwinyaitande: Komi apwaataati maarititandihapa kaitanduni ami Awaisiho maarititandihapa kaitanduno. Iyataati asihiya apwainyihya apipaahi windi namaamaatiwihyauni ami asihiya usauni nehi Awaisihomihaiwaapaahihi gwinyamapi kopi nuwi napiwaiwi waati munanawi kiyawaayopo. Aiwi asihyauni ami apwainyihya namaamaatiwihya kiya kiyaami ambipati maariho nahandi nehi Awaisihoaisaahihi nunyawawi nunyaniwi nehi komi otipipatapaahiyawaayopo. Iyataati ami apopaati warihoaisihaatihi nehi maapi yapipatambihaiwaapaahiyataise, wariho maarititandihireti kaati jatetinjato. ³⁵Nini kimandi taati kasatotimandi nini sangi neti nasisapuwitandi kandaamaato, nini sangi jatatamanitandi kandaato. Ami sahi titihireti bindawaawi, wapa wapaapi windi gimunyaapi, Awaisihoai sahi sawanaati nahatiya sami maariho ambipati nahandi nunyawimaitaatiwi nini sapi gwinyaati ami maaritataatito.

³⁶Iyataati utaaho woho wo kopi apopaati apwaimaamaati waati nurimahanohaamaati windi keti wimirahonihi ami kaati kaatami namaatitandihura kinaungwiha aimi onehitonihi bimonihi, ami woho kaataapi siyati, nini kaati keti wimirahohitimandi maipihati kiyono tati gwinyaataataahi, ami ko komi maarihoatihi gwinyaati maaritirihireti kiyane. Iyati ko kaati gaasi neti wirane. Ami ko apopaati kopi katiwi nurimahanohaamaati neti wirati kapuri namaatamaamaahi ami sandihi gaare. Ko maipihati kiyati ami maipihandi kiyataamaise. Owetise. ³⁷Iyataati ami ko komi amithetapuni ami maarihoatihipi siyati ami nini windi namaamaatitaano tati gwinyaati, ami ko komi ambipati apopaatisa timaamaititandihandapi gowindihandi biyati neti yatihii ipatisati jatataati, ami ko kopi apopaati nurimahanohaamaati neti wiraitandi timetindihandi namati, kaati neti windi wimirataataahi, ami sandihi titihii gaahati kiyataise. ³⁸Isi ami utaaho apopaati kopi nurimahanohaamaati neti wiraso gaahati kiyataise. Iyataahandi kandi ami utaaho apopaati neti wimiraso apipaahi gaahati kiyataisi ko titihii nga bimitaise.

³⁹Ami apopaati kaatami warihoaisa kaatinihi bimone, kaatami wariho namaapotu konihii asoho bimoniuro. Ami kaatami wariho naponaaahi

ami nehi kaati nanihiyati kaatami gwinyaati maaritisihoai namaatane. Iyataahandi kandi ami kaati utaaho Awaisiho Jisasi Kiraisihopi gwunyaahohiyihyaamihoai namaatane. ⁴⁰Iyataati ami nini niwahonini saindi gwinyaataayo. Apopaati osinaati windi jahira namaamaatati nehi bindataataahi ami kaati nga maaritati biyati bimitaise ndo. Nini niwahonini saindunyaataahandi kandi nisangi Autaahaatihomi Itipihoni nisiheti bimisihoni ningi neti ginunyaasihoni sa katohima kandaato.

**Poriho Kohasipihoni Nandapa Autaahaatihoni Jaipitahoi
Nunyawihapa Namaaniwise Undataase**

8 ¹Sahi piwiha kohasipihoni autaahaatihoni jaiwitahoi tipi tihwi nunyawihapa Kiraisihopi gwunyaahohiyihya nawiho nunyawipi nepi nandaatiwo tiwi nasenihohihaapi wihoanjiha kimaasi kasatitaano. Sahi satawaatopo, nyahi Autaahaatihopi gwunyaawaahiyaane tawaatopo. Sandihi titihe. Nyahi Autaahaatihopi gwunyaawaahiyaanini ami Autaahaatihopi gimaawunyaahohiyihyaami gwinyaahohiwaiwai nusatipihawa gwinyaawaahiyaanine. Iyataahandi kandi ami wo nini nisaahoya gwunyaahohiyihyai nusatipihati nini waati gwunyaatihoninisi nisiha atinitaatiwe tati sawaho namimaatane. Iyataati ami gwunyaasihoni ami gimaawunyaahohiyihyaaisi maariho nunyati anditiwawati Autaahaatihopi gwunyaatitandi biyati kaundataataahi ami sandihi apipaahi gaahate. ²Iyataati ami Autaahaatihopi gwunyaasihoni satati ninihi aimi nahataapaahi ginunyaataahonine tisiho so aimi nahataapaapi ginunyainje tati katimbipa kapaapi windi gimaawunyaataaho nehi kandaase. ³Iyataati ami piwiha wihoanjiha siyate. Gwunyaasihoni Autaahaatihoi maariho biyati nunyati ami Autaahaatihopi gwunyaahohiyihyaaisi gaahati kawisati Autaahaatihomihiretapi biyati kaundisiho sopi Autaahaatihoni apipaahi gaahati kiyahoni gaahoe tati usonataise.

⁴Autaahaatihoni jaiwitahoi kohasipihoni nunyawihapa Autaahaatihopi gwunyaahohiyihya nandaawo ndiwi nanisenihotihahaapi sandi nisiha kasatitaato. Autaahaatihoni jaiwitahoni so akitihomahe. Owetise. Nehihapaare. Nehi siwipati isihya kaiwi ahiyawihahaapaaso. O Autaahaatihoni apipaahi akitihoni nehi naasohihi bindataise taahihoni owetise taati aimi gwinyaawaahiyaane. ⁵Iyataahandi kandi isihya kahapaamapipaapi autaahaatihoni tiwi ambihitawaatopo. Aiwi ami kahapaamapipaapi nyami awaisihoni tiwi katawaatopo. Aiwi kiya autaahaatihoni taahihoni yamihapataatihoni bindataise, ami yapipataapihi autaahaatihoni taahihoni bindataise tiwi kapa jaiwitahapaapi maaritihoni mepi autahemawaayopo. ⁶Iyataati ami nyahihoni Apihoni Autaahaatihoni nehi naasohihe. Ko nyami Apihoni ami ko nehi naasohi nahataapa kahapaamapipa kiyati ami nyahi isihyaanangisangi kiyati ahinyisataise

komihapa kawisaati bimitihaawo. Iyataati ami nahataapa osamati ahoyati jatisiho naasohi Awaisiho Jisasi Kiraisihore. Komihetapi kahapaamapipa nahataapa noaipati ahondaise. Iyataati ami komihetapi nyahi noaipawaati nga watipitaati komi otipipati kiyaati bimitihaawe.

⁷Iyataahandi kandi isihiya wani giwunyaahohiyihiya autahaatiho so jaiwitahoe tiwi windi gimunyaahopo. Owetise. Gimaawunyaatahiyaasi jihura ko jaiwitaahomihireti japepihiriwi kohasipihoko ko jaiwitahoi tipi tihwi nunyohipipaapi autahaatiho akitihoi nunyawihapaasi nandihaawo tiwi gwinyaapi nanawaayopo. Sandi kiyaami maariho windi gimaawunyaatati namusesipatahiyaasi autahaatiho jaiwitahoi nandapa kohasipihoko tihwi nunyawihapa nanawaayopo. Saiwi naniwhiyaasi kiyaami maariho ipotihura neti nunjati giwunyaati sati maipihati kiyawaayopo undati nunjihi gwinyaawaayopo. ⁸Nandapa sapaaraahi nyangisi nanyamaasisi noti Autahaatihomi deti utatototi ahimaanyisataise koaisaati maasi bimitihaawo. Iyataati ami nandapa kapa nyahi namaanihaawi Autahaatihomi ndiheti noaipawaati maipihandisahiyaaninimetito. Nandapa kapa nanihaawisangi kapa neti nyangi windi manyitatamase. ⁹Nini watipindi sahi aimi watipitiwi andititiwi Autahaatihopi giwunyaahohiyihiyaati jaawo satataato. Sahi wiwa nandapa autahaatiho jaiwitihoi nipi akohoemapihoaisi nunyawihapa nandaawo. Nainjaihi isihiya wani namasawi giwunyaahohiyihiya sangisi jasonawa sahi kapa nainjaihi ami kiyaami maariho owe sandi maipihandiso undonihandi ami kiyaisangisi nipi kapa nandapa nandaawo. Nanawaawi ami maipihandi kaitaawo.

¹⁰Sandi nini katotima apaapimaato. Kinyi autahaatiho jaiwitahoe titihi akohomahe. O ami Autahaatiho akoho nehi naasohihe tipi gwinyaapihoni konji numbwi ko jaiwitaahomi ananji nandaapi nandapa kapa nandaapi bimisamihi utaaho wo komi gwinyaasitihandi windi watipimetahoe nandapa sapa gaahapaametisi namandaano tati bimainjahoe ko kinyi nainjamihiyataati ami kapa nandapa neti nandaise. ¹¹Kinyi saimbi nandapa titihi mmonipi autahaatiho jaiwitaahomihapa kopi gwinyaahingitihanda kapa nanihingitihandi sandihi titihe. Ami ko windi biyati gimaawunyaataho maipihandaatihu timahiyati nosasindaiso ami sikoai maawi japihi numwaitandi Kiraisiho napwisihoso. ¹²Naisihiya Jisaasihopi apipaahi maipihonji giwunyaahohiyihiyaami maariho gwisiha windi biyati gimaawunyaatati namausesipatahiyaasi sami kiyohitihandaahi nipi kiyaisi maipihandaatihemawaawaahi ami Jisaasihoi maawi ahoyawi maipihati kawisawaayopo. ¹³Iyataati ami nisi naisoho giwunyaasiho nandapa sapa autahaatiho akohometahoe jaiwitahoi nunyawihapaasi namando tati gwinyaasipipa nini windi namando nainjanihu ami nisi naisoho ningisi nisonataati ami nanati maipihandaatihu nutaiso.

Poriho Komi Otipipati Kaindahandapi Nawiho Namese

9 ¹ Ningisi usa namaanimbipuwitaapo owetise. Nisi gwinyaati maaritohipipa kaindi nandapa waapoho nando. Kiraisiho komi piwiha awusaitandi natanoaasihi napitihonine, nehi ningisi napitihoninimahe. Siyati natanoaasihi nasonihandi kandi sahi satawaatopo, Kiraisiho komi otipipatapi natausaasihihomahe tawaatopo. Iyataati ami ninihi Kiraisihoai titihi nisi ndihaara usonitihonine. Usonitihoninitihandi kandi ami sahi nisapi ko Kiraaisihoai mausonahoe tawaatopo. Kiraisiho sapi natanoaasihi napiti piwiha ausaati kasatonih sahi Kiraisihopi giwunyaawaayopo. ² Iyataati ami isihiya usaahi nisapi ko Kiraisihomi otipipatihomahe tiwi gwinyaasaihahandi kandi sahihi nisapi akitinihi Poriho Kiraisihomi otipipatihoe tiwi gwinyaapise. Iyataati ami nini Awaisihopi kasatonih kopi giwunyaahohitihandaahi nasisataise nisapi Awaisihomi otipipatihoe tato.

³ Aihhi ami wani sahi nisapi satawaatopo. Komi otipipati kaipatapi sasaahoyaamatiyati nawiho namese tiwi katauhi wihoaanjha sandi kasatitandiyo. ⁴ Awaisiho komi otipipatapi natanyoaasihi otipipati kiyaaati daayihaawi nandapa waapoho nanyamitaawi otipipati kiyohitihandapo taati jatitihawwi sandi gaaro? ⁵ Iyataati ami nyahi nyami naisihiya asihiya Awaisihopi giwunyaahohiyihiyai newa wiraati ami kiyaisaati maasi nowa nasaaya daitihaawi sandi gaaro? Ami nyahi Awaisihomi otipipatihiya Pitaahouni ami Awaisiho Jisaasihomi saingoyauni kiyohipatamatiyaati windi kamaito owetise. ⁶ Ninuni ami Banapaasihouni nawiho yawahuraanyapihopi otipipati kiyohipati namihaahosiha Awaisihomihatihihhi kawitihawwi ami sandi gaaro sahi nawiho nanyamitaatiwo? ⁷ Kima gwinyaitaatiwiha katitandiyo. Tingaatihaisaho pwisipi yaipati kaisiho komi otipipati kaindahandapi nawiho nametaamaise. Owetise, netaise. Iyataati ami utaaho wainihandi yamasih ami wainihandi nandati namaanataamaise. Owetise. Nandati nanataise. Ami maasapiho sipisipih yamasih maasapihomi amwitihiri nammoti namaanataamaise. Owetise, ammwitihiri nammoti nanataise.

⁸ Iyataati kima piwiha gwinyaitaatiwiha aimi katotima ninihihhi gwinyaatiha kandaamaato, owetise. Autaahaatihomi winihapipa Mosesihoai numwimbipaatihapisangisi kimi kiyaha kamaanyatataaso? Owe, kanyatataase. ⁹ Autaahaatihomi winihapipa numwihi Mosesiho ahaimbipa siyahapaapito. Maasapiho kauho kinyi koniho witihandami pasaaha komi itipata itipati ikisimwitandi konihoasini wiraposapaahura komi maahomwaaaji namimbipupe, koniho neti namando tipo owetise tati jipatipindataise. Autaahaatiho sata katindimandi nehi kauhopaahihhi gwinyaataati kandaaso? Owetise, isihiyaanapimaawi kandaase. ¹⁰ Autaahaatiho nyapi gimaanyunyaataiso? Owetise, nyapi gwinyaataati sa piwiha nyapiha

kandaase. Sandi apaapimaato siyahaiwa ahondaise. Utaaho yapipati yapasati ikisimwisiho nandapa niyaamati kapa nawati akuraahiyonihi nandande tati gwinyaati kiyataise. Iyataati ami utaaho wo konihomi pasaaha ikisimwoti tiwihaasiho nandandihapaaso tati gwinyaati kiyataise. ¹¹Iyataati ami nyahi Autaahaatihomi otipipatihyaanini sikiyaahiyaanisi maarihopi nandapa samihatihimahaayo. Isi sahi nandapa ambipatapihapa nyangisi anditinyaiwitandihapa nanyamitaatiwihandapi titihimetihitowo? ¹²Iyataati ami otipipatihya usa ambipatapihapa nanyamito tiwi jainjasaihi kapa nunyawaawaahi ami nyapi kiya ambipatapihapa naitaatiwe tiwi waati gwinyaawaayopo. Iyataahandi kandi ambipatapihapa sahi nanyamisaihi nga naitihaahandi kandi windi kapa nameho. Namehonihi sahi katauhihandi kandi kapaisi ipihatisawaamawa otipipati nehihati nawiho namewaahati kiyahaayo. Nawiho namewaati kiyohitimandi apaapimaawe, nyahi piwiha ausaawaati kasatisaihi sahi otipipati kiyohitihandapi nawiho numwitihahaowo tiwi gwinyaawaawi Autaahaatihomi piwiha baiwi atihomitaue. ¹³Iyataati ami isihya Autaahaatihomi ajaani otipipati kiyohiyihya nandapa katihya isihya nesaiwi Autaahaatihoi nunyohipipa kiya nepi nanawaayopo. Aihya ami isihya Autaahaatihopi nandapa tihya waamaidumahohipihya kiyohiyihya ami nandapa kapihya tihya waamaidumwahohipihyaami nepi nanawaayopo. Isi kiya saiwi kiyohitihandapi sangisi gimaasunyainjo? ¹⁴Aihya ami Awaisihya sikireti anditititi watipititi kandaase, isihya piwiha anusoahohiyihyai kahapaamapipa nunyawise, kiya nepi naniwi bindawa isihyai piwiha katiwunjitaatiwo ndaase.

¹⁵Awaisihya sata katipati kati kaiwi usaahi nawiho nehauhahandi kandi ninihya nawiho windi nameho. Aihya ami wanisangisi sahi wapa ningisi nanimitaatiwihapaapi jipatipiyataamaayo. Owetise. Sandi katotimandi apaapimaato. Nini nawiho nametaati janimahonihi napotaataahi ami sandihya gaare wiwa nisi otipipati nawiho owehati kaitandi maaritotihandi namaitandi oweso. ¹⁶Nini Autaahaatihomi piwiha awusoataati nini gaahati kaindi awusoataayono ndi niwahonini naimaatindandimaawe, owetise. Sati otipiti Awaisihomihati kawitandi nanimihahatiso. O ami nini Awaisihomi otipipati baindi kamaawisanaahi Awaisihya itihinditaiso. ¹⁷Isi kimati otipimbati niwahoninisi gwinyaahohitihandaahi kiyataamaayoni nawiho windi namaito. Sandi apaapimaato Awaisihomihati otipipati nanimihahati nini kawisataayono. ¹⁸Nawiho maahiwo napitetaho naitande? Nawiho nametihati otipipati kiyataati maaritotihandi sikandi nawihomatiyahandi ketaayono. Isi nisi otipipati kiyohitihandapi nawiho isihya nanimitaawo ndi windi minjatito.

Porihya Isihya Taahiyihyaami Otipipatihore

¹⁹Isihya usa ningisi ninjatawa nawiho nisi otipipatipihya naninyaihi naitandihoninimaawe. Nini nawiho nametihonine. Iyataahandi kandi

isihya taahiyihyaapi nawiho nametihati kaitande. Kaisanihi sami usaati Kiraisihoenda napitaatiwo. ²⁰Iyataati ami nini Judaahiyaisati bindataahura ami kiyaami kaiwi bimohipatamataindi naasaipiti kati kaindi bindataayo. Saindi kiyohitimandi apaapimahe nini piwiha Autaahaatihomiha kaundisanihi baiwi atiwi nepi giwunyaitaatiwe. Iyataati ami nini Kiraisihoaisati timaamaititihoninisi Mosesihomi winihapipa ningi ninjataamaise. Maaninjatihihandi kandi winihapipaami otihatihimohiyihyaami ndiheti winihapipa japepihiritihonisamataindi bindataayo. Saindi kiyohitimandi apaapimahe, piwiha nini Autaahaatihomi kaundisanihi baiwi atiwi nepi Kiraisihopi giwunyaitaatiwe. ²¹Aindi ami naasi kati kaindi Judaahiyaami dawaapihi bimohiyihya Mosesihomi winihapipa atihomiwihiyaisati bindataahura winihapipa kapa namepi atihomiwihyaamataindihonini bindataayo. Saindi kiyohitimandi sandi kiya piwiha kaundisanihi atiwi Kiraisihopi giwunyaitaatiwe. Sandi Autaahaatihomi winihapipa minjapepihiro daamaato. Owetise. Kiraisihomi winihapipa baindi japepihirataayo. ²²Aindi ami nini nundi isihya maipihonji Autaahaatihopi giwunyaapihiyaisati maasi bindataati ami maipihonji giwunyaahohiyihyaami kiyohirihireti kaindi bipi piwiha kandunjataayo kiya maipihonji giwunyaahohiyihya nisi piwiha atiwi nepi Autaahaatichoenda napitaatiwo. Isihya nahatiyaisi saindi kawisataayo kiyaami usa Kiraisihoenda napitaatiwo. ²³Nini otipipati kiyataayo isihya nahataapihiya Piwiha Gaaha Kiraisihopiha atitaatiwo. Saindi anditindi kiyohitimandi ninuni ami kiya kopi giwunyaahohiyihyauni ipotihura Autaahaaticho apipaahi gaahapa nanyamitandi katimbipa nahatiyaanini maasi naitihaahandapo.

²⁴Sahi aimi gwinyaapi ami gisunyaatahiyaate. Isihya ipipa (baariho) yandipihoaaisangi ami ipipa isihya naupwasi nihitohitihandisangi nehihandi isiwi nihitawaamaayopo. Kiya isiwi nihitohiyihyaami usa jihimatiwi usai nusatipihaapi naiwi noaipaitaatiwi namihanopipihimohiyihya noaipapi nusatipahohiyihya wapa naitaatiwihapa namihaniwi ahotihimohiyihya isiwi nihitawaayopo. sandihi sahi aimi mmoniwihyaate. Isihya nahatiya isiwi nihitawaahandi kandi nehi naasohi jihimatati niyati noaipaitaatiwi namihanohipipihimohiyihya niyati jihimohiyihya ko naitaatiwi namihanohipipa kapa netaise. Isi sahi Kiraisihopi giwunyaahohiyihyaati Autaahaatihomi isihyaati wani maapi yapimbataapihi bimaami niyohitimandi wapa wapa naitaatiwi isihya ipipa isiwi ami nihitohitihandamatiyahandehimohiyihya giwunyaapise. Awi Autaahaaticho ipotihura yamihapataatihimohiyihya kopi giwunyaahohiyihyai wihoanjihapa gaahapa numwitandi neti timanati ahiwimbipa kiyaisawi maasi nahatiyaati naitaatiwi nga andititihimohiyihya Kiraisiho maaritati nasisati kasatirihireti daiwi bimaawise. ²⁵Iyataati ami utaaho wo ipipa wapa isati ami nihitahi isihya usaisati

tusatipatitandiho komi ambipati neti ipipa isati nihititandihiretemati kapa ko kaitandihapa namihananati kiyati isati ami nihiti noti nasayati neti andititati watipitataise. Ko siyati titihematinjati ipipa noaipahonihi isati nihindaahura ko wapa naitandi usaisati tusatipatimbipa usai nusatipasitihandapi nehonihi isihiya kapa nepi ko usaisi nusatipasitihandapi sapa netaise tiwi isihiya nahatiyaisi nunjawi koai numwitaatiwihandapi ko saiwa kiyataise. Iyataati ko siyati isihiya usaisi nusatipasitihandapi nesipipa nehi isaaha tandipihogaahomi kwitaaho keti kuraanihi awasati namasaatati owetisiho netaise. Ami nyahihi ipotihura nasisoaari Autaahaatiho nyangisi sanyatati sahi nisi apipaahi maarititi ami nisi maariho winitirihireti daiwi bimambiwihiyaate nyatati nyapi ko maarititandihireti isihiya ipipa isiwi nihitiwi tusatipatohiyihyaamatiyahaayo. Ami nyahi siyaati wani kiyohitimandi ipotihura wapa namasaatati windi owemetati kapaanihi ahotitandihapa gaahapa nyangi Autaahaatiho nanyamitendo. ²⁶ Aihii ami sandi kandapi nini nisi andititati napamati watipindi kiyataayo. Ami utaaho wo wapa naitandi mini mini nepemaitati minjati titihi naiwi noaipaitaatiwi namihanohirihiraasini niyati noaipati owemaitandihapihii jaati nihiti naisihomataindo. Iyataati ami utaaho wo woaisami wapa naitaatimi itipata tunnamaami ko itipa nehahaati windi timaamati utaahomiheti timasihomataindi nisi piwiha gwinyaahohiwaiwa otipipati dahopa bimohirihireti bairi jatititi anini bindataayo. ²⁷ Ami apipaahi akititinihi nini nisi ambipati kaitandi gwaitati maahaamatiyati nnaanaatati gwiiwaiwa windi kamaitandi neti daahi ipihatindi naputi nisaputi isiwatataayo. Sandi saindi nisi ambipati nini iwinjatataayo. Nini nisi ambipati katami gwaitirihireti neti winisasati niwatataamaise. Owe. Ami nini saindi nisi ambipati neti wisasati namisapuwataataahi ami isihiya usaisi Kiraisihoai atiwiiwi niwipinjawise unditi kaundataahandi kandi Autaahaatiho nini niwahonihi satati kinyi Kiraisihoai windi baimbi atiwimbi namaawipinjise ndati nawisatenimaitaiho.

**Wiwa Nanyisendandihaiwa Nanyisehonihi
Timahiyaanipani Jaawa Daitihaawo**

10 ¹ Nisi naisihyaati nisataiwi Kiraisihopi gwinyaahohiyihyaate, nyami asoya asisa jihura Mosesiho numwaasi napihi yapipati Isipihanda namasi nasohiyihyai nusoaipati kawimatiwaiwaapi sahi windi nanipimaamatiwise. Siya nyami asoya asisa jihura Isiraherihiya kiyaisi Autaahaatiho tuwipati neti numwaasati nuripapihati iwinjaatoti daihira neti nunjihi katihii daimi nasawaayopo. Aiiwi ami Autaahaatiho Durihirihii Amatenihiri neti nasipati wihiiwihooanemasihii otihamwaanji nipiyaipasihii kira ikwaahirihira itipapi nahaitawaayopo. ² Kiya saiwi naasaimbipihimatiwi ahoyaniwi tuwipatami yatihii yamatihii

daiwi napiwi ami Durihiri Amatenihiri nahaitohitimandi Mosesihoai Autaahaatiho namihainjihi ko kiyaami jihu awaisihoematati kiyai numwaasi napihi ami kiya komi piwiha atiwiwi asimwaatitih pinowaayopo tati neti nanyisataise. ³Iyataati ami nehi saurimaahae. Autaahaatiho kiyai wapai maawi kawisataise. Autaahaatiho kiyaisi nandapa wapa numwihi Isiraherihya nahatiya sapa nandipa nanawaayopo. ⁴Aiwi ami Autaahaatiho nehi sawaho komi watipihanda kiyati katih waapoho nawihetapi noaasiho numwihi kiya nahatiya nanawaayopo. Iyataati Autaahaatiho komi watipihanda neti kaihi waapoho nawiha yamatih yapipataatih ahotisihetapi noaasiho ami Autaahaatihomi watipihandi kiyaisatitih ko waapoho kiyaanihi nanawaayopo. Iyataati ami sa nawa ketapi waapoho noaasaahi Kiraisiho sawahore. ⁵Ami saiwa gaahaiwa kiya iwitatamanati kawihihandi kandi siya nyami asoya asisa jihuraahiya maipihaiwa mwitewiwi kiyauhi kandapi Autaahaatiho kiyaapi windi maarimitati nehi apusataise. Sandih akititih nyahi mmonihaayo ami kiya nepi Autaahaathoai apowindihandi nunyohitihanda nehi iwinjasih kapihi yapipati awasipata napwauhi kiyaami ambipati anditati neti nihirinati toriwatati kihapihi kihapihi ahondaise.

⁶Isi ami nyahi saiwa kiyai nusoaipasiwiwa biyaati mmondihawe. Mmonaati yayaati anjinihiyaanini siyahaiwa nyangi namaanyoaipaitandi bipi bitoaitihaawo. Iyaati saiwaapi mmonaati gwinyaahaawi nyangi siyati nanyesipatitande. Nyahi saiwaapi ambipati gwaitati ami nyami maariho noawaama kiyaati kiya kiyohirihireti kati kaitihaawi Autaahaatiho windi apipaahi maarimitise taati gwinyapendihaawe. ⁷Wiwa siyahaiwaapito. Sahi wo autaahaatiho jaipitahopi aunihihiri aunihitiwi koai mepi autaahepumaamapise ami jihura Isiraherihya usa kiyohirihireto. Ami kiya kiyohipapaapi Autaahaatihomi piwihaatihi wapihi satati jipatipindise.

“Kiya Autaahaatihomi isihya autaahaatiho jaipitahopi nandapa awaimbipa tihwi naniwi bindawaawi kopi maaritiwi aunihihiri aunihitiwi nawesiniwi waipwaapi ami usihya dosi asihiyaisi iwiwi kiyaami ambipati timaamaipi maipihaiwa kiyopo,”

Japihi Numwaasiho 32:6

tati jipatipindise.

⁸Isi ami kiyaami usa ambipati timaamaitiwi usihya asihiyaisawi maipihaiwa kiyohipatamatiyaati nyangisangi apipaahi windi kamaayaati namihaawa namaitihaawo. Ami kiya saiwi usihya asihya ambipati naminiwi maipihaiwa kiyohiyihiyai kandapi Autaahaatiho isihya 23,000 kaiwihiya ipi naasoeti kuraanihi kiyaisinihi nemase. ⁹Iyaati ami nyangisangi maipihaiwa pihitaati anditati napawaamawa mwitetaati kiyaati Kiraisihomi maariho mandiha newa niwinaamana koaisi

apowindihandi awaindihandi windi namumwitahaawo. Ami nyami asoya asisa usa kiyohipatamatiyaato. Ami kiya nyami asoya asisa usa saiwi kiyauhi Autaahaatihoai apipaahi apowihi aukwiranihoai neti natausaasihi nasati asisiha nahateweti kihiyai kihiyai ikoti gaamasihimi ami kiya napowo. ¹⁰Iyataati ami sahi Awaisihomi otipipatihiya namihanati ahiwisawihiyaisi manditiwiwi itihimundiwise jihura Mosesiyi Aroniyai nandapa gaahapaapundiwi itihundiwi manditiwisohipatamataiwo. Saiwi itihundiwi manditiwisauhi Awaisiho komi otipipatiho yamihapataatihapihoi natausaasihi nasati kiyaisi tiwamaso.

¹¹Jihura Autaahaatiho Isiraherihiya pohipiwisohiyihiyaisi nemasitimandi sandi nyangisi sahi saisaihaahi nesamaito tati nyangisi nanyisitandi kiyataise. Kiyataati komi isihiyai kaundihi jipatipaiwi ahiyawaayopo nyahi siyahaiwa windi kamaitihaawo. ¹²Isi ami utaaho wo nini Autaahaatihomihireti anditindi bitondaayo tisiho biyati jaato wiwa maipihaiwa kiyataati timihaitaiso. ¹³Iyataati ami wiwa nangisenihaiwa gisaapihi nangoaipahonaahi ami sikiyahaiwa giwunyaahohiyihiya usaapihisangi nusoaipahaiwa nangoaipataise. Isi wiwa nangisenahaiwa noaipahonaahi Autaahaatiho nanihiyati nanipimatahomahe isihiyaisi wiwa yaawati naanijihaiwa nunjenahaiwa waati nusoaipahonaahi nini keti anditiwiti iwinjatito tati katahosi kiyati sahi anditititaatiwi anditisaiwati watipisamahonihi ami kandi nasisesitihandi sahi nga andititiwi ipihatiwimaitaapo.

**Autahaatiho Akohoisuni Ami Itipihoi Maipihapaisuni
Ahoyaati Mepi Autaahemwaumaamaitihaawo**

¹⁴Nisi naisihyaati nisataiwi Kiraisihopi giwunyaahohiyihiyaati nini maariho awaindihandi nasanyohiyihiyaate, autahaatiho jaiwitahoaisi apipaahi windi nepi mepi autahemwaamapi kandinihi namapise. So autahaatiho jaiwitahoai namasisi kaanihi yandihitiwise. ¹⁵Iyataati ami nini sahi piwiha aimi baiwi gwinyaapi nepi nga titihi piwaatiwihiyaatangi kasatataato sahi nahariwihiyaatimahe. Isi kima piwima nini sangisi kasatitandiyohimaapi ko nyangisi akaaha kanyatataaso e nehaha kanyatataaso tiwi nepi tipitapaapi mmoniwi gisunyaatitaise. ¹⁶Wipati kaapiho waapoho wainihandi windaho Jisaasihomi jitipati nuhaamasitihandapi namihanaho so gaapipati ahotahore. Aihi ami nyahi ko nandihaawi Autahaatihoai Kinyi gaahone gaare undaati newaati nanihaayo. Iyataati sandi nyahi Autahaatihoai gaahone gaare undaati newaati nanihohitindi nyangi neti Kiraisihoaisati nyamaamahiwaataise. Aihi Kiraisihomi jitipataahi nyami maipihaiwa nahatewa basati nenyamataise. Iyataati ami nyahi nandapa biretihandi naumbowaati nanihohitimandi Kiraisihomi

ambipati nyapi nasipatindihandapi nyahi namihanaati biretihandi nanihaayo. Sandi siyaati nanihohitimandi sandaahi Kiraisihoaisati neti nyamaamahiwataise. Aihi sandapaahi sahi aimi gwinyaapahiyaate. ¹⁷Nyahi nandapa biretihandi nehi naasaahihi nyahi nahatiyaanini nanihaayo. Nanahaawi nyahi nahatiyaanangi neti nyamaamahiwataise. Iyati ami nyangisi neti Kiraisihoaisati nyamaamahiwataise. Aihi nyahi noaipawaati nehi naasiyaani naasikiyaanimatihaayo.

¹⁸Isiraherihya jihura kiyohitihandapi gwinyaapise. Kiya nandapa tihwi Autaahaatihoai nunyawami dipumanitandi tihohipipa nanawaawi neti Autaahaatihoaisati timaamahiwataise. ¹⁹Iyataati ami wiwa sahi nisapi isihya autaahaatiho jaiwitaho taahihoai nandapa tihwi nunyohipipaami titihi akitinihi akipipa kiyawaayopo ndaase tiwi gwinyaitaawi owe. Aindi ami nini autaahaatiho taahiho jaiwitahopi titihi autaahaatiho akitihoe daamaato. ²⁰Owetise. Nini sandaato isihya nandapa gaarehandi nunyohipipa sapa itipihomaipihapai nunyawaayopo autaahaatiho akitihoai nunyawaamaayopo ndaato. Isi sahi nuwi itipihomaipihapaisawi timaamaititaatiwihandapi ningisi pondise. ²¹Iyataati ami sahi nuwi napiwaiwi naasikura Awaisihomi wipati kaapihoapihi waapoho naniwimapi ami itipihomaipihapaami wipati kaapihoapihi naniwimapi ami Awaisihomi ganihoasini nandapa naniwimapi ami itipihomaipihapaami ganihoasini nandapa naniwi windi saiwi kamaitaapo. ²²Nyahi nowa nasaya siyaati kaisaihi Awaisiho nyasonataati apomaawitaiso? Awaisiho apousonihi nyangisi yaasati naanjhandi ko nanyinyonihi nyahi nga anditititaano?

**Kiraisihopi Giwunyaahohiyihya Kahapaamapipa Nga
Kiyawaahandi Kandi Baiwi Mmoniwi Jatiniwi Kaitaatiwe**

²³Iyataati ami wapa taahipipaahi yahapa nga nanihyaati topitaata kaitihaahapa ahondaise. Iyataahandi kandi ami nahataapa nga nyangi windi maanyitatanitaise. Owetise. Iyataati ami wapa nahataapa nga kaitaatiwihapa ahondaahandi kandi ami kapa nahataapa kiyohipipaaraahi isihiyaisi Autaahaatihomihiretapi windi waati gimaawunyaatitaise. ²⁴Isi ami Kiraisihopi giwunyaahingihonji titihi kiwahonyapi gwinyaahingipipaahihi windi kamaima. Isihya nahatiya giwunyaahohiyihya mmoniwi nepi maaritiwi kaitaatiwihapa kaime. ²⁵Iyataati ami kohasipihomaipihapa ahaisaihihapaapi nanihohipipaamitindiho e namaanihohipipaamitindiho tipi gwinyaapaapi kimba kohasipimo maahapihapi nesipiwi ahiyopo tipi windi baahaimbi namunjenime. Nehi nepi nanime. ²⁶Sandi katotimandi apaapimaato. Autaahaatihomi piwiha utipihooatihi wapihi satati ahondaise:

“Yapipati kimati Awaisihomihate. Iyati ami kahapaamapipa
nahataapa kati yapimbata ahotimbipaisangisi nehi
komihapaahihe,”

Aunihihiri 24:1

tati ahondaise.

²⁷Iyataati ami sahi saiwi kaitaatiwi kasatataato. Utaaho wo Kiraisihopi windi gimaawunyaaho sahi giwunyaahohiyihyaatangisi nisi anjipipihi nandapa maasi nandihaawo satati kasatonaahi ami sahi komi anjipipihi nandapa maasi nandaatiwi nutaatiwaahi nuwise. Nuwi nandapa sangi nasamimbipa nanihaiwi nepi nahataapa naniwi owemapise. Saiwi nanawaawi nandimba kimba maahapihapi nepihape tiwi namaaseniwi nehi naniwise. ²⁸Iyataahandi kandi ami isihiya usa sangisi sasatisaihaahi kimba nandimba autaahaatiho jaiwitahoai gaarehandi nunyawihape satisaihaahi ami kapa windi namaaniwise isihiya nandapa saiwhape satohiyihiyai sahi nepi anditiwiwitaatiwo. Ami wiwa sahi kapa nepi nainjaihi ami kiya nepi nanawaawi kiyaami maariho omanjitihi neti sahi titihimetahandi kiyawaayopo undonihi ami kiya pihitiwi gwinyaawaatitaawo. ²⁹Aihi nini sangisi sandi kasatohitindi sahi sawanaati nehi ninaasoni satipi nini saindi kiyataataahi windi titihimahe tapaapaahi kinyi namaanime daamaato. Owe. Ami utaaho satati sapa nandapa autaahaatiho jaiwitahoai nunyawihape satati kasatisiho gwinyaati sapa nandapa nini nanataataahi windi titihimetitaise tatunyaati kasatisihopunyaatito. Isi ami ko kasatisiho gwinyaasitihandapimatonihahi sahi nandapa windi namandaatiwe satataato. Iyataati ami wapaapi sahi satiwi sapaahi nyahi nga nanihyaati usa ami wapa neti nanyisapuhonihi windi namitanaati kaitotiwi gwinyaahopipaahi ami sahi nga kaitaapo. Ami usa sangi samaasatitaapo. “Sapa sahi windi nanihaiwi kamaiwise,” maasatitaapo. Ami sandihi kiyaami nandihapaamaahe. Owe. ³⁰Nandapa ami wapa nepi nandaatiwi kapaapi Autaahaatihoai kinyi gaahone gaare undiwi sahi nepi nainjaihihapaapi isihiya usa sapi piwiha itihitiwi sami dawaataatapi katitaatiwi tanyaaha owetise. Sahi Autaahaatihoai kinyi gaahone gaare undiwosawi nandapaisangi ami wapaisangi nepi nanihohipipaapi wo itihititandi komihandimahe. Owe. ³¹Isi ami piwiha awaisiha nini sangisi sami jihi nandapa autaahaatiho nehi jaiwitahoai tihwi nunyohipipaapi sahi nanisenotihandapi wihoanjiha kasatitandiyoni atiwise. Sahi wapa nandapa ami waapohoisangi nepi nanawaahapaapi samaatiwise. Sapa nyahi newaati nandihahape ami sapa namandihahape tiwi gimunyaapise. Windi samaiwi sahi nahataapa kiyohipipa isihiya mmonawaawi kapaapi Autaahaatihomi ambipati nepi niwimaapi ko awaisiho gaahoe tiwi koai nepi awaindepumwaitaatiwihireti mmoniwi kaiwise satataato. ³²Piwiha kimika wiretemati sandi kasatitaato. Sahi isihiya Judaahiyaapuni ami kiyaami dawaataati isihiya usa bimohiyihyaapuni ami Autaahaatihomi isihiya Kiraisihopi giwunyaahohiyihyaapuni baiwi giwunyaapi sahi wapa kaiwi nanihohipipa naniwi kaiwise. Ami kiya Kiraisihopi

giwunyaitaatiwihira mmoniwi naitaatiwo. Aiwi Kiraisihopi taawi namasawi giwunyaahohiyihiya windi timahiyawi jahira maipihandaatihi windi namuto. ³³Iyataati ami nini niwahoninisangi siri kireti kiyataayo nisi kiyohipipa nahataapaaro ami isihiya nahatiya nisi kiyohipipa nahataapa mmonawaawi kaiwaapi maaritaitaatiwihireto. Akipipa napa nini niwahonihi neti anditiniwati nitatamanitaise ndi wapa nini kiyohipipa kiyataamaayo. Owe. Nehi nini saindi kimireti gwinyaati kapa kiyataayo. Akipipa napa isihiya pihitahi taahiyihiyai neti anditiniwati iwitatamanitaise ndi naseniti mmoniti kiyataayo ami nini wapa kiyohipipaaro. Ami nini saindi wapa kiyohitimandi isihiya taahiyihiyaisi kiyai Kiraisiho kiyaami maipihaiwaatihapi japihi numwaitandihiretemwaitando ami Kiraisiho kiyai kiyaami maipihaiwaatihapi japihi numwaitandi.

11 ¹Ami Kiraisiho kairihireti nini mmoniti neti komi kaipati kati kiyataayo. Isi ami sahi nini Kiraisihomihati neti nisi kiyohipati kati kireti kaiwi ningisi nanipinjawise.

**Kiraisihomi Isihiya Autaahaatihoi Mepi Autaahepumwaitaatiwi
Ahoynawaahura Kaitaatiwihiretapi Poriho Winihindaase**

²Sahi nisapi gwinyaapi nisi piwiha kasatohiwaiwa sahi kaitaatiwi kaiwa namaamapi nahateweti anitiwi isipi gwinyaapi bimohitihandapi kiya gaahati kiyawaayopo ndi maarisititi autaahesamataayo. ³Aihi ami piwiha kima sahi gwinyaaitaatiwiha sandi kasatitandiyo. Usihiya nahatiya giwunyaahohiyihiyaami mitiho jiho Kiraisihore. Aihi ami apopaati namaatihatami mitiho jiho kaatami warihore. Iyataati ami Kiraisihomi mitiho jiho Autaahaatihore. ⁴Iyataati ami utaaho wo komi mitiho namaasati apotihiri wisasanati gaapundati ami Autaahaatihomi piwiha atisati neti ausaataataahi so komi mitiho jiho Kiraisihoai mawihandi nunyataise. ⁵Iyataati ami apopaati waati wohoisahaati kaatami mitihoatihi apotihiri namaamasatati mitiho autaatihaati Autaahaatihomi piwiha ausaati ami gaapundataataahi ami saati kaatami wariho mitihoematati nususasami otipipatapihiretapi iwinjaati bimisihoi mawihandi nunyataise. Kaati siyati kiyataataahi itapaati waati kaatami misisiha tisatiwi kihoemahohaamaamatiyahaatimatata ise. ⁶Iyataati ami apopaati waati warihoisahaati kaatami mitihoatihi apotihiri namaamasatonaahi kaatami misisiha namandipapi tisatiwi ambipatihimapi nuhonyaamapise. Ami kaati saiwi nisi misisiha tisatiwi auhinimasaihi ningisi manyitaiso tati gwinyaataataahi namati kaati kaatami mitihoatihi apotihiri namaasati namaasatitando. ⁷Iyataati ami woho wo apopaatisaho apotihiri komi mitihoatihi namaamasatane. Sandi apaapimaato sapiho Autaahaatihomi maahomwaanji neti bitonda Autaahaatihomihaiwa watipihaiwa nausainjiwaiwaapi siyahaiwaisahoe

tati isihiyai nunjati kaunditandihoso. Iyataati ami apwaataatisangisi warihopi niwiho ninjaati bimihini nini komi otitihini bindataayo tati katitandihataiso. ⁸Iyataati ami piwima kima katitandiyohimaapi aimi gisunyaatahiyaate. Jihini aimi wuwanihura Autaahaatiho isihiyai kaisura apopaatami ambipati witi neti kataahi wohoi kiyataamaise. Owetise. Autaahaatiho wohomi ambipati witi neti kataahi apopaatisi kiyati ahiyataise. ⁹Iyataati ami Autaahaatiho apopaati sawahaatiso tati gwinyaataati wohoi kiyati ahiyataamaise. Owetise. Woho sawahohiso tati gwinyaataati apopaatisi warihoi anditiwiwati iwitatamanitandi kiyati ahiyataise. ¹⁰Isi kaati apwaataati kaatami mitihoatihi apotihiri namaasatane niwiho nisi mitihoematati nususanaanami otipipatamihiretapi ningisi ninjaati bindataise tati nunjitando. Siyati kiyonihini ami Autaahaatihomi otipipatihiyai yamihapataatihi bimohiyihiyai usonawaawi kaatami warihoi ninjaapi bime undahaate tiwi kandapi maarititaatiwo.

¹¹Iyataati Autaahaatihomi isihiyai bimohirihiretuni ami awaisihoi wohoisuni apopaatisuni kiyati ahiwirihireti siyate: apopaati warihopi Yandihini kaati bindataamaise. Owetise. Aihini ami warihoi apwaataatapi koai yandihini bindataamaise. Owetise. Apwaataati saati warihoi anditiwiwitandihaihi bimihini ami warihoi so apwaataatisi anditiwiwitandihoi bimitaise. ¹²Wuwanihura Autaahaatiho wohomi ambipataahi apopaati kiyataise. Kiyataahandi kandi sura kaisuraapi mitaahi namasati usihiyai ipoti ipoti asihiyaaamihetapi (asihiyaaami ambipatetapi) noaipawaayopo. Siyati saiwa nahatewa Autaahaatiho sawaho kiyataise.

¹³Kima piwimaapi sahi sawanaati gwinyaitaatiwiha sandi watipindi kasatataato. Apopaati waati isihiyai taahihiyai ahoyanihohipihini notini nini aimi wohoisihanine undati nunjitandihiri asihiyai namaatiwihiyaami apotihiri namaamaasatati nehi taanihaamaati Autaahaatihopi gaapunditandi sandi gaaro? Owe. Sandihini maipe. ¹⁴Iyataati ami utahoi woi komi misisiha utaari nawati mihaapi asihiyaaamihaamatiyati wirapananahoi isihiyaaami ndiheti daayata mawitaise. ¹⁵O apopaatamiha misisiha utaari nawati mihaapi wirapananahaati daayonaahi isihiyaaami ndiheti sandihini asihiyaaamihatisi gaare. Iyataati ami isihiyaisangisi kaatami misisihaapi maarititaapo. Sandi misisiha siyati nawati kaatami mitihoai neti namaasaitandi Autaahaatiho misisiha numwihahaare. ¹⁶Isi ami isihiyai usa nini sandi aimi katohimaapi saiwa nyahi usihiyaaami asihiyaaami windi kamaito tiwi katawaawaahi baiwi gwinyaapi kiya katitaatiwe. Nyahi otipipatihiyaaanuni ami Autaahaatihomi isihiyai nahatiya nahataapipihiyaauni wapa kaitaatiwihapa owe wira wipetahira kaitihaahira owetise. Nehi kimira katohirimiraahi usihiyaaami asihiyaaami kaitihaahiraahihini ahondaise.

**Korindihiya Awaisihopi Gwinyaitaatiwi Nandapa
Nanihopipa Baiwi Namaaniwi Nopisasawaayopo**

¹⁷Sahi Autaahaatihomi isihyaati naasaimbipihi ahoyanawaahura kiyohiwaiwaapi nini baindi kasatitandiyo. Sahi Awaisiho Kiraisihomi nandapa biretihandi ami waapoho wainihandi nandaatiwi ahoyanawaahura piwiha kihaiwa kihaiwa katiwi windi apipaahi titihimetihaiwa kiyohitihandapi nini sapi windi maarimito. Isihya Autaahaatihomihireti japepihiriwi baiwi bimitaatiwihira namunjawi isihya Autaahaatihomihireti minjapepihiriwi mimaipaiwi bimitaatiwihira nepi nunjawi kiyauho. ¹⁸Isi nini nisi aimi katotimaapi neti nasesipati namasati jahaati sandi kasatitaano. Nini atisataati sahi Autaahaatihopi maaritiwi koai mepi autaahemwaitaatiwi ahoyanawaahura piwiha wo wa katihi ami wo wa katihi kihireti kihaiwa kihaiwa piwaatiwi wihiwihooani nepi tipitapaatiwi yiyandihi usa wihooanjitihimi ami wihooanjitihimi kihonji kihonjaapi anjtitihimi bimai niyotihandapi nini atisataati kiya akiti kiyauhitowo ndi gwinyapenataayo. ¹⁹Sandi isihya akiti kiyauhitowo totimandapi ami sahi sawanaatami kiyoheteti baiwi mmotiniwi gwinyaapise. ²⁰Isi wani nini sami kiyohiwaiwaapi ausaati sandi katitaano. Sahi taahiyihyaati usonyonjaapihi ahoyaniwi bindawaawi nandapa nanihopipa sapa titih Awaisihopi gwinyaitaatiwi nandapa titih komihapa nanawaamaayopo. Owetise. ²¹Nandapa nandaatiwi nesipiwi ahiyawosawi usa taahiyihya napisaihi maasi tipitapaawa nunyaati nandihaawo tiwi minjatiwi nesipiwi isihya sangi nasauhi keti nepi nanawaayopo. Nanihauhi ami usa nandapa owehiya nasohiyihya jaumanataise. Aihi ami waapoho wainihandisangi nuhaapi isihiyai kihonji nunyawu namaaniwi kiyaaami waapohopi akiwihi pihitiwi naniwi naharisawaayopo. ²²Saiwa titihimetahaiwa nahiriwi sahi kiyawaayopo. Sahi saiwi nandaatiwaahi sami anjipipihi ninaasaimbihi pihitiwi nanimbiwi napitihandisi namaaniwi napiwawo. Sahi sami sisaahoya Autaahaatihomi isihyaapi posatihi saiwa kiyawaayowo? Iyataati ami sami naisihya nandapa owehiya taanahiyihya nasohiyihiyai nandapa namunyawi nanihotihandapi gaahati kiyahaayo tiwo? Sahi saiwi kiyohitimandapi napititandati? Gaare satiti sangi neti nini autaahesamaitando? Owetise. Saiwihyaatangisi nini gaahyaate ndi maarititi windi autaahesamaamaito. Owetise.

**Awaisiho Jisaasiho Komi Otipipatihiyai Nandapa Biretihandi Ami
Waapoho Wainihandi Nunyataise**

(Matiyuhu 26:26-29; Maakiho 14:22-25; Rukiho 22:14-20)

²³Awaisiho Jisaasiho ningisi piwiha katanisihya nini neti sangi kasato. Ko nyapi napwindihandapi ginyunyaatitandi waapoho wainihanduni ami

nandapa biretihanduni nandihaahandapi biyati katanisataise. Ko siyati titihi saiwi kaitaatiwe tati katanisirihiri kireti ami nini sangisi sandi kasatataato. Isihiya koai yaawihandi numwitaatiwihiyaami ikwiraatihi nutandi detitih apatih ipiho nipatisura Awaisiho nandapa biretihandi netaise. ²⁴Neti isiwatataati Autaahaatihoai kinyi iparihoji gaahonge gaare undatosati biretihandi nahatohandisi kihonji kihonji naumbwoti saundati nunyataise. “Kimandi biretimandi sapi nisi ambipati nasipatindihandapi namihanahande. Namihanahandisi sahi nepi naniwise. Nepi nahateweti wura wura nanawaawi nini sangisi jatatamaniti japihi nasamaitandi nisi ambipati nasipatati napotihandapi ginunyaitaatiwe,” undati nunyataise. ²⁵Numwihi aimi nanihauhi ami naasikati kiyati kaapiho waapoho wainihandi windaho neti isiwatataati Autaahaatihoai kinyi gaahonge gaare undatosati ko waapoho wainihandi kiyai saundati nunyataise. “Nini sapi nisi jitipati nuhaatati sanaindhandaahi sahi Autaahaatihoaisawi maasi timaamaititaatiwe ndi katotihandapi waapoho kimo wainihandi nisi jitipatapi namihanahosi nepi naniwise. Ami ipoti ipotisangisi nanawaawi nisi jitipati sapi sanaindihandapi ginunyaitaatiwe,” undati nunyataise ndi aimi kasato. ²⁶Jisaasihomi piwiha siyaha sandi kandaato sahi sapa nandapa biretihandi ami waapoho wainihandi nanawaawi Jisaasiho sapi napwindihandapi giwunyaapi ko napwindihandapi isihiyai kaundiwi ami saiwi kaimi nuwi ko japihi nasonihuraatitando ndi kasatataato.

**Sahi sami Omañititih Mmotiniwi Gwinyaatiwi Titihematiwosawi
Ipoti Awaisihomi Nandapa Nepi Naniwise**

²⁷Isi ami utaaho wo komi kaiwaiwaapi biyati gwinyaati titihematati ko maipihandi kaiwaiwa ahotanihandi kandi Awaisihomi nandapa biretihandi waapoho wainihandi nanataataahi so Awaisihomi ambipatisuni ami jitipatisuni maipihandi kawisataise. Iyati ami sawahoaisangi maipihati kiyati neti nopisasinataise. ²⁸Isi ami utaaho wo giwunyaaho siyati kamaayati kimiyati kiyane. Awaisihomi nandapa biretihandi ami wainihandi sangi neti nanatiwatataati ko kaiwaiwaapi saiwa gaahaiwa kiyono e maipihaiwa kiyono tati jihi komi omañititih mmotinane. Mmotinati maipihapa kaimbipa namati titihematosatihura sapa Awaisihomi nandapa nandando. ²⁹O ami utaaho wo Awaisihomi ambipati nasipainjitihandapi windi biyati gimunyaati ami sawaho windi biyati titihemaamatati nehi nanataataahi sawaho maipihati kainataisi Awaisiho koaisi yaawati naañihandi numwitaise. ³⁰Sahi sawanaati saiwi kiyawaataawaawi sawanaatami tanyaaha saaraahi windi anditimitiwi taahiyihiyaati timbipa nepi ami sami usa taahiyihiya taawi napowaayopo. ³¹O ami nyahi biyaati titihemataati maipihaiwa ahinyotiwaiwa nemawa namaatosati nanihaawaahi Awaisiho

sahi saiwihiyaate nyatati yaasati naanjihandi awaindihandi windi namaanyamitaise. ³²Iyataati ami nyahi giwunyaahohiyihyaanini wiwa maipihaiwa kiyaati binyaihi Awaisiho nyasonataati kandapi yaasati naanjihandi wonya nanyinyonaahi sandi nyangisi titihenyamaitandi kiyataise nyahi windi yaasati naanjihandi awaindihandi isihiya maipihiya Kiraisihopi gimaawunyaapihiyaisaati namaitihaawo.

³³Isi nisi naisihyaati nisataiwi Kiraisihopi giwunyaahohiyihyaate, nandapa Awaisiho komi otipipatihyaisati nainjipipaamataiwi nandaatiwi usipipihahi ahoyanawaahura isihiya nahatiya napisaihi maasi nandaatiwi jatiwise. ³⁴Ami utaahoni wonji jahimahonaahi kinyi kinyi anjipipihahi nandapa nanipi gwisumapi napitaape. Saimbi kiyapaapaahi Awaisiho kinyi saingitihandapo tati yaasati naanjihandi windi namaahimitaise. Iyataati piwiha wiwa yaihaiwaasi nini nasatahura baindi kasatiti nasesipaito.

**Autahaatihomi Itipihohi Isihiya Kiraisihopi Giwunyaahohiyihiyai
Otipipati Kihati Kihati Kaitaatiwi Watipihandi Nunyataise**

12 ¹Nisi naisihyaate, Autahaatihomi Itipihohi isihyaamiheti napitiyati kiyataise ndiwi nanisenihohihaapi wihoaajiha Itipihohi siyati otipipati isihiyai kihati kihati numwihi kiyawaayopo ndi kasatitandiyo. ²Sahi Autahaatihopi gimaawunyaapihura kiyohitihandapaahi aimi sahi sawanaati aimi gwinyaapihyaate. Sahi autahaatihohi jaipitahoai mepi autaahepumaita nowaawaahi nehi nanihaiwi topitaata nuwihyaate. ³Sahi saiwihiyaatisi wani nini piwiha kima sahi baiwi gwinyaitaatiwiha sandi kasatitandiyo. Utaaho wo Autahaatihomi Itipihohisaho piwiha windi satati, “Autahaatihohi Kiraisihohi naanji yaawihandi nunyane,” tati windi kamaatitaise. Iyataati ami utaaho Itipihohi Gaaho oweho satati, “Jisaasiho Awaisihore,” tati windi kamaatitaise owetitaise. Nehi Autahaatihomi Itipihohi koaisatitahi neti titihemwati anditiwihonihi giwunyaataati komi omanjititihahi maarihoatihapaahihi satati katitaise. ⁴Sangisi gisunyaatitandiha piwiha kima nini kasatitandiyo. Itipihohi Gaaho nehi naasohindaahandi kandi Itipihohi kimiko isihiya Autahaatihomi otipipati kihati kihati kawitaatiwi watipihandi kihandi kihandi nunyataise. ⁵Isi ami Autahaatihomi isihiyaisi otipipati isihiya kihati kihati yiyandihi ninaasohi Awaisiho naasomihati kawitaapo. ⁶Iyataati ami otipipati taahipati kihati yiyandihi witi wipetihati nunyataahandi kandi Autahaatihohi nehi naasohihi isihiyai neti anditiwihati watipurimahonihi kiya ninaasohi otipipati yiyandihi witi witi kaitaapo. ⁷Isi kima kaapi wonji onihiti sandi kasatitaano. Siyati Itipihohi otipipati kihati kihati kaitaatiwi watipihandi kihohi kihohi nunyonihahi ami kiya otipipati numwisawihiya kiyaamihati yiyandihi isihiya giwunyaahohiyihiya nahatiyai anditiwipi kaitaatiwihandapi biyati

giwunyaatitaise. ⁸ Isi nini siyahapaapito ndi nasisati sandi kasatitaano. Utaaho woaisi Autaahaatiho amitiha gaahandi gwinyaasitihandapi isihiyai kaunditandi Itipiho Gaaho watipihandi numwitaise. Iyati ami Itipiho naasiko woaisi Autaahaatihomi piwihaapi biyati gwinyaati ko isihiyai piwiha kaundonihi Autaahaatihopi giwunyaitaatiwi watipihandi koai numwitaise. ⁹ Iyataati ami Itipiho naasiko woaisi ko Autaahaatihopi watipitati giwunyaitandi watipihandi numwitaise. Iyataati ami utaaho wo isihyaami timbipa asaaha nemwaitandi Itipiho naasiko koai watipihandi numwitaise. ¹⁰ Iyataati ami wo Autaahaatihomi watipihaiwa kaitandihandi watipihandi Itipiho naasiko nunyataise. Iyataati ami utaaho wo Autaahaatihomi piwiha neti giwunyaati kaundoniha atisati neti ausaati katitandihandapi Itipiho naasiko watipihandi nunyataise. Iyataati ami utaaho wo sa piwiha Autaahaatihomihe sa itipiho maipihomihe tati tipitapaati mmondandihandi watipihandi koai nunyataise. Iyataati ami utaaho wo piwiha wa ko windi piwaamaataha usaamihaara piwaatitandihandi watipihandi nunyataise. Nunyonihiki ko siyati piwiha waara piwaatonihiki ami wo ka piwa windi piwaamaatahondaahandi kandi sata sata kandaase tati nepemaahiwati katitandihandi watipihandi Itipiho Gaaho naasiko numwitaise. ¹¹ Itipiho so naasiko saiwa nahatewa kiyonihiki nga noaipaitaise. Iyati Itipiho sawahomi titihiki gwinyaasirihireti jatetinjati woaisi watipihandi otipipati witapi neti nunyati ami woaisi watipihandi windi otipipati witapi nunyataise.

Kiraisihopi Giwunyaahohiyihiya Otipipati Ninawipihiki Kiyawaayopo

¹² Isi Itipiho otipipati kihati kihati kaitaatiwi isihiya kihiya kihiyai watipihandi numwindihandapi kasatitaano. Utaahomi ambipati nehi naasaipatisahondaahandi kandi wihoanijihonya taahonyonya kihonya kihonyaisahate. Iyataati sonya taahonyonya ambipati nehi naasaipateti namihatati bindataise. Iyataati ami nyahi isihyaanini taahiyihyaanindaahandi kandi nyahi Kiraisihoaisaati maasi timaamaitohiyihyaanami ambipati noaipati nehi naasaipihindaise. ¹³ Nyahi kiraisihoaisaati timaamaitihaawi nyami ambipati noaipati naasaipitindimandi apaapimaawe. Nyahi Judaahiyaanami usaatihi ami Judaahiyaanami dawaataatapihyaami usaatihi ami nawiho namepi nehi otipipatihiki waati kiyohiyihyaami usaatihi ami usa nawiho namepihati otipipati windi kamaiwihiya nehihiyaatihiki siyaanini nahatiyaanangisi Itipiho ko naasohi neti baanyusataise. Neti baanyusati nyamaamaisihiki nyami ambipati noaipati nehi naasaipindaise. Iyataati Itipiho naasiko nyahi nahatiyaanini newaati waapohomatiyahosi nanihonihiki ko Itipiho nyatatamanati anditinyaisihiki watipitaati bindihaayo.

¹⁴ Isi sahi gwinyaapise nyami ambipati nehi naasaipimaawe nyami ambipati kihonya kihonya ahetahate. ¹⁵ Isi piwiha wa gwinyaitiha

namihandi sandi kasatitaano. Auhiri satati nini ikwiraninimahe ambipatami wihoaangihatanimatitando maatitaise. Owe. Ami ambipati nehi naasaipatami wihoaangihatiso. ¹⁶Iyonihimi ami atihiri satati nini ndihaaraninimahe ambipatami wihoaangihiraninititando maatitaise. Ami atihiri ambipati naasikatami wihoaangihiriso. ¹⁷Isi ami ambipati nahatepi nehi ndihaahitamahonaahi ami piwiha napitiyati atitaise. Iyataati ami ambipati nahatepi nehi atihiritamahonaahi wapaapi napitiyati anitaise. ¹⁸Ambipati siyahati ahendaamaise. Owetise. Autaahaatiho sawaho gwinyaasirihireti ambipati nehi naasaipitami kihonya kihonya siyati ahetito tati kiyati ahaihihonyaasi kiyati ahendaise. ¹⁹Iyataati ami ambipatami nehi wihoaangihonji nehi naasonyihimi ahendaataahi sati ambipatimahe. Owe. Nehihate. ²⁰Iyataati ambipati setahatimahe. Owetise. Ambipati nehi naasaipihindaahandi kandi wihoaangihonya kihonya kihonyaisahate.

²¹Isi ndihaari ikwirisi naharitati windi sata kamunditaise. Nini ndihaaranini ikwiranyapi windi maarimito munditaise. Iyonihimi ami mitiho naharitati auhirisi sata windi kamunditaise. Nini mitihonini auhiranyapi windi maarimito munditaise. Owetitaise. ²²Iyataati ami nyami ambipatami wapihapa napaimbipe taati gwinyaahohipipa windi ahimondaataahi nyami ambipati windi biyati ahimotitaise. Apipaahi owetitaise. ²³Nyami ambipatami wihoaangihonya wonya windi gaahonyaametihi konyaapi nyahi nehi goti maaritohonyaisi isihiya mmondaatiwi biyaati yundanyaawisihaayo. Iyaati ami nyami ambipati wihoaangihati mapipaisahati itatamanaati anitisaati uti apotihira namaasahaayo isihiya nyainjaitaawo taato. ²⁴Iyataati ami nyami ambipatami wihoaangihapa baahetimbipaahi windi namaamaasaati nehi kendaise. Nyami ambipati nahatepi siyati ahotitandi Autaahaatiho ahaihihate. Iyataati ami ambipati wihoaangihatisi goti pohipaiwimahohipatisi waati maarita neti awaipatemataise. ²⁵Autaahaatiho saindimandi siyati ambipati sawandipi itihinati ningisi yandihe nnati kihonji kihonji nasipatitandimahe. Owetise. Ambipatami wihoaangihonya nahatonya nehi naasikati kaiwi sasaahohatapi gwinyaapi kaiwusepaitaatiwe. ²⁶Isi ami ambipati wihoaangihati yaawataataahi ami ambipati mikati naasaipitisi ambipati nahatepi yaawitaise. O ami ambipati wihoaangihati waati maaritonaahi ami ambipati mikati naasaipitisi ambipati nahatepi waati maarititaise.

²⁷Isi sahi nahatiyaati Kiraisihomi ambihyaate. Sahi ninaasiyaatihi Kiraisihomi ambipatami wihoaangihonya kihonya kihonyaate. ²⁸Siyati ambipati nehi naasaipihindaahandi kandi wihoaagihati kihonya kihonyaapatamatiyati komi isihiyaamihatihi kiho kihoai otipipati kihati kihati nunyataise kawitaatiwo. Siya otipipati numwisawihyaami jihimatohiyihya komi otipipatapi Natausaasisawihyaare. Ami

kapihya Autaahaatihomi piwiha atiwi nepi ausaahohiyihyaare. Aihi ami kapihya nusesipapi baiwi katiwunjohiyihyaare. Aihi ami giwunyaahohiyihyaami woaisi isihyaami timbipa asaaha nemwaitandi watipihandi ko nunyataise. Iyati ami giwunyaasihho woaisi watipihandi windi nunyataise isihiyai anditiwiwitandihandi. Iyati ami wo giwunyaasihhoai watipihandi windi nunyataise Autaahaatihomi isihyaaisi saiwi saiwi kaiwi bimaawise undati titihemwaitandihando. Iyati ami wo giwunyaasihhoai windi watipihandi nunyataise piwiha usaamiha windi piwaamaatohihaaraahi wanihandi piwaatitandihando. ²⁹ Ami sandi napitimatataise? Isihya giwunyaahohiyihya nahatiya noaipapi Kiraisihho komi otipipatapi Natausaasisawihiyaimatawayowo? Owetise. Iyataati ami giwunyaahohiyihya nahatiya Autaahaatihomi piwiha atiwi nepi ausaitaatiwihyaahititaatiwo? Owetise. Iyataati ami nahatiya giwunyaahohiyihya piwiha nusesipapi katiwunjitaatiwihyaahititaatiwo? Owetise. ³⁰ Isihya giwunyaahohiyihyaami woaisi isihyaami timbipa asaaha nemwaitandihandi watipihandi Awaisihho windi namunyataiso? Iyataati ami giwunyaahohiyihyaami woaisi piwiha usaamiha waaraahi piwaatitandihandapi Autaahaatihomi Itipihho Gaaho watipihandi windi namunyataiso? Iyataati ami giwunyaahohiyihyaami wori piwiha ka windi piwaamaatahondaahandi kandi nepemaahiwati satawaatopo tati katitandihandi watipihandi Autaahaatihomi Itipihho Gaaho namunyataiso? Owetise. Isihya nahatiya giwunyaahohiyihya otipipati kiho kiho kihati kihati yiyandihi newaayopo. ³¹ Isi ami sahi otipipati kawitaatiwihandapi Autaahaatihomi Itipihho Gaaho watipihaiwa apipaahi gaahaiwaahihi nehi nasanyonihi awaiwa naitaatiwi apipaahi andititiwi maaritiwimapise.

Nyahi Isihya Usaisi Maariho Napaita Numwitahaawo

Nini sangi wani windi apipaahi awaindihandi sahi kaitaatiwihandapi daihira gaahiraapi kasatitandiyo.

13 ¹ Sahi gwinyaitaatiwiha nini niwahonisapi nehi namihandiha sandi kasatitaano. Piwiha nini windi piwaamandiha usaamihaaraahuni ami Autaahaatihomi otipipatihya yamihapataatihi bimohiyihyaami piwiha piwaatohihaaraahuni ami ningisangisi piwandaahandi kandi isihyaaisi nini maariho napaititi namunyataataahi nisi piwiha usaamihaara piwaatotihandi otipihho kapaparihiri gugaatati gaatati owetipatamatiyati nisi piwiha piwaatohiwaiwa noti owendaise. ² Aindi ami nini Autaahaatihomi piwiha atindi neti ausaitandihoninindi ami Autaahaatihomi gaahaiwa gwinyaasiwaiwa isihyaapi noasandiwaiwa mmoniti gwinyaatihoninindi ami Autaahaatihomi piwihaapi baindi gwinyaatihoninindi ami Autaahaatihhoai kaundihi nunjenihohipipa nanimitaiso ndi gwinyaati anditindi jatitihoninindi

ami nisi giwunyaahohitihandaahi sisihoaisi kinyi niwautipesi numbwi wapihi mihotinde unditihoninindi saiwa saindi kiyataahandi kandi isihiyaisi nini maariho napaititi numwitandihandi owendaataahi nini utaahoninimaache. Owe nehi wapaamataindihonine. ³Aindi ami nini nisihapa nahataapa nawiho ami ikipipa nandapa owehiyai kihonji kihonji tipitapaati nunyati ami isihiya ningi nipi nanimaasi nuwi sisihaapinimasaihi nindonihi napomasanihandi kandi nini isihiyaisi maariho namunyataataahi nini saindi kiyohiwaiwaapi wihoaanjhapa gaahapa Autaahaatiho ningi windi namaanimitaise. Owetitaise. ⁴Isi ami wani nini utaaho wo isihiyaisi biyati maariho nunyaho kairihiretapi sandi kasatitaano. Utaaho isihiyaisi maariho nunyahoai wo nasati itihundonihi ami wihoaanji maipihati kiyati koaisi windi itihimunditaise. Itihimundati nehi gaahati kawitaise. Iyati ami ko isihiyaisi maariho nunyaho usa kahapaamapipa asaketahiyaapi windi apomaawitaise. Iyati ami ko isihiyaisi maariho nunyaho nini sapa saindi kaidihoniniso tati windi sawaho namimaatindaise. ⁵Iyati ami isihiyaisi maariho nunyaho isihiyaisi windi maipihati kamaawitaise. Siyati isihiyai maariho nunyaho kahapaamapipa sawahopihapaapaahihi waati pihitati windi gimunyaitaise. Iyati nehi sawahomihapaahihi windi minjatitaise. Iyataati ami ko siyahoaisi isihiya maipihati kawisaihi ami ko windi waapihitati itihimaatitaise. Iyati ami ko isihiyaisi maariho nunyaho isihiya wapa maipihapa kawisaihihapaapi isihiya sanisowo tati pihitati gwinyaapi windi namotoaatitaise. ⁶Iyati ami ko isihiya usa maipihaiwa wiwa kaisaihihaiwaapi nge tati windi maarimitati komi maariho naanawitaise. Iyati ami ko isihiyaisi siyati napaitati maariho nunyaho isihiya Jisaasiho kaundirihireti atiwi japepihiriwi kaitaatiwihandapi apipaahi aungwohandi tahaapiya maarititaise. ⁷Siyati utaaho isihiyaisi napaitati maariho nunyaho utaaho woai ko komi maariho numwisiho wapa maipihapa kawisonihura noti isihiya usaisi saundati, “Utaaho nini maariho nunyohiho maipihapa siya siyahapa ningi kanise,” undati windi kamunditaise. Owetitaise. Kohi yatihii ipatisanati bimoti ami komi maahomwaaaji windi namusoataise. Ko nasisoaari utaaho woai maariho numwisihopi siyati gwinyaitaise. “Nini nisi maariho nunyohiho utaaso ningi nehi gaahandihi kanitaiso,” tati gwinyaitaise. Iyati ami utaaso so wopi ko maariho numwisiho nasisoaari siyati gwinyaitaise, Autaahaatiho nga koai iwitatamanihonihi ko Kiraisihomihireti japepihirati bimitaise tati gwinyaitaise. Iyati ami ko windi namaamihaati utaaso so woai konihi maariho numwitaise. Wapa wapa ko sawahoai nusoaipahonihisangi konihi daahi utaaso soai maariho numwitaise. ⁸Isihiyaisi maariho numwitahaahandi sandi windi owemetati kandinihi nasisoaari ahotimi nutandihande. Iyataati ami Autaahaatihomi Itipihonihi neti giwunyaati watipihandi numwihi Autaahaatihomi

piwiha ausaahotihandi noti owetitaise. Iyati ami piwiha windi piwaamaatiwiha wanihandi kiha kihaara piwaatitaatiwi Itipiho watipihandi numwindihandisangisi noti owetitaise. Iyataati ami isihiyai Autaahaatihomi piwihaapi biyati nusesipatati giwunyaatonihii isihiyai piwiha ausaapi kaunditaatiwihandi watipihandi Itipiho numwindihandisangisi ipotihura noti owetitaise. ⁹Iyataati wani kimandi kimuraahi Autaahaatiho nyangisi wapa kanyitandi katimbipaami nehi ninaasonyaapaahihi ginunyaatataise. Iyataati ami piwiha wani taawaati atisa newa awusaahotimaisangisi sawaho nehi ninaasonyaahihi neti ginunyaati nanyamihihonya taawaati awusaahaayo. ¹⁰Ipotihii titihii akipipa noaipatahuraahi kihonya kihonya neti ginyunyaati nanyamihi ausaahohonyaahi noti owetitandihonyaare. ¹¹Nini apipaahi sangihonini metihoninihura metihonya piwaatohipatamataindi piwandi ami metihonya gwinyaahohipatamataindi gwinyaati piwandihonine. Saindihoninisi wanihi nini noaipati aimi gwinyaahonini awaisihoninisi nini sangihyaamataindi kiyohiwaiwa aimi namaho. Isi nyahi giwunyaahohiyihyaanini asisiha waara sikiyaati aimi gwinyaanaati gwinyaahiyaanitihaawi metihonyaami kiyohipipa namahohipatamatiyaati namaito. ¹²Siwipihooatihi nyahi nehi jahohipatamatiyaati Autaahaatihomihaiwaapi neti kihonya kihonyaapi wani kimura ginyunyaatataise. O ami ipotihura nyahi Autaahaatihoai nyami ndihaara titihii usonihahuraahi Autaahaatihomihaiwa nahatewaapi biyati waati ginyunyaatati nanyesipatitaise. Autaahaatihoai nyapi giwunyaatati nusesipatamasipatamatiyati nyahi koai usosaiihura kopi nyangi ginyunyaatati nanyesipatamaitaise. ¹³Iyataati wani kimuraahi kimonya mairimanyaahi windi namaamaati konyaanihi nasisoari kaimi kaimi nutihaawe. Autaahaatihopi nasisoari giwunyaapi nutihaahanduni Autaahaatiho nyangi wapa nanyamitandi katimbipaapi nanyamitaiso taati gwinyaawa andititaati jatimi nutihaahanduni ami isihiyaisi maariho napaitaati numwitahaahanduni sonyaahi kaimi nutiwaate. Iyataati kimanyaami apipaahi awaindi jihimatindihandi nyahi kaitihaahandi isihiyaisi maariho nasisoari nunyami nutihaahandi sandi apipaahi awaindihande.

**Sahi Autaahaatihomi Itipihora Piwiha
Ausaitaatiwihandapi Maaritiwise**

14 ¹Isihiyaisi sahi maariho napaitiwi numwitaatiwihandi anitiwi isiwatimi nuwise. Isihiyaisi maariho numwitaatiwihandi isiwatawaawi ami otipipatapi watipihandi giwunyaahohiyihiyai Autaahaatihomi Itipiho numwindihandamihandi sangisangi naitaatiwihandapi pihitiwi gwinyaapise. Sandi Autaahaatihomi piwiha atiwi nepi isihiyai kaunditaatiwihandapi Kiraisihoai nunjendaatiwito.

Ko Itipihoraahi watipihandi nasamitando. ²Iyataati ami utaaho wo piwiha windi piwaamaataha wanihandi usaamihaara piwaatati nehi isihiyai piwaundataamaase. Owetise. Autaahaatithoi piwaundataase. Siyati ko piwaatindihandapi isihiyaisi windi gimaawunyaatitaise. Sandi Autaahaatihomi Itipiho nyami maarihoaisi neti giwunyaasahi ko nyami maarihoai Autaahaatitho gwinyaasiwaiwa noasandiwaiwa kandaase. ³Aihi ami usaahi Autaahaatihomi piwiha atiwi nepi usaisi ausaapi kaundotimandihis isihiya ka piwiha atiwi newaawi kiyaami giwunyaahohitihandi watipititande. Aiwi ami kiya Autaahaatihomi piwihaapi biyati nusesipatati giwunyaatonihis Kiraisihomihireti japepihiritatiwe. Aiwi ami kiya wiwa naangihaiwa newaawisangi bipi kiyaami maariho napaisaatitanihi bimitatiwe. ⁴Iyataati ami wihoanjiha siyate. Utaaho wo piwiha windi atihomisati windi piwaamaataha nehi wanihandi piwaatonaahi so titihi sawahohi andititandihandi naitandi piwandaase. Iyataati ami piwiha wihoanjiha siyate. Utaaho wo Autaahaatihomi piwiha atisati neti ausaahonaahi piwiha kiyaamihaara sandi isihiya giwunyaahohiyihiya kapihi bimohiyihiya atiwi nepi anditititaatiwi kandaase. ⁵Isi nini gwinyaahohiha wonji onihiti sandi katitaano. Sahi piwiha windi atihomiwi piwaamaatiwiha usaamihaaraahi piwaatitaatiwi waati gwinyaataayo Autaahaatihomi Itipiho watipihandi nasanyoniho. Iyataati ami waati mitaahi gwinyaahotihandihis sahi Autaahaatihomi piwiha atiwi nepi ausaapi isihiyaisi kaunditaatiwihandape. Iyataati ami utaaho wo Autaahaatihomi piwiha atisati neti isihiyaisi kaundisiho so Autaahaatihomi isihiya anditiwiwati gaahati awaipati otipipati kiyataise. O utaaho wo piwiha wa usaamiha windi piwaamaataha wanihandi piwaatindimandihis Autaahaatihomi isihiyaisi neti masihonji anditiwiwitandihandapi kandaase. O ami ko piwiha usaamihaara sandi kato undati kiyaamiha atiwi nepi piwaatohihaaraahi kaundonaahi ami kiya atiwi nepi gwinyaapi anditititaapo. Siyati nepemaahiwati katonaahi Autaahaatihomi isihiya kapihi bimohiyihiya atiwi nepi anditititaapo. ⁶Nisi naisihyaate, sahi gwinyaitaatiwiha nini niwahonisapi namihandi kasatitaano. Nini napiti sangisi jasoniti piwiha wa sahi windi piwaamaatiwihaaraahi nini kasatisanaahi sahi napitaiwi nisi piwiha atiwi naitaapo. O nini siyataataahi gaare. Autaahaatihomi piwiha atindi neti ami titihi ausaati kasatiti ami Autaahaatihomi piwihaapi nga ginunyaatati nanesipatonihis nini sangisi kandisasisanihi sahi baiwi nga atiwi naitaapo.

⁷Isihiya piwiha baiwi atitaatiwi piwiha titihi kiyaamihaara kaunditaatiwihandapi namihandi kimbaapi katitaano. Wapa piwaamaata apihimaatihapa isihiya ipohauhi gaatihi isihiya atisawaawi e sapa saitahaawi gandaase tiwi gwinyaawaayopo. Isi isihiya apwitihiri iposaihi biyati gamaatati mimaipinihonaahi siri apwitihirimahe

waipa ahiyaati nawesindihaawo titaapo. ⁸Iyataati ami windisangisi siyate. Pwisipi yaipati tunniwi yahwindaatiwi kiyaami jhimainjiho tunniwi yahwindaatiwi usitita katati otipiho iposihi atisawaayopo. Isi ami ko pwisipi yaipati kiyohiyihiyaami mitiho biyati usitititi namasawi tundaatiwihamwaanji otipiho maamohonaahi kiya pwisipi yaipa kiyohiyihiya napitaiwi atiwi tundaatiwi timetitaapo? ⁹Iyataati ami sangisangisi naasikati kaiwi piwiha usaamiha windi atihomiwi piwaamaatiwi atihominiha wanihaaraahi piwiha isihiyaisi kaundotiha napitaiwi atiwi naitaapo. Kinyi piwiha nehahaati notaiso. ¹⁰Kimaapi yapipataapihi piwiha kiha kiha nahataapipihi pihititi ahondaise. Isi kaiwa piwaamaiwaraahi isihiya usiyihiyaahihi kakaaraahi wihiwihooanji piwaatindaapo. ¹¹Iyataati ami utaaho wo piwiha nini windi atihomindi piwaamandihaara piwaatonaahi komi piwiha kandisihaapi windi biyati gimaanunyaatati namaanesipatitaise. Ko nisapi piwiha waamihoe tati gwinyaahonihi ami nini kopi piwiha waamihoe ndi gwinyaito. ¹²Isi ami sangisangisi naasikati kiya nasoaipaitaise piwiha usaamihaaraahi ausaawaahuro. Isi sahi waati pihitiwi Autaahaatihomi Itipihomihapa nasamitandi gwinyaawaawi Autaahaatihoi nunjeniwise. Ko watipihandi nasanyonihi sahi Autaahaatihomi isihiyaisi anditiwipi piwiha kaundisaihi kiya Autaahaatihomi piwihaapi biyati giwunyaatonihini andititiwi bitoaitaatiwo.

**Porihohi Itipihomihini Watipihandi Isihiya Kiraisihopi Giwunyaahohiyihiya
Piwiha Kiha Kihaara Piwaatitaatiwihandapi Katindhandapihaare**

¹³Autahaatihomihini isihiyaisi saiwi kawiwise totimandi sahi saitaatiwito. Sahi Autahaatihomihini Itipihomihini watipihandaahi piwiha wa piwaamaatiwihini wanihandi piwaatapaapaahi ami Autahaatihoi nunjeme watipihandi nahinyonihi piwiha waaraahi wanihandi piwaatingitihandapi sandito tipi nepemaipi kapihini bimohiyihiya atitaatiwi kiyaamihaara kaunditaapo. ¹⁴Iyataati ami nini piwiha windi piwaamandihaara wanihandi gaapundataataahi ami nisi maarihooi maawi gaapundataase. O nisi amitihaahi nini gaapundotihandapi windi namaanesipatitaise. ¹⁵Isi nini napitaindi kaitande. Nini saindi kaito. Nini nisi maariho gaapundataataahi ami nisi amitihaisati ahoyati gaapundito. Ami nisi maariho Autahaatihopihini aunihihiri aunihitonihi ami nisi amitihaisati maasi gwinyaati aunihihiri Autahaatihopihini katito. ¹⁶Iyataati ami wiwa utaaho wo Autahaatihopihini windi biyati gimaawunyaataho sangisati maasi sapihini bimonihi kinyi piwiha waaraahi piwaatipi Autahaatihoi gaahonje undisamihini kinyi akaaha katipi Autahaatihoi gaahonje undapaase, maatitaise koaisi kinyi piwiha katingihaapi windi gimaawunyaatahoso. ¹⁷Isi sahi piwiha nehi gaahaahi kaundiwi Autahaatihoi gaahonje undawaahandi kandi utaaho Autahaatihopihini

windi biyati gimaawunyaataho sami katohihaapi windi atihomisataati andititandihandi windi namaitaise.

¹⁸Nini Autaahaatihoai gaahone undataato Itipiho watipihandi ningisi nanimihi nini piwiha windi piwaamandiha kiha kihaaraahi sangisi nasitipihaati piwandaato. ¹⁹Isi ami Autaahaatihomi isihya ahoyainjaihihura nini piwiha nehi naasonyaahi ikwiri naasairihitahonya tahonya katito. Kandunjisanihi kiyai Autaahaatiho gwinyaasiwaiwaapi giwunyaatitando. O ami nini piwiha pihindi taahiwaiwa piwiha kiha kiha piwaatitandi sandi owetise. ²⁰Nisi naisihyaati nisataiwi Kiraisihopi giwunyaahohiyihyaate. Sahi manyinya sangihyaamataiwi sami gwinyaapi kiyohiwaiwa namihaapise. Sahi maipihaiwa kamaiwi namihaapise manyinya gaahiya maipihaiwa windi kamaayohipatamataiwo. Aiwi ami gwinyaaniwi gwinyaahiyaatawaawi wapa kaitaatiwi gwinyapehohimumwaanji gwinyaapise.

²¹Autaahaatihomi piwiha winihapipaatihi satati ahondaise:

“Nini isihya piwiha wa piwaatiwihiyai neti nandusaasito.

Nandusoasisanihi kiya nuwi nisi isihiyaisi piwiha waaraahi piwaundiwi kaunditaapo.

Saindi kaisanihandi kandi kiya windi nisi piwiha atihomaanitaapo,”

Aisaiyaaho 28:11-12; Joniho 10:34

tati Awaisiho katise.

²²Isi Autaahaatihomi piwiha utipihandi jihandaatihi ahotisahaapi akite tipi mmondaape. Autaahaatihopi giwunyaahohiyihiyai watipihandi numwihi piwiha kiha kihaaraahi piwaatotimandi Autaahaatiho nini Autaahaatihonini Akitihonihi watipihaiwaisahonini kimonini bindataayo undati isihya kopi gimaawunyaahohiyihiyai nunjati kiyataise. Ami sandi siyati Autaahaatiho komi watipihandi kaindimandi aimi giwunyaapi komihireti iwinjapepihrohohiyihiyaisi nunjati kiyataamaise. Owetise. Isihya kopi gimaawunyaahohiyihiyai nunjitandi sandi kiyataise. Iyataati ami isihya baiwi giwunyaahohiyihiyai Autaahaatiho watipihandi numwihi piwiha atiwi nepi ausaahotimandi Autaahaatiho kopi aimi giwunyaahohiyihiyaisi sahi aimi nisapi ginunyaapi nisihyaatimatauhi nisi maariho samiheti ahinondaise undati nunjati kiyataise. Sandi ko siyati kaindimandi isihya windi gimaawunyaahohiyihiyai nunjati kiyataamaise. Owetise. Kopi aimi giwunyaahohiyihiyai nunjati kiyataise.

²³Autaahaatihomi isihya nahatiya napiwi ahoyaniwi bindawaawi ami kiya nahatiya piwiha kiha kiha windi piwaamaatiwiha wanihaara wanihandi piwaatisaihaahi isihya usa Autaahaatihopi windi gimaawunyaapihiya katihi nandaapi aimi bindawaahiya sahi kiyotihandapi windi gimaawunyaatati namausesipatahiya sapi satitaapo. ²⁴O ami sahi nahatiyaati giwunyaahohiyihyaati Autaahaatihomi piwiha atiwi nepi isihiyai kaundisaihi utaaho wo Autaahaatihopi windi

gimaawunyaaho nandaati samihatihī bimainjaho samī piwihaara komi maipihaiwa kaiwaiwaapi giwunyaatitaise. Ko piwiha atisihaaraahi komi maipihaiwa nahatewa neti nunjonihī giwunyaatitaise. ²⁵ Iyati ami ko siyati gwinyapendaise. “Nisi maipihaiwa isihyaapi noasati nisi omanjititihī ahinotiwaiwa Autaahaatihō neti ausaati autemataise,” tati gwinyaitaise. Siyati sawimatonihī keti kuraanihī satati katitaise, “Titihī apipaahi akitinihī Autaahaatihō sangisatindaise,” tati katitaise.

Titihī Napimasawi Kaiwi Autaahaatihōai Mepi Autaahepumapise

²⁶ Isi nisi naisihyaate, Autaahaatihōai mepi autaahepumaitaatiwi ahoyanawaahura watipihaiwa Autaahaatihō nasamiwaiwa kaitaatiwihireti kasatitaano. Sahi ninaasiyaatihī saiwi kaitaatiwe. Utaaho wo aunihihiri Autaahaatihōai mepi autaahemwaitandihiri katane. Iyonihī ami Autaahaatihōmi piwiha isihiyaisi biyati nusesipati kataunjane. Iyonihī ami wo Autaahaatihō piwiha wa kaundisiha ko ausaati auta katane. Iyonihī ami wo piwiha wa usaamiha windi ko atisati piwaamaataha waniha piwaatane. Iyonihī ami wo piwiha ka nepemaahiwati kiyaamihaara katane. Saiwi kiyawaawi Autaahaatihōmi isihya kapihī bimohiyihiyai anditiwipihira kaiwise. ²⁷ Ami isihya usa piwiha usaamihaara wanihandi piwaatitaatiwaahi awitiwihiya yahurisangisi ami murimingwaasisangisi wo jihī piwaatati namihaahonihī ami wo kapihī piwaatati namihaahonihī ami wo kasini piwaatane. Iyonihī ami wo kingwaasami piwiha waaraahi piwaatotihāapi satiwiha katawaatopo tati kiyaamihaara nepemaahiwati katane. ²⁸ O ami piwiha ka nepemaahiwati katitandihō kapihī owetonaahi ko piwiha kiha kihaara Autaahaatihōmi isihyaami otihatihāpi piwaamaatati nehī bipisi bimone. Nehī bipisi bindataati sawaho kanati ami Autaahaatihōaisataahihī piwanane.

²⁹ Ami wonji sandi kasatitaano. Iyataati ami isihya usa Autaahaatihōmi piwiha isihiyai kaunditaatiwihi atiwī newaawaahi yahurisangi ami murimoaisangi isihya giwunyaahohiyihiyai kaundiwise. Kaundisaihi ami usa bindawaawi sa piwiha titihī Autaahaatihōmi nasahaaro e nehīhaaro tiwi atiwī nepi mmoniwi gwinyaapise. ³⁰ Siyati wo taati piwiha katonihī kapihī deti bimohiyihiya giwunyaahohiyihiyaami woaisi Autaahaatihō piwiha sa katime undati neti giwunyaati kaundonaahi jihī piwiha katisihō piwiha ka namihaatosati nehī bipisi bimonihī ko doti katane. ³¹ Sandi katotimandi sahi nahatiyaati Autaahaatihōmi piwiha atiwī nepi isihiyai kaunditaatiwito. AUSAWAAHURA JATAWA NAPIMASAWI JIHĪ WONJĪ KATISAMIHĪ AMI KAPIHĪ WONJĪ KATISAMIHĪ AMI IPOTĪ WONJĪ KATIWISE. Saiwi kiyawaawi Autaahaatihōmi piwiha atiniwi katawaawi nahatiyaati Autaahaatihōmi piwihaapi biyati nasesipatati gisunyaatitādo. Saiwi kiyawaawi Kiraisihomihireti baiwi andititwi japepihiritaatiwo. ³² Sahi

kiyawaahura kimaiwi kaitaatiwe. Utaaho wo Autaahaatihomi piwiha atisati neti isihiyai kaunditandi Itipihō Gaaho watipihandi nunyonaahi ko piwiha namasati katitandihuraapuni ami ko piwiha katimi noti owemaitandihuraapuni sawaho jatataati Autaahaatihomi piwiha atisati nesihā ausaane. ³³Isi sahi gwinyaapise nyahi otipipati nosasaati mihoaihiraati kaisaihi Autaahaatihōai sandapi pounditaiso. O ami nyahi otipipati itatamanaati napimasaati napaisaati kaisaihaahi sandapi Autaahaatihō gaare tati maarititaise.

Isi sahi Autaahaatihomi isihyaati maasi ahoyanawaahura Autaahaatihomi isihya usa kiyohipatamataiwi kaiwise. ³⁴Iyataati ami asihya warisaisahiya saiwi kaitaatiwe. Asihya usihyaisahiya Autaahaatihomi isihya ahoyanihohipipihi piwiha windi piwaamaatiwi bipi napaisaati bimitaatiwe. Kiya asihya piwiha kapihi isihyaami otihaati piwaatitaatiwi nyahi windi maarimito. Kiya saiwi kamaiwi kiya nehi kiyaami warisaami otitihī bimaawise asihyaapi saiwise tati Autaahaatihomi piwiha winihapipa Mosesiho katati ahaisiheti japepihiriwo. ³⁵O ami kiya asihya wapaapi biyati namusesipatati gimaawunyaatonihī kapaapi nasendaatiwaahi nuwi anjipipihi bindawaawi warisaisi nunjeniwi nepise. Apopaati waati Autaahaatihomi isihya ahoyanohiyihyaami otihaati kiyaami ndiheti wapaapi nasenati piwaatitandi sandi titihimahe. ³⁶Nisi aimi kasatohirihireti japepihiriwi windi kamaayopo. Owetise. Isi sahi jihī yeyetiwi Autaahaatihomi piwiha nesisī isihiyai kaunditihyaatitawaawo? Aiwi ami nehi sahihi Autaahaatihomi piwiha atiwihiyaatitawaawo?

³⁷Iyataati ami sami wo utaaho siyati gwinyaataataahi nini Autaahaatihomi piwiha atindi neti isihiyai kaunditandi Autaahaatihomi Itipihō Gaaho naninyahoniso tati gwinyaaso so nini piwiha kima katotimaapi biyati akite tati gwinyaane ami Awaisiho winihapipa nanimihihapa kandaatono. ³⁸Isi sahi atiwise, utaaho wo nini piwiha kima kandi jipatipiyohimaapi akaahaamahe tati nemasihopi sahi ko piwiha isihiyai kaunditandihā Autaahaatihō koaisi nunyahore tiwi windi gimunyaapise. Owetise. ³⁹Isi nisi naisihyaate, nini piwiha kasatimi napiti wani ipotihā sandi kasatiti owemaitandiyo. Sahi Autaahaatihō Itipihomi watipihandi nepi Autaahaatihomi piwiha atiwi nepi isihiyai ausaapi kaunditaatiwihandapi waati pihitiwi gwinyaawaatiwise. Aiwi ami isihya giwunyaahohiyihya piwiha wa kiya atihomiwi piwaamaatiwihaara wanihandi piwaatisaihihiyaisi sahi windi namaawisapupwise. Owetane. ⁴⁰Saiwi Autaahaatihōai mepi autaahepumaitaatiwi ahoyanawaahura mihoahiriwi kamaiwi jatawa titihireti napimasawi kaiwise.

Kiraisiho Napomatati Japihi Nepataise

15 ¹Nisi naisihyaati nisataiwi Kiraisihopi giwunyaahohiyihyaate, nini Autaahaatihomi piwiha gaaha waniha Kiraisihopitihā aimi

napiti kandisasotihaapi sahi gwinyaapise. Nini ka nesipiti kandisasonihi ami sahi atiwi nepi aimi gwinyaapihiyaate. Atiwi nepi piwiha keti andititiwi bitotawaayopo. ²Nini piwiha kasatohiwaiwa namaamapi anitiwi omanjitihi ahiyawi gwinyaapi binyaihaahi piwiha siketapi Autaahaathiho sangisi japihi nasamaitaise. Wiwa sahi nisi piwiha kasatotihaapi nehie tiwi windi gimunyaitaawo.

³Awaisihomi piwiha aimi atindi nehotihaahi aimi kasatataato. O piwiha apipaahi awaisiha sahi gwinyaitaatiwiha kimaare. Piwiha awaisiha sa Kiraisiho nyami maipihaiwa nemaitandi nyapi napotaise. Iyataati Autaahaatihomi katirihireti japepihirati napotaise. Iyataati piwiha satati, ⁴ko napomasihi yamwaawaayopo. Yamwaahauhi asisiha noti mairimaatihi keti Autaahaathiho koai ahowimasih japihi asoheomatahi nepataise, Autaahaatihomi piwiha katati ahotirihireti japepihirato. ⁵Nini sangi piwiha sandiha aimi kasato. Ko Kiraisiho japihi nepasi noti jihi Pitaahoaapihi noipati nunjoayainjihi ami koai Pitaaho jihi iwinjataise. Aihi ami kasinihandi komi otipipati kaiwaiwa mmoniwi nepi kaiwi niwipinjohiyihiya ikwimaindimwitihi auhirami isundipihohi yahuritahiyaapihi noipati japihi nepati kimonine undati nunjoayainjihi ami kiya koai usonawaayopo. ⁶Iyati ami kasinihandi naisihiya kopi giwunyaahohiyihiya taahiyihiya 500 kaiwihiyai nusatipihaapihiyaapihi noipati nunjaayainjihi ami kiya koai naasikura usonawaayopo. Siyati ko nunjainjihi usohohiyihiyaami usa aimi napopo. Napwauhi ami kiyaami usaahi wani yahiya bindawaayopo. ⁷Aihi ami kasinihandi Jemisihoaapihi noipati japihi nepati kimonine undati nunjoanataise. Siyati ko kiyaisi nunjoanamapi noti komi otipipatihiya piwiha awusoaitaatiwi namihanati Natausaasisawihyaapihi noipati ipotihandi nunjoanataise. ⁸Ko siyati kiyaisi nunjoanati owetihipotinihi ningisaapihi noaipataise. Noaipati ningisi ninjasitihandi isihiya usaisi noipati winjasipatamatiyati noipati ninjataamaise. Owetise. Apopaati maaha namwitandihura sangiso tati windi minjatati nanihiyati bimihima maaha gwitipihama namwitandihama asisiha noaipasihima maaha gwitipihama namwipatamataindi otipipati Kiraisiho nanimitaiso ndi windi timendi gimunyaati minjatonihandi kandi komi otipipati nanimihima noipati komi piwiha awusaataayo. ⁹Aposerihiyama nahatiyama usa Kiraisiho komi otipipati nunyati Natausaasisawihiyama ningisi nanitipihapi awaisawihyaare. O ami nini kiyaami yatihinehi gwiharaahonine. Isi isihiyama ningisi aposerihonjama komi piwiha awusaitaapi Kiraisiho natasoasisihonje ditaatiwama nini awaisihonini gaahoninimaahama ami nini Kiraisihopama sangi giwunyaatihura Autaahaatihomi isihiyaisi titi neti nusopisasiti yaawihandi nunyatihoniniso. ¹⁰Saindi kaandihoninitihandi kandi Awaisihoninisi gaahati kanisati neti nanepemahiwati piwiha awusaitandi ahinihi wani komi otipipatihonindaayo. Ko siyati gaahati kanindihandi noti

nehi owendaamaise. Owetise. Ningisi ko gaahati kanindihandapi nini aposerihiya nahatiyai nusatipihaati otipipati waati mitaahi kiyataayo. Iyataati ami nini saindi komi otipipati waati kiyohitimandi nini niwahonisi watipihanda anditititi kiyataamaayo. Owetise. Autaahaatiho gaahati kanisati neti anditinisih komi gaahandaahi otipipati nini kiyataayo. ¹¹ Isi Autaahaatihomi piwiha akaaha nehi naasaahi naasikaasi ninisangisi ami usa Kiraisihomi otipipatihyaisangisi kasatisaihaahi piwiha Kiraisiho napotati japihi nepasitihandapi sahi baiwi atiwi nepi gwinyaapise.

Isihiya Napomahohiyihiya Nahatiya Ipotihura Japihi Nepaitaapo

¹² Sahi piwiha kimaapi gwinyaapise. Nyahi Autaahaatihomi piwiha sangisi sataati kasatihaato. Kiraisiho napomatati japihi Autaahaatiho ahowimasih napomahohiyihiyaamihatihapi japihi nepataise taati kasatihaato. Sataati kasatohimaapi sami usaati napaapi satiwi katopo. Napohiyihiya japihi windi namepaitaapo tiwo. ¹³ Napohiyihiya akiti japihi namepaitaisaihaahi Autaahaatiho Kiraisihoai windi japihi ahowimati namumwaitaihe. ¹⁴ Siyati akaahanaahi Autaahaatiho Kiraisihoaisi japihi ahowimati windi namumwaahonihi Autaahaatihomi piwiha nyahi sangisi ausaawaati kasatotiha akaahaametati nehahaatitaihe. Iyataati ami sahi Kiraisihopi giwunyaahohitihandi noti nehahandititaihe. ¹⁵ Ami siyatitonaahi ami nyahi Kiraisiho komi otipipatapi natanyoasisawihyaanini Autaahaatiho Kiraisihoai japihi ahowimase taati piwiha kasatotiha jaipitaati nehaha kasatihaato. Ami nyahi sataati Autaahaatiho Kiraisihoai japihi ahowimati numwaataise taati piwiha ausaawaati katihatonono. Ami Autaahaatiho Kiraisihoai apipaahi windi ahowimati japihi namumwaahonaahi ami isihiya napomahohiyihiya nahatiyaisi ipotihura Autaahaatiho windi japihi ahowimati namumwaitaise. Isi ami Autaahaatiho akitinihi isihiya napomahohiyihiyaisi windi japihi ahowimati namumwaitandaahi ami ko Kiraisihoaisangi windi ahowimati namumwaitaihe. ¹⁶ Autaahaatiho napohiyihyai windi ahowimati japihi namumwaitandaahi ami Kiraisihoaisangisi windi ahowimati namumwaahonihi konihi daahi napomaitaihe. ¹⁷ Isihiya napohiyihiya japihi namepaitaatiwihandapi akaahanaahi Kiraisihoai Autaahaatiho windi ahowimati japihi namumwaitaihe. Iyonihi ami nyami piwiha Kiraisihopiha kasatohihaapi nehahandi gwinyaitauhe. Aiwi ami sangi Autaahaatiho japihi windi namaasamaahonihi sahi kiyaatinihi sami maipihaiwaatih bimitauhe ¹⁸ Iyataati ami isihiya Kiraisihopi giwunyaapi bimambiwi napohiyihiya yamihapataatih namaiwi asitimatitaatiwihandi namepi nehi owetitauhe. ¹⁹ Iyataati ami nyahi Kiraisiho ipotihura gaahandi kanyitandihandapi jatimi niyohitimandi nehi wani kimaapi yapimbataapihi

bimohurimuraahihi kanyitandihandapi jatimi nohaawaahi ami yamihapataatihi nyahi asitimatitihahandi windi namaito. Namaitaani ami isihiya nyapi satiwi ese nehihandi jatopo tiwi maariho asipinyito.

²⁰Iyataati piwiha akaahaahi siyate. Kiraisihoapi napohiyihiyaamihatihapi Autaahaatiho japihi ahowimati numwaataise. Autaahaatihomi isihiya napopi nanoposohiyihiya japihi nepaitaatiwihandapi osaataati nandapa jihapihapa akipipa ahotipatamatiyati Kiraisiho nunjati jihi nepataise. ²¹Utaaho wo napwitaatiwihira daihira nuwati japwaasipatamatiyati ami utaaho wo isihiya napomawawihya japihi nepaitaatiwihandi nunjati daihira nuwati japwaataise. Siyati ko nunjati japihi nepataise ami isihiya giwunyaahohiyihiya japihi nepaitaatiwo. ²²Isi nini katotimaapi sandiha kasatondi nasesipati kasatitaano. Adaamiho Autaahaatihomi piwiha nemwasitihandaahi nyahi nahatiyaanini napohaayo. Iyataahandi kandi ami Kiraisihoaisangisi kiyati Autaahaatihomi piwiha atiwisati japepahirindihanda japihi nepataise ami isihiya giwunyaapi bimambiwi napohiyihiya japihi nepaitaatiwo. ²³Ami Kiraisihoaisawi naasura windi namepaitaapo. Owe. Nahatiya nehi kiyai kiyaapihura napimasawi nepaitaapo. Kiraisiho jiho nepataisi ami kapihi usa nepaitaapo. Kiraisiho japihi nasonihura komihiya nahatiya asiyihiyaimatiwi japihi nepaitaapo. ²⁴Ami kiya nahatiya nepasaihi ami ipotihandi yapimbatuni ami kahapaamapimba ahotihi mmonihohiwimaiwauni ami yamihapatuni ami wani isihiyaani taawi bimaami niyohurimura Autaahaatiho neti nemaitaise. Siyati saiwa Autaahaatiho ipoti nemaitandi ahotonihhi jihi nasati gamanimo wani yapihi nahanda itipihho asihatinditihapi watipihaiwa Autaahaatihoai tiwipindati niwisapuwati ahotiwaiwai nemati ami kaiwaami watipihandi neti owematosati owetonihhi Kiraisiho gamaniho titihi komiho ahiyati watipihaiwa nahatewa isiwati isihiya nahandi ko osamati iwinjatitaise. Siyati Kiraisiho nahataapai Awaisiho jihoematati jatimi noti itipihho watipihaiwa nahatewai nemati owemati gaatonihhi ko jaati bimiwaiwa netati Sapiho Autaahaatihomi ikwiraatihi ahaitaise. ²⁵Iyati Kiraisiho akitinihi Awaisiho jihoematati nahataapai osamati jatimi noti komi tiworisaisi Autaahaatiho neti tiwati ipatisati Kiraisihomi yatihhi asimwaatitihemahonihuraatitando. ²⁶Siyati ko tiworisa nahataapa wapai maawi nemati owetanihi ami ipotihandi nemaitandihandi sandihhi nyahi isihiyaani napwitihahandisangisi kandinihi nemaitaise. ²⁷Iyataati ami Autaahaatihomi piwihaatihi wapihi satati ahondaise. Autaahaatiho kahapaamapipa nahataapa neti Kiraisiho jatitandi aimi komihatihimataise. Piwiha kima satati katisima Autaahaatiho sawaho kahapaamapipa nahataapa neti ko jatitandi Kiraisihomi ikwiraatihimataise. Aihhi ami nyahi aimi mmonihhaayo, Autaahaatiho kahapaamapipa nahataapa neti komi ikwiraatihimasihho.

siyataahandi kandi Autaahaatiho sawaho kahapaamapipaisati ahoyati Kiraisiho ninjatitanda tati komihatihini windi sanamaise. Owetise. ²⁸ Siyati kapa Kiraisihomi ikwiraatihi otitihini ahotinjati ipotihura ko Mwaaho Sapiho Autaahaatihomi yatihini asimwaatitihini sanoti bimitaise, jihura Autaahaatiho kahapaamapipa neti komi ikwiraatihi ahiwisihomo. Iyonihini Autaahaatiho sawaho nahataapai osamati jatitaise.

²⁹ Isihiyani aimi napohiyihiyani Autaahaatiho japihini ahowimati numwaitandihandapihina piwiha akaahaametati jaiwihanaahini isihiyani napohiyihiyani anditiwisaihi kiya noaipapi Autaahaatihomi ndihetini gaahiyani asitimatitaatiwihandini nepini nasisoaari bimitaatiwini isihiyani asiyihiyani waapoho napaapi nehopo. ³⁰ Sahini nyangisini baiwini nyainjapise, nyahini kimatini otipimbati kawisonihini isihiyani usa nahateweti nyangisini itihinyatiwini nepini nanyopisasaatiwiyowo. Autaahaatiho isihiyani windi japihini ahowimati asiyaimatitaatiwihandini namumwitaayonaahini nyahini daayaatini kandapini piwiha napaapi ausaitaanihe? ³¹ Nisini naisihiyaatini nisataiwini Kiraisihopini giwunyaahohiyihiyaate, asisini nahateweti isihiyani ningisini nepini nanopisasauihini nini aimi napwitandihandini detini detini nanoaipataise. Nini piwiha akitihi kasatataato nisini naisihiyaate. Sandini nini apaapimaato sahi Kiraisini Jisaasihoaisawini maasini bimauhini nini sapi maaritataatini piwiha kima kandaato. ³² Isihiyani aimi napohiyihiyani japihini animwaahipatombini namepaitaatiwihandini sandini akitihandindaataahini sandapini nini windi kamaatitaanihe. Kamanaatini nehini nanihiyaatini bindihini nandapini waapoho nga nandaanihe. O ami bousonaahini napowaatini sikiyaatini ahotitihaahandisonaatini piwimani kima akaahanaahini isihiyani Epesaasihandaahapihiyani suhwi maasapihomini kairihiretini kaiwini bimohiyihiyaisatini itihitindaanihe. Aiwini ami kiya ningini napitaiwini anditiniwitaapo. Sandihini owetitaise. ³³ Isihiyani wiwani napiwini sangisini jaiwisatitaapo. Isihiyani jaiwisatisaihi ami sahi kiya maipihiyani maipihaiwani kaiwihiyaisawini daayawaawini sami gwinyaahohiwaiwani nepini nasopisasiwini ami sami gaahaiwani kiyohiwaiwani nepini nasopisasaatitaapo. ³⁴ Isini ketini sami gwinyaahotihandini nepini titihematiwini sami maipihaiwani kiyohiwaiwani bipini namihaapise. Nini titihini sangisini kasatataato. Kasatataatoni atiwise. Isihiyani usa sami otihatihini bimohiyihiyani Autaahaatihopini sangini giwunyaatatinini nusesipatahiye. Nini piwiha kima katohimani sahi atisawaawini japepihiriwini sami kiyohitihandapini masitandini kandaato.

Ambipati Japihini Nepasipati Sati Nehini Kati Wipetahate

³⁵ Ami isihiyani usa satiwini nasendaapo: “Isihiyani aimi napomahohiyihiyani japihini napitaiwini nepaitaapo? Aiwini ami kiya napomahohiyihiyani nepawaahurani ambipatinini napitetahatinini nesihiyani nepaitaapo?” tiwini nasendaapo. ³⁶ Isihiyani usa saiwini taawini nasesaihaahini siyani windi gimaawunyaatatinini namausesipatahiyani katawaatopo. Kinyini mmonipini aimi

gihunyaatataise. Konihouni ami wapaisangi yamapaise. Yamahinihi namaamasaatati namaapotataahi ami namutati windi yanimisati asipipa windi ahimetitaise. ³⁷Koniho ami wapaisangi nehi yandipiho kwitaaho wipetaho yamapaise. Iyataati yandipiho so tamitati yananaati ipoti noaipaitandi ahotahomatiyaho yamapaamaise. Owetise. ³⁸Autaaahaatiho sawaho gwinyaasirihireti konihoai tamitati ami yananaati setitandihapa nunyati ahiyataise. Sawaho siyati yandipiho kwitaaho kahatamatipetaho ninaasoaisi tamitati yananaati nunyataise. ³⁹Autaaahaatiho ambipati kiyati ahaipatisangisi sikiyate. Nahataapa nehi naasiketahapaamaahe. Owetise. Autaaahaatiho isihiyaami ambipati wipetahati kiyati ahiyataise. Iyati ami maasapiho ambipati wipetahatisahoai kiyati ahiyataise. Iyati ami koaisi ambipati wipetahati nunyataise. Iyati ami araiho osetetapihoaisi ambipati wipetahati nunyataise. ⁴⁰Ambipati yamihapataatihapihati siyati nehi kati wititihhi ami ambipati yapipatambihati nehi kati wite. Iyataahandi kandi kahapaamapipa autaaahi yamihapataatihhi ahotimbipaami yundanyiha nausainjipipa ami kaiwai nehi wipetati naasiketahaiwe. Iyataati ami kahapaamapipa kimaapi yapipatambihapaami yundanyiha nausainjipipa ami nehi kapai wipetahapaare. ⁴¹Ipihomi yundanyiha nausainjitihandi wipetahanditihhi ami waatihomi yundanyiha wipetahanditihhi ami kaumbwaatisangisi kaatami yundanyiha wipetahaare. Iyataati ami kaumbwihaiwa otihatihhi ninaasaamaatami yundanyiha yiyandihhi wipetahaiwa nausaatahaate. ⁴²Iyataati ami isihiya aimi napowawihhiya japihi nepahohiyihhiyaisangisi siketahiyaare. Isihiya napwauhi yamwaahohiyihhiyaami ambipati ainjotati namasaatati nopisasinataise. Ami isihiya japihi nepahohiyihhiyaami ambipatihhi apipaahi windi namaasaatati windi namopisasindaise. ⁴³Ambipati yapipataatihhi yamwaahohipati sati apipaahi maipihate. O ami ambipati japihi nepasipati satihhi apipaahi gaahate. Iyati ambipati yapipataatihhi yamwaahohipati sati apipaahi windi anditimitihate. O ami ambipati japihi nepaitandihati satihhi apipaahi watipihate. ⁴⁴Ambipati nyahi yamwaahopati sati kimaapi yapimbatambihate. O ami ambipati japihi nepasipati sati yamihapataatihapihate. Iyataati ambipati witi yapipatambihatitihhi ami ambipati witi yamihapataatihapihatisangisi ahondaise. ⁴⁵Autaaahaatihomi piwihaatihhi wapihi satati jipatiipindati ahotise. utaaho jihhi wuwaninihi namasati Autaaahaatiho kiyati ahaisiho Adaamiho ahoyati piwaataho utaaho noaipataise. O ami Adaamiho ipotihura noaipasiho sopi Autaaahaatihomi piwihaatihhi wapihi Kiraisihopi namihanati satati ahotise:

“Utaaho jihhi Adaamiho so nehi utaaho isihiyaami mbipa ditihiri maarisati neti asohotati maarisati noti nasayataise. Aihhi ami Adaamiho ipotihho Autaaahaatihomi itipihho ditihirisahosi isihiya asihihiyaimatitaatiwihandisaho noaipataise,” *Wuwanihapihhi 2:7*

tati ahondaise. ⁴⁶Kimaapi yapimbataapihi ambipatamihireti kaitaatiwihandi jhi noaipataise. O ami maarihomihiireti kaiwi bimitaatiwihandi ipoti noaipataati ambipatamihireti kaitaatiwihandisi nusatipihaahande. ⁴⁷Utaaho jiho Adaamiho so yapipatambihore. Nehi yapipataahi Autaahaatiho kiyati ahiwihihore. O ami ipoti noaipasiho so yamihapataatihapihore. ⁴⁸Nyahi isihyaani yapipatambihyaanini utaaho so yapipatambihomatiyaahiyaanine. Iyataati ami nyahi Kiraisihopi biyaati giwunyaahohiyihyaanini ami utaaho so yamihapat aatihapihomatiyaahiyaanini noaipahaayo. ⁴⁹Akitinihi nyahi so utaaho yapipatambihomatiyaahiyaanini bindihaayo. siyaahiyaanindaahandi kandi ipotihura so utaaho yamihapaatapihomatiyaahiyaanini bimito.

⁵⁰Nisi naisihyaati nisataiwi Kiraisihopi giwunyaahohiyihyaate. Nini sangisi piwiha aimi nasanyohimaami tanyaaha siyate. Isihya kimaapi yapipatambihya yamihapataatihi Autaahaatiho isihiyai winjaati bimimbipihi windi naiwi namindaitaapo. Iyataati ami kahapaamapipa namasaatati nosasinahapa ami kahapaamapipa namaamasaatati namosasinahapa windi namaitaise. ⁵¹Sahi baiwi atiwise. Piwiha kima noasandinjiha ausaati sangi nini kasatitandiyo.^a Nyahi nahatiyaani sangi napowaati bindihaahandi kandi keti kuraanihi nyahi nahatiyaani ambipati wipetahati newa wipetahiyaanitito. ⁵²Ipotihura sandi siyati keti kuraanihi kinapaahoyati ndiha nihoaatihiri timaamasipatamatiyati otipihohi kapaparihiri ipotihandi iposaihi gaatonihura noaipaitaise. Iyonihisura isihya aimi napopi owetohiyihya japihi nepaitaapo. Nepapi kiya jihaati windi namosasinahapa. Iyonihisura ami nyahi asiyihyaani sura namapowaati bimohiyihyaanini noaipawaati wipetahiyaanitito. ⁵³Sandi siyahandapito kimati ambipati namasaatati nosasinjipati noipati wipetahatititi katinihisuraso ari ahotimi nutaise. Ambipati napwipati wipetahati noipati windi owemetati katinihisuraso asipatititi ahotimi nutaise. ⁵⁴Akite. Ambipati sati namasaatati nosasinjipati noipati wipetahatititi nasisoari katinihisuraso ari ahotimi nutaise. Ambipati sati napwipati wipetahati noipati asipimatati katinihisuraso ari ahotitaise. Siyonihisura Autaahaatihomi piwiha sapa saitaise tati ahotisiha noipati akaahaatitaise. Autaahaatihomi piwiha wapihi satati ahotisihaapito: “Autaahaatiho kohematati isihya napwitaatiwihandi tiwati ipatisati kandisinihi owemataise.” *Aisaiyaaho 25:8*

⁵⁵“Kinyi isihya napwitaatiwihandanyi watipihandi maahe?

“Kinyi kinyi watipihanda yaipataahamataimbi isihiyai yaawihandi nunyapi tiwinihi napohitihandi maahe?” *Oseyaahe 13:14*

tati ahotisihaapito. ⁵⁶Isihya napwitaatiwihandami watipihandi isihiyai yaawihandi numwindihandi sandi isihya maipihaiwa kiyohitihande. Ami

^a 15:51 Kiraisiho japihi kimaapi yapipataapihi nasonihura saiwa nyangi nanyoipati kanyimatitaise.

maipihandami watipihandi sandi winihapipa Autaahaatiho Mosesihoai numwihi jipatipaimbipaare. ⁵⁷Siyatisi ami nyahihi Autaahaatihoai kinyi gaahorje gaare unditihawo. Nyami Awaisiho Jisasi Kiraisihomi watipihandaahi Autaahaatiho nyangisi neti anditinyaisihi pwisipi yaipati nyahemataati newa ipihatisaati ami napwitihahandisangi aimi ipatisihaayono. ⁵⁸Isi nisi naisihyaati nisataiwi Kiraisihopi giwunyaahohiyihyaate. Sahi baiwinihi andititiwi bitosawise. Aiwi sahi wapaapi yaiwi onihimitiwise. Sahi dipipataasini Awaisihomi otipipati waati kiyohitihandi nehihandi owetitandimahe. Owetise. Sahi saiwi gwinyaapi Awaisihomi otipipati nahateweti waati andititiwi kawiwise.

**Porihō Autaahaatihomi Isihya Jerusaremihanda Bimohiyihyaapi
Nawihō Ahoyohihō Nusoaasitaatiwi Kaundataase**

16 ¹Autahaatihomi isihya Jerusaremihanda bimohiyihyai anditiwipi nawihō numwitaatiwihandapi naniseniwi kandotihandapi nini sangi wani sandi kasatataato. Isihya Kiraisihopi giwunyaahohiyihya aunahipati Garesiyaahanda bimohiyihyai saiwi kaiwise unditi kaundonihi kiya aimi kiyowi ami sangisangisi naasikati kaiwi nawihō ahoaitaatiwi maaritataayo. ²Iyataati isihya Garesiyaahiyaisi nini saunditi kaundataato: Ninaasiyaati Sandehandi nahateweti nawihō baiwi yandihipi ahoaimi nuwise biyati taahiho timetati ahotitando. Timetati ahotinjati nini napisanihi sahi nawihopi windi daapi mmoniwi nehi nanihaiwi aimi timetindihandisi nepinimitaatiwo undataato. ³Isi nini napiti sapihi Korindihanda noaipati isihya nawihō nga baiwi isiwatiwi jatitaapo tiwi namihanohiyihyai utipihō wo jipatipaindi nawihōaisati nunyausoaasitando kiya nawihouni utipihouni isisi Jerusaremihanda Autaahaatihomi isihyaisi kimo nawihō Autaahaatihomi isihya Korindihandaahapihya sapi nasusoaasauhioe undiwi numwito. ⁴Iyataati ami nini niwahonisangisi Jerusaremihandaahapi naitandi gaatanaahi naisanihi ami kiya maasi ningisawi naitaapo.

Porihō Korindihyai Noti Iwinjaitandi Kaundataase

⁵Nini yapipati Masetoniyaahandaahira napitandi gwinyaati bindataayo. Isi kira yapipati Masetoniyaahandaahira napito. Saindi kira nasataati Autaahaatihomi isihyai iwinjati usonimi napiti sapihi Korindihanda noaipaito. ⁶Nini napiti sangisati wonji bimito. Bimisanihi asisiha mbipa mbwaati wipati wipiwisiha sanoti owetonihapo. Siyati owetanihi kapihi nasamasisi wapihapi naisanihi sahi nga nawihō naninyawi daihira daupwi natiwinoasitaatiwo. ⁷Nini binotaati nehi masihonjete sangisi jasondandi sandi pondise. Isi ami nini saindi kaitandi Awaisiho gaare tati gwinyaahonaahi nini sangisati utaari

masiwonji maasi bimitandi sandi gaare. ⁸O ami wani kimuraahi kimbihhi Epesaasihandaahi bimito. Bimisanihi asisiha Judaahiyaami awaisiha kimbapiho Pendikosihandi noaipati sanoti owetanihura kapihhi namasisi napito. ⁹Nini kimbihhi Epesaasimanda bimitaano totimandi apaapimaato, Awaisiho nisapi daihira daanusihito nini isihiyaisi Autaahaatihomi piwiha baindi ausaati taahiwaiweti kandunjitando isihiya taahiyihiya kinyi piwiha sa amusaapi bipi namape ndiwi nipatisaihihandi kando.

¹⁰Isi ami Timoteho sangi jasondandi nasonaahi sahi koaisi baiwi usoniwi maaritiwi numwaapise, koaisangi nisatiyati Awaisihomi otipipati kimikati kawisataahoso. ¹¹Isi koaisi sahi ahosumwapi nehiohe tiwi mausowise. Nehi wapa ko nenoahitimbipa baiwi nunyawise, komi maariho biyati wiwitonihhi nesi kimbihapi napitando. Ko usa naisihiyaisati maasi japihi napitaiso ndi nini kimbihhi jatataayo.

¹²Nyami naisiho Aporosihopi sandi wihoanjiha kasatataato. Nini watipindi anditindi Aporosihoi sapi kiyai usonda numwe isihiya kimiya naisihiya giwunyaahohiyihiyaisapi maaso unditi kaundonihandi kandi ko windi sangisenda namaapise. Wani kimura maasi numwe undonihhi namaasi ami ipotihura komi ambipati maariho nuripipaitati napitaahiwisonihura sangisi jasondandi napitaise.

Porihho Kiyaisi Piwiha Ipotiha Kaundataase

¹³Sahi sawanaati baiwi jaawi jatiniwo wiwa isihiya nasamaasi daihira asira naisaihi nowaawi Kiraisihoi namapi windi koai namaawipinjitaawo. Sahi Kiraisihopi baiwi giwunyaahohitihandi windi namaamapi baiwi anitiwi isiwatiwise. Aiwi wapaapi windi yamaiwi andititiwi bitosawise.

¹⁴Sami kiyohiwaiwa saiwa Autaahaatihohaisuni ami isihiyaisuni maariho nunyawaawi kiyawaayowi ami kaiwa kaimi nuwise. ¹⁵Sahi aimi Sitepanaasihopuni ami komihusasapuni gisunyaatahiyaate. Susasi yapipati Akaiyaahandaahapi isihiya sangi giwunyaahauhi jihhi Kiraisihopi giwunyaahohususase. Kusasi sawususami maaritiwi giwunyaahohitihandaahi dosisi Autaahaatihomi isihiyaisi anditiwipihati otipipati kiyawaayopo. Aihhi nini anditindi watipindi sandi kasatataato.

¹⁶Isihiya saiwihiya piwiha kasatisaihi kiyaami piwiha atiwiwi ami kiyaamihatihi pinuwise. Iyataati ami isihiya usaisangisi kiyai kaiwusepaapi maasi otipipati kiyohiyihiyaamihatihi bimaawise. ¹⁷Iyataati itingingwaasi Sitepanaasihotihhi Potunaatusihotihhi Akaikaasihotihhi singwaasi napiwi ningi nisonihauhi ami nini kingwaasi usonataati apipaahi aungohandi maaritataayo. Sandi apaapimahe ami sahi nahatiyaati windi napiwi maanisondauhi kingwaasi sami aunahipati nepi sami piwiha nesi napiwi nisoniwi piwandauhe. ¹⁸Kiya napiwi ningisi nisonihauhi nisi maariho apipaahi biyati winitataisi ami sami maarihoaisangisi wisaititaise. Isi isihiya saiwihiyaapi maaritiwi kiyaami piwiha baiwi atiwiwise.

¹⁹Autahaatihomi isihiya kimbihī propinjihandi Esiyaahanda bimohiyihya sangisi ipihirete satawaatopo. Aihī ami Akwiraahotihi ami Pīrisiraahaatitihī ami isihiya Kiraisihopi giwunyaahohiyihyaatihi kasanyurami aṅipīpīhī maasi ahoyanohiyihyaatihi sangisi Awaisihomi ambipataahi ipihirete satawaatopo. ²⁰Kiraisihopi giwunyaahohiyihya nahatiya kimbihapīhiya sangisi ipihirete satawaatopo. Kiraisihopi giwunyaahohiyihyaami kiyohirihireti kaiwi wihiwihooaṅjī geriniwi bimaawise.

²¹Nini Porihonini ipihirete satiti nisi ikwiraahi niwahonini jipatipaindi nusoasataayo.

²²Isihiya usa Awaisihoai maariho baiwi namunyawi pohipiwisohiyihyaamiheti komi apowindihandi kandinihi siyaamiheti ahotitaise. Awaiso Awaisihone namme.

²³Awaisiho Jisaasihomi maariho asipaindihandi sangisati maasi ahotitaise. ²⁴Nini Kiraisi Jisaasihomi ambipataahi sahi nahatiyaatangisi maariho nasanyataayo.